

دربارهٔ رفیق خاله

غوغای ساعت



OHIO STATE
UNIVERSITY
LIBRARIES

غوغوقای ساعت

هر حق محفوظ در

رفیق خالد

غوغوغوغای ساعت

ناشری

جهان کتبخانه سی

صاحبی مهران

استانبول — صباح مطبعه سی

۱۳۴۱

STX

PL248

K34 G79

1922

بر غوغو قلی ساعتک عزیز لکی

دیشاریده یاغمور ، چامور ، صوئوق ، زیفوس وقارانلق
واردی ، برباد بر قیش آقشامیدی . حالبوکه ایچریده سالونلر
ایلیق ، تمیز ، آیدینلق وپر نشئه ایدی ؛ چای ویریلیوردی .
بنده بو عالمه داخلدم .

فقط نه دنسه ملول ، محزون بر کونمیدی . . . نزا کتله
حاضرونی سلاملامش ، بر قاچ نازکانه جمله صرف ایتمش
واصولجه حق بر گوشه یه یوللانوب اوراده ، آیاقده بر سوسلو
ماصه یه دایانوب تخیله دالمشدم . آه ، هیچ شبهه یوقکه ، شو
سالونده هرشی و هرکس ، ایلک نظرده ، پک خوش ، پک
جاذبه دار ، پک قیغوسز و پک آسوده کورونویوردی . صانکه
هیمز بوتون ایشلریمزی یولنه قویمش ، ایرادیمزی مصرفه
اویدورمش ، کندیمزک وچو جوقلریمزک استقبالی تأمین ایتمش ،
حیاتیمزی تحت امنیت آلمش ، شیمدی بورایه هوائی صحتلر
یاپمغه ، اکلنمکه کلمشک . او صاحبلری ، دوداقلرنده مسعود
تبسملر ، اورته ده دولاشیورلر ، مسافرلر ، کوزلری نشئه لی ،
لطیفه لر یاپیورلر ، مودادن بحث اولونویور ، آوروپادن دم
وورولویور ، یازین یاپیله حق اکلنجه لرله بهاره چیقیله حق سیاحتلرک
پروژه لرندن قونوشولویور ، خلاصه مرفه ، مسعود ، طالع
آداملر کی بوزمره اک لطیف حسب حاللرله نه طاتلی وقت

كچيريوردى ! اوت ، شېھەسزكە ، بورايە استانبولك بختيارلىرى
 طوپلانمش ، اك دردسز و اك اندیشهسز انسانلىرى بو ظريف
 سالونده بربرلىيله تلاقى ايتمشدى .

بن تام محاكمه مى بورادهيه كتيرمشدم ، بردن ، باشمك اوزرندە
 بر خرخره قوپدى وغريب بر مخلوق بربر اوستنه آلتى كره :
 — غوغوق ! غوغوق !

دييه هايقىردى . باقدم : ديواره كارقديم آنتيقيە بر ساعت ،
 بر غوغوقلى ساعت آصيلمشدى ...

چارىكده بر اوستندهكى اوفاجق قاپى آچىليور و على العجائب
 برقوش سالونه ، سالونده كيلره دوغرو اوزانه رق يرينه كوره ،
 بر ، بش ، اون ، اون ايكي دفعه :

— غوغوق !

دييه باغيريور ، صو كراينه اوداسنه و يايو واسنه چكىليوردى .
 بلكه بونده شايان حيرت هيچ بر جهت يوقدى . فقط ،
 نه دنسه ، بكا بو (غوغوق !) لر ، شورىا ، خوليا عالمنده پك
 معنيدار كوروندى ؛ صانكه اونى بر فيلسوف عزيزلك اولمق
 ايچون آصممشدى ، هر (غوغوق) بزي حقيقتە ارجاع ايچون
 بر اخطار و هر اساس سز سوزيمزله ، فعله اويمـايان قولمزله بر
 استهزا ايدى . هم ، غالبا على الخصوص چاى كونلىرى ، بو
 (غوغوق) لر اوقادار يرنده چيقييور ، غوغوقلى ساعت بزي
 او درجه مناسب بريرده صو صدرورويوردى كه اونك برما كنده دن
 عبارت اولمايوب آريجه بر روحه ، بر ذكا و بر علمه ده مالك
 اولديغنه كيتدكجه اينانمغه باشلايوردم .

— محقق ، دييوردىم ، آرقەمزدە بىزى بىر دىكلەين وار ،
 ىرى كەلەكچە ايدىنى چكىيور وساعى ئوتدورويور !
 مثلاً ياندىكى قولتوغە كومولوب بوكسك سسلە مجلسە
 خطاب ايدىن بىر حرب زنكىنى — بورج غىرتلاغندە ، پرىشان
 بر حالده ايدى واللى لىرا بولمقدن عاجز بر وضعىتە دوشمشدى ...
 كىفىتە دە جملە مزجە معلوم ايدى — كويا عابد خانندەكى يازىخانەسى
 ايشلەيورمش كى بر عظمتلە :

— پىياسە دورغون ، براز اون اوزرىنە معاملە وار ، فقط
 كچن هفتە اورتاغملە كىردك ، سكر بىك لىرا ضرر ايتدك !
 دىردىمىز — ظاهر عقرب چارىكك اوزرىنە كلىشىدى — قوش
 يواسندن چىقدى وتجارك يوزىنە دوغرو اوزانوب بردفعە :
 — غوغوق !

دىيە ھايقىردى . بن قىپ قىرمىزى اولدىم ؛ آز دەھا او
 صاحى دە :

— قصورىنى عفو ايدك ، مناسبتسىزلك ايتدى !
 دىيەجك ظن ايتدىم . فقط باقدم ، كىمسە شو اخطار
 واستىزانك فرقندە اولمادى .

*
 * *

شىمدى تاجر مفلس سوزىنى كىشمىش ، خلقە يوتدوردىغىنە
 قانع ، ممزون دىكلەنىركن شىق ، ظريف و جاذبەدار بر خانم
 افندى — الله اعلم ، دوغرو اولمسە كرك اما سىغورطە پارەسى
 ايچون كچن يىل يالىلرىنى قىسدا ياقىدقلىرى حقندە اورتلەقدە بر

شايعه دوئمىدى وبويىل ياقه جق او دخى قالمامشىدى - طاتلى
بر بحث آچمىدى :

— كچن قىشى نىسەدە كچىردكى ، نه مكمل بر حيات
او ... بوسنه بكة سويله يورم ، « جانم ، دىيورم ، بوچامورلى ،
صيقىنتىلى مملكتىدە ناصل دورولور ، هيچ اولمازسه ايكي آي
مصره كىدەلم ! » فقط ، عنادجى آدام ، بر درلو راضى اولمايور ،
« بر ايشم وار ، هله بيتسين ، نىتم ينه نىسەدە بر ويللاطوتمق ! »
دىيور ... باقالم نه اوله جق !

خانم افندى سوزىنى اكمله وقت بولمامشىدى ، نىسەدە ويللا
طوتمق عبارەسنه كلير كلز تپەسندە بر خرخره قوپمش و - بچق
اولمايدى - تھملىز قوش قوطوسندن دىشارى يە فيرلايەرق :
— غوغوق !

ديپە اوکادە بر دفعە جان وکوکلدن باغىرمشىدى . . . عجا
خانم آلايك فرقندە اولشمىدى ؟ بن حجابمدن يرلرە كچيوردم ؛
لكن آکلادم که تفاخر مسابقه سنه کيريشان بو مجلسدە (غو غوق !)
دکل آ ، بر ساعت ايجاد اولونسەدە (يوخ سکا !) ديپە هايقىرسە
ينه کيمسە اوزەرينه آلىنمىه جق !

*

* *

اوچونجى بر ذات ، بر محرردى و دالغىنلقله بنم اورادە
بولنديغمى وايشلرک ايچ يوزىنى بىلدىكى دە اونوئمىدى . . .
کتابلرينک مظهر اولديغى رغبتى ، محويتکارانه بر شيوه ايله ،
لكن هرکسک ذهنة حک ایتکه اوغراشه رق طاتلى طاتلى
آکلاتييور ، آکلاته آکلاته بيتيره مييور :

— واللہی ، افندم ، دیوردی ، بومملکت ایچون دو غروسی
 شایان حیرتدر ، ایلک اثریمی بشیک باصدیر مشدم ، بش آیدہ
 تک نسخہ قالمادی ... کتابچی کچن کون ایکنجی طبعی تکلیف
 ایتدی ، «ہاہ شو صیرادہ دورسون ! » جوابی ویردم . مع مافیہ
 اشعاریمی طوپلادم ، کوچوک بر جلد تشکیل ایدہ جک . . .
 طابع اون بیکدن آشاغی باصیلماسنہ راضی دکل !
 اون بیکی ایشیدز قوش [یاتکرار چاریک اوزرینہ ، یاخوددہ
 شاعر مشهورک ایکی یوز نسخہ بیلہ صاتمہ میہ جغنه واقف اولدیغندن
 حدتہ کلشدی] بردن یوواسندن دیشاری یہ آتیلمش واستادک
 برونہ دو غرو غاغاسنی اوزاتوب صریح بر استہزا ایلہ :
 — غو غوق !

دیہہ ہایتیر مشدی . بن اوتانہ رق کوزلریمی یرہ ایندیر مشدم ؛
 ظن ایتشدم کہ شاعرده ایشک فرقنہ واردی ... لکن نہ کزر ،
 غالبا اوبونی (براوو !) ، (مکمل !) کی بر تقدیر و آلقیش
 صداسی فرض ایتش ، (مہر سی) ، (مہر سی) دیہہ میریلد انہ رق
 قولتوغنہ یاسلامشدی !

سوز صیراسی بر بویوک ذاتہ کلشدی ، او سابق ولاحق
 نہ قدار سیاسیون وارسہ ہیسنی بول کیسہ دن تنقید ایدیور ،
 سورو سورو قسورلر صایندیور ، قحط رجالدن دم وررویور ،
 مملکتہ یازیق اولدیغنی سویلہ یور ، سوسلویلکنک جیمینہ آلنی
 صیقیشدیروب مشہور بر سیاسی طوریلہ :

— خانم افندیلر ، دیوردی ، یازیق کہ ایش باشنہ شرق

وغربه لایقیله واقف بر ذات ، بر عز مکار و قیمتدار ذات کچه مه دی .
مثلا بنده کز اقتدارده بولونسه ایدم درت قانونه بو مملکتته او یله
برانتظام ویرر ، معارفی ، صنایعی او یله بر تسهیل ایدر تجارتی
او یله آرتدیرر ، وطنی او یله بر طزاره چه ویرردم که خصم لریمه بیله
مزیت می ، خدمتمی تقدیر ایتدیرر ، دنیا یه پارمق ایسیرتدیرردم .
أوت ، فضله دکل ، یالکز درت قانون ، درت نظامنامه ایله ملتی
شو مخاطره دن قور تارمق بنم ایچون ، عاجز لری ایچون ایشدن
بیله صاییلمازدی !

بویلیغ ، مهم ، مدھش خطابہ بی تام زماننده مدید ، مخرش ،
بو غوق بر خرخره ، بعده سرت ، تیز ، صبر سز بر صدای استهزا -
تماملادی :

— غوغوق ! غوغوق ! غوغوق !

عقرب تام آلتینک اوزرینه کلش ، بر چاریک قادار شونطق
دیگله مکدن قوش بوتون تحمل و متانتی غائب ایدرک یو واسندن
دیشاری یه بر چیلغین کی فیر لامشدی . یدنجی غوغوقده هنوز
حرصی آلاماش کی میریلدانه رق زور بلا ایچری یه کیردی ...
لکن دنیای آکلادیغنی ادعا ایدن اوز کی ، وقوفلی ذات بو صریح
آلای حس ایتمه مشدی . بن ساعتک شو نزا کتسر لکنندن
دولای اوتان دیغمی بللی ایتمه مک ایچون یوزیمه مندیلمی قاپارکن
او آلقیشلا نمش بر خطیب اداسیله مغرور قولتوغنه یا صلا نیوردی .

سیاسیاتدن بیقان مجلس آرتق اوتهدن بریدن بحث ایدیوردی .
اوتوز سنه دن بری اوتوز یاشنی کچمه یین بر خانم افندی [سوز

آرامزده ، خبر آلدیغمزه کوره کریه خانمه بر مقاوله عقد
ایتمشدی ، سوقاقدده کندیسنه (آننه !) دییه خطاب ایتمه مک
شرطیله ماه بماد اللی لیرا جیب خر جلغی ویره جکدی [شوپله
کنج ، شوخ بر قهقهه ایله بردن :

— جمعه یه بنم دوغدیغم کون ، دیدی ، ییمکی هپ برابر ییرز ...
صوکر اداها کنج ، شوخ بر صدا ایله :

— بنده اوتوزینی بولدم ! دییه علاوه ایتدی ... جمله سنی
هنوز بیتیرمشدی ، بردن تپه مزده مدهش بر خر خره قوپدی ،
غوغوق قوشی — همده چاریکه کله دن ، ظاهر زنبوره کی بوشانمشدی —
قوطوسندن فیرلادی ، لاینقطع :

— غوغوق ! غوغوق ! غوغوق !

دییه باغیریور ، متادیاً ، هایقیریور ، نفس نفس ، خانم
افندی یه باقه رق ، غوغوقلرینه دوام ایدیوردی .
هپمز شاشیرمش ، یوکسکده کی ساعته :

— آرتق صوص !

دییه سسله نیور ، یومروقلریمزی صالایوردق . نهایت
قورمه سی بیتهرک بی مجال صوصمشدی ؛ صوصمشدی اما بر
کله ایله فکرینی بودرجه مکمل ودرست افاده ایدن ظریف بر
هجاوه بن عمر مده تصادف ایتمه مشدم !



براستانبوللینک یکر می درت ساعتی

— روزنامه —

— ۱ —

[صبح، ساعت آلتی] — بوتون کیجه صاغه صوله دونمش،
قالقوب جیغاره جیغاره اوستنه ایچمش، کزینمش، بر درلو
اویویامامشدم. صباحه دوغرو بی تاب وتوان تام دالمشدم که اولاً
غزته جی تا قولاغمه، صانکه براخطار اولمق اوزره :
— (صباح) ! (صباح) !

دییه هایقیردی، آرقه سندن سحلبجیلر، سیمیتجیلر، سبزه -
واتجیلر، یومورطاجیلر انصافسزجه سینه فریاده باشلادیلر،
قالقدم. یوره کم حزنله، باشم اندیشه ایله دولو ایدی، زیرا
جیم تماماً بوشدی. هنوز مندره اوطورمشدم که :
— بوکون نه پیشیره جکن؟ دییه صوردیله.
— اوده نه وار؟ دیدم.

— هیچ برشی! دیدیلر. اوت، ذاتاً بیلیوردیم، اوילה،
معناسز برامیدله، بلکه کنارده، کوشه ده بر آز قیرینتی قالمشدر
دییه صورمشدم. نه یاپه جقدم؟ بر قهوه داها ایچدم، « یارینه
یوق! » دیدیلر، برجیغاره یاقدم، صوکنجیسی ایدی، حتی
قوطوده کی کبریت بیله... کبریت ده نه قادار آز دایانیدیور ونه
قادار بهالیاشیور...

[ساعت یدی] — « نه اوطورویورسک جانم، دیدیلر،
قالق، برچاره بول! » آه، بویله، بلا حرکت کوشه مده،

هیچ برشی دوشو نمدن ، هیچ برشی صور مده دن و هیچ برشی
ایشیتمه دن قالمق ، قالا بیلیمک نه سعادت ! فقط ممکنمی ؟ ایشته
قاپی چالیندی . بو درجه عجول ، صبر سز آلا جقلی ده کیمدر
عجیا ؟ زیرا بوکلن محقق بر آلا جقلیدر ؛ صباحلری هپ اونلر
او غرارلر ...

— دون اسپناق آلا دیغمز سبزه واتجی کلش پاراسنی ایستیور !
— یارینه دییکز !

عجیا کیدرمی ؟ سس یوق ، قاپی اورولدی ، کیتدی ،
کیتدی ... بو موفقیتله بر آز جانلاندیم . کینمکه باشلادم .
[ساعت سکز] — لکن نه چاشیرم قالمش ، نه کوملکم ،
نده یاقالق ... یا چورابلر ؟ هر کونک دردی ، فوطین باغلری ده
او یله یا ...

— آی ! احمد مکتبه کیتمه دیمی ؟

— خایر ، کیده مده دی . کتابلرینی آلامادق که کیتسین !
دوغرو ، آلامادق ، ناصل آلا بیلیردم ، داهای ابتدائی
مکتبنده اما ایکی یوز سکسان غروش طوتویور ... کتابی ایکی
یوز سکسان ، آرتق دوشونیکز آیلغنی ، کونده لکنی ، یول
پاراسنی آیاق قابیسنی والسه سنی ... حساب ایتدم ، آیلغم شاید
ماه بمه منتظماً چیقا بیلیرسه اوغلانه آنجق کافی کله جک !
ینه قاپی ! ... فقط آتلا تمشیر ، صوجی ایمش !

[ساعت دو قوز] — قائن والده دن بر مجیدیه اودونج آلام ،
بوکون معاش ویر یله جک دییه ... اون غروشیله زیتون آلدیردم ،
فقط باشقه بقالدن ... بزمکی همان حسابی ایستیور . هوالرده

نە قادار صوغودى ، ھەمدە بردن برە ... ايشته قومشولردن
برى اودونى آلمش ، كسديريور ، فقط ديكرلرى بىمكى كى ،
پايدىرمە يازىنە دعاچى ! پكى اما نە اولەجق ، نە ياپەجىم ؟ آدام
سەندە اللە كرېم ، داھا قىشە وقت وار ، بز بوكونە باقالم !

[ساعت اون] — برى يانمەدە غزىتە او قوركن كوز كىزدىردىم ،
مصطفى كمال پاشا غازى اولمش ، لايقدر ، اونك اوپلە اولاجنى
بىلىدى ، شەيد اولەجق دىكلى يا ... ايكى كىشى آرالىرنە » لىرا
سكز يوز ! « دىيورلر ، اودە بن دە يوق ! لىكن آفرىن قصاب
احسان افندى يە برىچق اوقە ويرەسىيە ات ويرىوردى ،
أوه كوندردىم ، بو كرنلك يىيەجىمىز تامين ايدلى دىمىكدر .
[ساعت اون بر] — صراف دكاندەيم . يوردان افندى يە
بىملە برابر تام اون كىشى يالوارىيور ، أوت ، قادىنلى ار كىكلى
اون مفلس ... حريف غايت صوراتلى :

— بو ايش بويلە باشە چىقماز ! بو ايشك صوكى يوق !
بن دە بىتدم !

دىيە باغرىيور . فقط بز چشىد چشىد دىللار دو كويورز ،
أندە برىيغىن جزدان او خوموردانىيور ، بز مياولايورز ، بر
حال كە . . . نەدن صو كرا بكا بش لىرا ويرمكە راضى اولدى ،
« يارىن كل ، آل ! « دىيوردى ، بن « آقشامە لطف ايت ! »
دىيە يالوارىيوردم . نھايت آجىدى ، بشدە دائرەيە كىترەجك !
[ساعت اون ايكى] — قلم ھنوز بوش يالكىز صائب
افندى كلىش ، ھفتەيە كوۋەي كىرەجك دە . . . نە عقل بو صىرادە
أولمىك . بارى آلدىنى قىز زىنكىن اولسە ، خاير معلمە ايمش ،

ايكى چىبلاق بر حمامده ياراشير ديرلر . بو يوقسزلق ايچنده
سنه سنه قالماز آيريلمازلر سه (يوح) بكا . . . فقط چوجوق
اورالرى دوشونمور ، كويا ياپديغى بر معرفتمش كى عادتاً
عظمت صاتييور !

— او ! بويوريكنز !

صاپ صارى كسيلدم ، فيضى افندى قاپيدن كيرويوردى .
اوكا آيك اون بشنده كل ديمشدم آ ، تاريخه اما دقت ايتمش ..
حريفى التفاته بوغمقدن باشقه چاره يوق ! چنغراغه باصدم :
— چابوق ، محمد آغا ، بك افندى يه برقهوه . . . آمان
افندم ، نه اولور برقهوه مزى اولسون ايچيكز !

عارف ايسه آكلار ، يعنى « بورجمزى ويرهميه جكنز ،
برقهوه مز اولسون قورصاغكزه كيرسين ! » معناسنه ... غالباً
سهزدى ، صورتى آصدى ، ايچندن محقق : « قهوهك يرك
ديينه باتسين ، بكا پارامى وير بهى باتاچى ! » دييور .
آمان اللههم ، بر فلاكت داها ، صراف يوانده [يوردان دكل ،
اوباشقه] كلدى ؛ اوكا قافا طوطاتارم .

[ساءت بر] — ايكي سى ده دفع اولديلر ؛ يكي كووهيدن بر
جيغاره آلدن ؛ اوغلان زفاف نشئه سيلاه يكيجه ايچييور ، كله جك سنه
كورورز ، قاچاغى بولاماز ، بنم كى ! ... عبادوغرومى ، نشئه لى
برخبر ، آيلىق خبرى ... خدمه محمد آغا سويلهدى ، اوكلده
مدير عمومينك خدمه سى سويله مش ، اوده ماليه ده كى عمومجه سندن ،
ناظر لرك خدمه سندن ايشيتمش ! ... آ ! شاقاما قايش جديله شدى ،
ميز بك تلفونله صورمش ، « اوت ! » ديمشلىر !

[ساعت ایکی] — خدجاندیز ! وقت بر درلو کچمیور ...
آقشام غزتهلری چیقدی ، عجیا نهلر وار ، نهلر یوق ؟ کووهی
جو مردمی جو مرد ، ایشته (ترجمان) آلدیردی :

— خیرلی خبرلر ان شاه ؟ دییه صوردم .

— اعلی ! اعلی ! دیدی ، اسکیشهر جبهه سنده ایکی صندوق
جبخانه اغتنام ایتمشز !

— اوح !

— آفیون قره حصار منطقه سنده بر نفر اسیر آلمشز !

— اوح !

— بویله کیدرسه یونان دایانامیه جق ، بن نتیجه یی پک
یاقین کوروپورم !

— شبهه می وار ، بن ده او یله ، بو لودوسه قارمی دایانیر ؟
چوجوق ، هپ دوکون کیفیله اولمالی ، دنیایی پنبه کوروپور ؛
ایکی صندوق جبخانه ایله بر اسیر صانکه مهمات ده پوسی ایله
بر طابور ایش کی نشئه سنی آرتدیردی . اوراق مأموری حلمی
افندی ایچندن تیس تیس کولوپور ، او مخالفک بریدر ، بدخواه
بر بوناق !

[ساعت اوچ] — جانم ایش کورمک ایسته میور . بر آز
قلملری دولاشدم . نه اصابت ایتشم ، آشجی اوغرامش ، « یوق !
چیقدی ! » دیمشلر ، سویلنه رک کیتمش ... شو ملعونک پاراسنی
ایلك اوکجه ویرمه لی ! . خبر کسب قطعیت ایتدی ، آلیورز !
آلدق ...

[ساعت درت] — ... وپتیدی ! (یووان) ده فیضی

افندی ده تکرار اوغرا دیلر ، هم تا قاپیدن فیرلارکن ...
جییمده درت لیرا یدی غروش وار و (یوردان) دنده آرتق
امید یوق ، کاشکه آقشامه بیراقسه ایدم ! حسنی بک :

— نرہیہ ؟ دیہہ سورویور .

— سن نرہیہ ؟

— طاووق بازارینک یاننده هانی بر بویوک میخانه واردی ،

سلاطین میخانه ...

— اوت !

— اونی شیمدی قریملی روسلر طوتمش ، ووتقانک

قدحنی بش غروشه ، مزه لری کورمه ، یا قیزلر !؟ های شیطان

های ، کچن معاشدهده بویله مسلط اولمشدی ! برابر چیقدق ،

او غرام و فونجی یه اوغرا دی ، ایکی پلاق آلدی ، بری حافظ

عاشرک (آمان ممو !) سی ، اوبری شامرامک این اوکی

قانتوسی ... دکانده بورون قانی کهربار تقلیدی برسیغاره آغزانی

خوشمه کیتدی . یوز یتش ایستییور ، حسنی بکک خاطری

ایچون یوز اللی یه ایندی ، آلم !

[ساعت بش] — صحیح ، میخانه بی برحاله سوقشلرکه ...

یا قیزلر ؟ ایریسنی ، لهلی یاپیلیسنی کوزم طوتمادی ، لکن اینجی سی

اینجی می اینجی ... یاناغنک کنارنده ، دوداغه یاقین قاپ قارا ،

لادن کی بر قوجه بنی وار ، عقلنه انسانک دور غونلق ویریور ...

مکرده بردانده اُکسه سنده ، داها ایریسی ، دهاقویوسی وارمش ...

صاریشین چهره یه ، سیاه کوز و سیاه کرپیک نه قادار یاراشیورمش !

[ساعت آلتی] — بش قرق بشی قاچیردم ، آلتی اوتوزله

کیده رم . بنلی قیز آله بر اعانه بیلتی طوتوشدوردی ، واللهی
 آلیرم ، دایانامدم ، روس مهاجرلری ایچونمش ... ایسترسه
 یونا ... شی ... کیم ایچون اولورسه اولسون ، (بن) نه قدار
 تاثیرلی نسنه ایمش ، توکلی شعرای قدیمه « خال ، خال ! »
 دیوب دورمازلر ، آه و فریاد ایتمزلر مش !

[ساعت یدی] — آتی اوتوزه یتیشه مه دم ، یدی قرقه قالدیم .
 اودن قیزاجقلر اما اونلرده ، پارا بولورلر سه سینه مایه کیده .
 جکلردی ، محقق بولملر در ، قادین قسمی عقلنه برشی قویارده
 یایماز اولورمی ؟ .. بنلی قیز تخته باجاقلی بر صقاللی روس عسکرینک
 قرانده چیقوب کیتدی ، قوجه سی ایمش ... شیشمانی ده هانی
 بر باشقه ییچیم کوزلیا ! حمام حلوتندن یکی چیقمش کی یاناقلری
 ابرو ابرو ... باقالم حسابمز نه ایتدی ؟
 — کل مادمازل !

بنم یایمه یوز اللی یدی غروش دوشدی ... چوق دکل ...
 « خاراشو خاراشو ! » دیدک ، چیققدق !
 [ساعت سکز] — اما مجالسزم ! ووتقا دکل خالص آمه ریکا
 اسپرتوسی ... مزه لر قاریشیق شیلر مش ! قالان پاره ایله بر آز
 نواله آلایم دیدم اما باشم فضله دونویور .

ساعت دوقوز — سینه مایه کیتمشلر ، پک کوزملش ،
 پینامه نیکلی اوینامش ... دایما دقت ایدهرم ، سینه ما دونوشی
 بزم قادینلر سر خوشلغمی معذور کورورلر ، ظاهر ، باقیورلر ،
 آوروپا فیلملر نده ارککلرک ایچمه سی طبیعی کورولویور ، اونلرده
 سنس چیقارمیورلر . لکن فنالغی ده وار ، توووال ، البسه

لافي ... (پينامه نيکلی) ويا (فرانسې سقا برتيني) هر وقت
غو غايه سبب اولورلر ، قجه لر !

[ساعت اون الی اوچ] — (اویقو)

[ساعت درت] — آه ، معدم !... لکن دون نه مناسبتزلکلر

یا مشم ، نه واردی ایچه جک ؟ پر بچق ایرام کیتدی ، یاریم لیراده
اعانه دییه او صیصقه قاری قوپاردی . . . ها ! یا آغزلق ؟ کدل
باشه شمشیر طاراق ! توتونم یوق ایچه جک بنم کهر بار آغزلق نه مه ؟

[ساعت درت الی بش] — آه !! اوف !! او ههوا وههوا !!

[ساعت آلتی] — قالقدم . یوردم حزنله ، باشم اندیشه ایله

دولو ، شیمدی زرده ایسه « نه پیشیره جکز ؟ » دییه باشمه
کله جکلر ... آلا جقلیلر سو کون ایده جک ... چوجوق کتابلرینی
ایستیه جک ... باری اونلری آلسه ایدم ، باری قصاب احسان
افندینک بورجنی ویرسه ایدم ! قهوه بیله آلامشم ، شیمدی
ته می ، هانکی زیفتهک پکنی ایچه جکم ؟

آه ، نه حیات !



بر استانبوللینک یکر می درت ساعتی

۲

— برخانمك روزنامه‌سی —

[صباح ؛ ساعت یدی] — آد ، هر کون بویله ، تام یدی اولدیمی خنزیر ساعتک قوپاسی چنغراغی بینمک ایچنی آلاق بوللاق ایدر ، طاتلی اویقومدن یوره کم آغزیمه کله رک اویانیرم . بک یدی قرق بش واپورینه یه تیشمک ایچون آقشاملری یلقوانی یدی نیک اوزهرینه قویمه دن ، قورمه دن ، حاضر لامه دن یاتماز . ایشته قالقیور ، قاریوله دن ایندی ، اوراده دولاشیور... آچوپ قاپامادیغی دولاب ، چکمه جه قالمادی . نه آرییور ؟ ینه نه ایستیور ؟

— خانم ، تمیز چوراب یوقی ؟

هر صباح بو ویا بوکا بکزر ، بو عیار بر سؤال . . . ایشته درت کوندر چاشیر داغ ، طاش ییغیلدی ، قادین خسته ایمش ، باشقه سنی ده بولدورامادم . . . هم ، الله عشقنه ، اوچ چیفت چورابله انسان اداره اولونورمی ؟ ساده چوراب دکل ، شیمدی کوملاک ده ایسته سه بولامیه جق ، بردانه وار اما اونک ده قولاری پارچالانمش ، تعمیر ایتمه که وقت بولامادم ، برهفته در چیقاروب ماصه نیک اوستنه قویدینم حالدہ بردرلو الم وارمادی ؛ مسافر لر کلدی ، مسافر لکه کیتدم اولامادی والسلام !

— دون سويلەمشىدىم ، يىقاتىۋىرە ايدىكز ، ايكى چفت چورابك يىقاماسىدىن نە اولور ؟

دییە سويلەنمە باشلادی ، آ ، هم ایرکن ایرکن ، چىنغراقلى ساءتله اویان ، هم آزار ایشیت ، هم يوقلق چك ... بردن ياصدقن ، يورغانك آلتىدىن باشى چىقاردىم :

— قوزوم ، دییە باشلادم ، سن هیچ بر صباح قارغاسز ایشیکه کیده مز ، أوندىن چىقامازمىسك ؟

و آغزىمى آچدىم ، کوزىمى يومدىم ، صايوب دوکەدىكم قصور ، قباح قالمادی ... بويلە ياشانامازدى ، هر شىئى اسکىمش پارچالانمش ، نە چماشىرى ، نە البىسەسى قالمىدى ؛ ايشته قىش کلشدى ، پالطوسز ، اودوتدرو موشامبه ايله نە ياپه جقدى .

— نە ياپىم ، دىيوردى ، يەتیشدیره مىيورم ، کندیمه باقامىيورم !

مسكىنلک ... باقانلر ناصل باقىيوردى ... خدتمدىن بوغولو- يوردىم ، آجى برسوز سويلەمك لازمدى :

— برابر سوقاغه چىقدىغمز زمان يانمده ، سندن اوتانىيورم ! دىدىم ويورغانه ساريلوب تکرار ياتدىم .

— يا ؟ دییە بىلدى ؟ برشیلر خورداندى ونه بولدىسه کیهرك چىقوب کىتدى .

[ساءت سکز] — جانم ياتاقدىن چىقمق اىستە مىيور ، ترزى کلنجیه قادار ياتارم .

[ساءت دو قوز] — آشخى قادىن پىشیره جکى يىمکلرى صزردى ، « جانك نە اىسترسه ياپ ! » دىدىم : اکسىکلر وارمش

برایرا آتدم ، آلسینلر ... یاری اویقو یاری خولیا آراسنده
نه کوزل دیکله نییورم !

[ساعت اون] — حالا یاتاغمده یم . هفته یه غازیلر منفعتنه
مسامره وار ، لوجهلر اون لیرایه ... بکه بر بیلت آلدیردم ؛
فقط یکی مانطوی او آقشامه یتیشدیر مزسه م کیتیم ؛ فریحه هم
بر تایور ، همده بر مانطو یامش ... او پارایی ناصل بولویور ؟
قوجه سی اوکا ناصل پارا یتیشدیر یور ؟ کزیده ده او یله دکلی ،
هرکون استانبولده ... آلی پاکترلله دولو دونویور !

[ساعت اون بر] — هاه ترزی کلش :

— بویوریکز مادام ... نه دییورسیکز ، یه تیشمه دیمی ،
واه واه ، شیمدی نه یاپارز ، یا پارچه سی قالمادیسه ... چاره
یوق ، اون ایکی واپور یله اینمه لی ، اینرم ، بوأتک بنی نه قادار
ئوزدی ، باق دوکمه لری ده طوتمامش ... ذاتارنسکنی بکنمیورم ،
کاشکه لاجوردینی آلسه ایدم ، داها کبار اولوردی . آقشامه
دونوشده او غرار بیراقیرم ؛ آدیو مادام !

ییمک حاضر دکل که ... آه بو آشیجی ! نه تنبل قادین ،
حدمدن باغیروب چاغیریورم ، خوش بنده ده قباحت واریا ،
ایکی ساعتدر قاپیمده بکله دی ، بردرلو یاتاقدن قالقوبده پاراسنی
ویروب ایسته دکلرینی آلدیرامادم ... باری اوچ یومورطه قیرسینلر
صوکرآ آجیقیرسه م اکمک قدائی یرم !

[ساعت اون ایکی] — واپورده یم ... یکر می ایکی لیرا
ایله نه یاپیلیرکه ... ینه برشیلر آلامه دن دونه حکم . هله شکرانه
باق ؛ یکی بر مانطو داها یامش ، طالع بونلرده ، هانی متارکه

اولونجه اتحادجىارك آرتق بوروسى ئۆتمەجكەدى ، كىم دىتس ،
 يەنە كۈن اونلارك ... حربەدە بىز بولغور يىركىن و صباچ چايمىزى
 شىكرسىزلىككەن بولامايلا ايجىركىن اونلار بىقلاوا بورەك يىيورلار ،
 شىروب ، شىربت ايجيورلاردى ، قوجەسىنك خط قىمىسراكى
 قادىنى الماسە ، آلتونە غىرق ايتدى ، صالاشبۇر باش ئورتولى
 بىر مەھلە قارىسىدى ، بۈكۈن طىرناقلىرىنى پارلاتمەككە ئوينە مانىكۇرلار
 كلىيور ، صاچلىرىنى بىر بىرلەر قىيورىيور ، وجودىنى دوقتۇرلار اوغو -
 يور ، بىر آراق جزا كۈرەجىكلەر ، چالدىقلىرى ، سويدىقلىرى پاراللىرى
 كرى و يەرەجىكلار ظن ايتەك ، غىز تەلر يازدى ، حالەكەت سۈچىسىز مەش ،
 برائت ايتدى ... ايشتە يۈكسەك سىسەلە فەھىمە خاتمە :

— نە اولور ائندەم ، دىيور ، برقات اكسىك البىسە ياپدىرالم .
 برقاب يىمكى نقصان يىەلم ، بىر كىزمەدن كرى قالالم ، بۇ پاراللىرى
 آنادولى غازىلرىنە آيىرالم !

اوبرى ، فقير وزواللى برقادىن :

— حقك وار يا وروم ، دىيور ، نە كۈزل سويلىيورسك ،
 وىرەلم !

أمنىمكە شىكران داھا دىرت پارچە چاشىر آلوب دەھلال احمرە
 وىرەمەشدر ، فەھىمە خانىجىق ايسە محقق چوقدن آلتى قات ياپوب
 يوللامشدر . بۇ مەملەكتەدە ذاتا يا اتحادجى ، يا استىلاجى ھەر حالەدە
 بىر طرفدن اولمالى ، بىزم بىك كى قورقاقلار ايشتە بۇ يەلە چىكرلار .

[سەت بىر] — لزوم يوقدى اما اوجوز بولدم ، نە كۈزل
 (كىمونو) اولور ، قىرمىزى ، قىزىل قىرمىزى بىر فانىلا قىماش ،
 اوچلىرا ... صباچلىرى آرقەمە طاقييورىرم . پودرەم ، قولونىام ،

روژم ، (اوژا) م دە بېتمىشى ... آلم . او قاشدن قالماش ،
يازىق اولدى ، نەياپالم ، دورسون ، قىزىمە برشى ياپارم ... فقط
بن دە ائكسز دورامام يا ! لاجورد برشە ويوت بولدم ، هم قوپونمش ،
ايكى لىزا اكسكىنە ويردىلر ، ظن ايدرم كه يەتيشير ... اولماز سە
كرى ويريرم .

[ساعت ايكى] — ايشم بېتىدى ، داهادوغروسى پارام تو كىندى ؛
بەھالى اما دايانامام ، اوچ طاراق آلم ، ايرى ديشلى ، كەربار
رنكلى ، كبار شىلر صاچلر يە ، ياراشير ، كچن سفر آلدقلىمك
برىنى يره دوشورمىشدم ، اوزرىنە باصنجه قىرىلدى .
[ساعت اوچ] — همان اوه دونه مزدىما ، ايشلرم واردى
اما آرتق يارىنە قالسىن ، سىنەمايه كىردك ، مغازەدە عدالتە نباهتە
راست كلىشدم ... اونلر سوركلەدىلر .

[ساعت درت] — هاه ، يىكى مانطرمى شو فرانسه سقا
برتىنىنك مانطوسى بېچمىندە ياپدىرايم فقط كورك اىستر ، كورك ...
بوقىشى اسكى (بو آ) واسكى مانشونمە چىقارامام ، نباهتەك
آلدقلىنە بايىلدم ، هم مغازە تقسىطلادە ويرىيورمش ، يوز
سكسان لىرايه ... حكومت ايشلەمش معاشلرى ويرسەيدى ،
طقسـانردن ايكى آيلنى يوز سكسان طوتاردى ، عكسى كى
يرىنە اودون ويرەجكمش ! اودون دە نەدر ، نە ياپىلير ، نە ايشە
يارار ؟ بز صوبادە قوق ياقىيورز ، خوش اونى دە دها آلمادقيا !
[ساعت بش] — فىلمى بكنمەدم ، قادين ايكنجى
قوجه سىنك دىدبەسىنى ، داراتى ، او ثروتى ، او بولاننى
بىراقدى دە يىنە برنجيسنە دوندى ، برنجيسنك فقرا حياتنە ...

بويىلە ساچە شىمى اولور جانم ! نىباھت (آلبرتوقولو) يە
بايىليور ، پردهده كورونور كورونمز بنى بويىنە دورتويور :
« ھالە كوكنە باق نە كنەش ... چكەسى نە سويىلى ، يا كوز -
لرنەكى او بايغىن حال ، دوداقلرنەكى اوكسكىنلەك ... » دىيەرك
ناصل مدح ايدەجكنى بىلەميور . بدلا اختيار قوجهسنىك قدرىنى
بىلسىن ، اونى كوركلكر ايجندە كزديرىيور !

[ساعىت آلتى] — واپورده يوقارىدە اوطوردق ، كلن
اركىكلرى سىر ايدىيورز . بنم تاييورمى بكنمەين ، قالمادى ،
نىباھت بىلە كوزل بولدى . ايللە يىكى ، قىرمىزى بوطلرم بر
ياراشىيوركە ... بوتون قادىنلرك كوزى قالدى . ايشتە بك
كلييور ، بو واپورە قالمش ... آمان ، سونەپەلكى بوكون پك
اوزرنە ... اللرى قابا ارزاق پاكتلرلە دولو ، آرقەسەندە
صولوق موشامبا ، تراشى اوزون ، آياق قابلىرى بوياسز ، نە
شانسز دوروييور ... فسنىك ياغنى ، لكەلرىنى بن بورادن
سەچىيورم . زواللى آدام ، ھەم قىزىيورم ، ھەم آجىيورم . كاشكە
بىچارەيە ايىكى چفت چورابلە بر تك اولسون كوملك آلسەيدىم ،
طاراغك پاراسىلە بو اولوردى ... آ ، طاراق پاكتى دەنرەدە ؟
— نىباھت سەندەمى ؟

خاير ، يوق ... دوشورمشم . يازىق اولدى . اوچ لىرايە !
دائىما بويىلە اولور ، ھەر آلىش وىرىشەن دوكرامحقق بر پاكت
اكسبىك چىقار ، دكانلردەمى بىراقىيورم ، المىدىمى قايدىيور ،
يوقسا چارپىيورلرمى ، بىلىمكە ...

[ساعىت ىدى] — واللى بىكە اسكەدن يان يانە چىقمەغە

اوتاندم .. جانم اوستی باشی پک فنا لا شدی شو مانطوی ده یاپایم
آرتق ، بر آزده اونی قیلغنه صوقه جغم . کچن سنه ده بویله
دیمشدم اما عدالتک دوکرنی چیقیدی ...

[ساعت سکر] — آشجی قادین اتی یاقش پلاوده لایه
اولمش ؛ کیدرکن تذه اتمکه اونو تمشدم ، بالقونه ناقتالین قوقوسی
چیتسین ، هوا آلسین دییه پنبه توالتی بیراقشدم ، یاغمور
چیسه له مش ، جانم البسه بیتمش ...

[ساعت دوقوز] — سنیحه ایله قوجه سی کله جکلر مش .
بنده نباهتله ، علوییه یی چاغردم ، بر آز چالغی چالا جغز ... بک
دورمادی کیتدی ، « بنم ساز دیکلیه جک حالم یوق ، ایچم قان
آغلایور ، لیرا دوقوز یوز الی ... » دیدی ؛ عبدالسلام
افندی ایله ارزاق لافی ایدر ، او اوندن حظ ایدر !

[ساعت اون] — اکلہ نیورز . بوعلویه نه شرت قیز ؛
ارکک قادین تقلیدینی یاپمادیغی کیسه یی بیراقمادی ... کولمکدن
چکه لریمزه آغری کیردی . یاریندن تیزی یوق ، بنم قیزه ده
کمان خواجه سی طوتاجغم ... نه اولور برابر بنده مشق ایدهرم ؛
قرقنی کچمه دم آ !

[ساعت اون بر] — حالا چالیورز کولوشیورز . بک
اصولجه حق دونمش ویاتمش ...

[ساعت اون ایکی] — قالقیورلردی آلیقویدم یاز ساعتیه
اون ایکی اون بر دیمکدر .

ساعت بر — کیتدیله یارین آقشام سنیحه ده طوپلانه جغز ...
یاتاغمه کیردم ، شو طار اقلرده یازیق اولدی ... ژوپ ده آراده

قاینادی . فقط (کیمونو) م لطیف ... یارین ترزی یه ویریرم ؛
ایچنه قویه جغم دوبلوری آلمق ایچون ینه استانبوله اینمک لازم ،
نه اولور ، اکلندیورم . چاشیرده او بر کونه قالمسین !

[ساعت ایکی الی ، آلتی] — اویقو .

[ساعت یدی] — آه هر کون بویله ، تام یدی اولدیمی
خنزیر ساعتک قوپاسی چینغراغی بینمک ایچنی آلت اوست ایدر .
بک قالدی ، اوراده دولاشدیور ، آچوب قاپامادیغی دولاب ،
چکمیجه قالمادی .

— خانم ، مندیله یوقی ؟

بو صباحده مندیله ... نه اکیسیکی بیتر ، نه کدیکی قاپانیر ،
بیقدم آرتق . . . درت مندیله نه سنی یه تیشدیریم ؟ تحمل
ایدیلیر حیاتی بو ؟ دون عقلمه کلهدی ، کلسه ایدی کوپرو
اوزرنده روسلر صاتیوردی ، یدیشربچغه ، اوچ دانه آلیردم !



بر استانبوللینک یکر می درت ساعتی

— ۳ —

[کچکین ، فقط زنکین و کوزهل بر خانمک روزنامه سی]

[اوکله دن اول ، ساعت اون بر] — بعضی صباح ،
ایشته بویله ایچمده بر سهوینجه ، متبسم اویانیرم . عجیابونشئه نك
سبی ندر ؟ نیچون بشوشم و یاشامقدن نهدن ممنونم ؟ نهدن
روحم کهنیشدر . و قلبمده توکنمز بر کنجلكك نشئه سی ،
قدرتی واردر ؟ آه پك بسیط برشی ... ایشته شیمدی بر لحظه
دوشونجه سبینی کشف ایتدم : دون کیجه پرنسك یمکنده
یانمه عرفان بك اصابت ایتشدی وبکا غایت صمیمی بر سسله
شویله دیمشدی :

« خانم افندی حضرتلری ، عمرمده بنی أك فضله متعجب
حیران و ممنون ایدن شی ندر بیلیرمیسکز ؟
— بیلهمم که ...

— سویلهیم : سز و کریمه کز !

— نهدن دولایی ؟

— ایلک مشرف اولدیغم کون یان یانه ایدیکز ، سزلری
نهایت اوچ یاش فرقلری اولان ایکی همشیره صاندم و حقیقتی
اوکر نمش اولمامه رغماً الآن بوخارقه یه اینانامادم ... بالاهی ،
اسکی زمان اولسه یدی ، محقق ، واپورده ، ترنده ، هنوز

أولمەش عد ایدەرك سزى كلین ایتىمكە قالقیشان خاملرە راست
كلیدىكنز ! »

عجبا عرفان بونى خوشمە كىتمك ایچونى سويلەدى ؟ ظن
ایتم ... دیدىكم كې پك جاندىن ، پك قىساعتلە ، عادتا سسى
تترەيەرك سويلەيوردى و آرا صیرا ، كىزلى وتربىيەلى بر درین
باقیشلە ، هر طرفى قاورايبوف نفوذ ایدن بر محرم كوزلە وجودى
بر تدقیق ایدیور و بوتدیقندن اودرجه حیران كورونویوردى كه ...
هم ایشته یا تاغمده ایكن یا صدیغمك آلتندن هیچ آیرمادیغم
جیجى آینه مده بو صباح بشوش : رنكم یرنده ... دوغروسی
دوقتور بهانك ویردیكى بو صوك علاج مكمل ایش ؛ آتله دەرى
آراسنه نه اوچیجى ، نه طاتلى بر پنبەلك ، بر صحت و كنجلك
رنكى ویریور . كندیمى بوكون بایرام صباحنده اویانمش سكر
یاشنده بر بىكه بکزه تیورم : روحم اودرجه خفیف ، چهرەم
اوقادار كلكون ؟

[ساعت اون ایكى] — اون بش كوندر دوام ایتدیكم
سوت بانیوسنه دون نهایت ویردم ؛ جلدیمى پاموق كې یوموشاتدى ،
بسلەدى . آرتق کافی ... بوكوندن اعتباراً اوتەكى تداوییه ،
اتلریمى سرتلشیدیره جك ، كنجلشیدیره جك اولان بانیویه
باشلايورم وعلاجك قوقوسنى باصدیرمق ایچونده صویمە
(قوتى) نك بالخاصه بانیو ایچون یاپدیغى رایحهلى طوزلردن
آتیورم . اولى چام عصارەسى قولانیردم ، فائده سنى كورمەدم .
اوو ! . آمان یاربى ، دون صباحدن بو صباحه قادار اللی یدی
غرام فرق ایتشم ... حال بوكە آلتمش سكرى كچمە مكلم لازم ،

بویمك اوزونلغنه و یاشمه كوره فناً التمش سـكزده دورمقلغم
ایجاب ایدیورمش ... ترهیاغ شرینغه سنی آرتق خذف ایتمه لی ،
اونك پرینه سمیرتمه دن قوت ویرن غدالره ، بالق یومورطه سی ایله
خاویاره دوام ایتمه لی !

[ساعت بر] — ترهن کلدی ؛ بر دقیقه صو کرا مادام
هارتمان یانمده در . . . لکن بو چهره ماساژندن بن حالا برشی
آ کلامادم ، کوزلریمك یاننده درت چیزکی ، فقط پك بلایسز
درت چیزکی ، چیزکی جکز الان عینی حالده ...

— بو نرور مادام ! بن حاضرم ، هایدی باشلاییکز !

قادین قارشیمه کجدی ، بن بورنوسلاییم ، یوزیمی به نروروانلی
پومادا ایله خفیف خفیف اوغویور . . . بویله یاریم ساعت
اوغدقدن صو کرا ماسکه کچیره جك بر ساعت قیمیدانمده دن
یاتاجغم ! نه صیقینتیلی ایش ... فقط نه قادار ضروری !

[ساعت ایکی] — ماسکه چهره مده ، شه زولونغه اوزانمش
دوشونویورم . عقلمده هپ عرفان بکك سـوزلری . . . بنی
سوقاقده بر قیز ظن ایده جکلرینی سویله مشدی ! نه نازك ، نه
تریه لی برارکك . . . فقط پاراسز بر آنامه بکزیور ، صیقینتی
ایچنده کی . . . اوچ دفعه در اوزرنده عینی البسه . . . لکن کبار
برالبسه ، قویو لاجورد بر قوستوم ، قویو قیرمزی اسقارپینلر
عینی رنکده ده چورابلر . . . توفیق فکرتك او (تصادف) لرینی
ایله صو کنجیسی نه صیجاق ، یانیق برسـسـله ، نه لطیف
او قودی . یا :

او کجدی : سوسلو ، شطارتلی ، نازلی ، شوخ ، ملک !

پارچه سنی هر صفتده بر آزداها قوتلشهرك اویله سویلهدی که
 عادتاً بسته لشمش صاندیم ؛ یوزیمده ، او صیراده ، بر معما ایله
 باقیوردی که .. صانکه بکا « ایشته (سوسلو ، شطارتلی ، نازلی ،
 شوخ ملك) اولان سزسیکز ! » دییوردی . الله بکا بویله
 حساس بر آدام ، روحی دولدوران بر قوجه نصیب ایتدهدی ..
 بنمکی بر کهیا ! آلیش ویریشاه ، حساب طوتمقله ، اقتصاد یا تمقله
 بقال وچقالره مرام آکلاتمقله مشغول ... باش التفاتی :

— خانمجم ، بو آی مصرفز یوزیدی بحق لیرا نقصان !
 دیمکدن عبارت ... ظن ایدیورکه وظیفه زوجیتی بونمکه ،
 بو نقصانی ، بو کاری تأمین ایتمکه بتر ! آه ، کاشکه آی باشی
 حسابی یوز الی لیرا فضله طوتسه ، طوتسهده قولاقلمده
 طاتلی برسس بکا دائماً :

او کچدی : سوسلو ، شطارتلی ، نازلی ، شوخ ، ملك !
 دیسه ، بنی بویله سهوسه ، بویله اکلاسه ...
 [ساعت اوچ] — اوکله یمکنی متعاقب یاریم ساعت
 اویورم ؛ اما قیامت قوپسه بویله یاپارم ... اویورسه یوزمده
 صباحکی طراوت قالیور ؛ اویومادیغ زمان ایسه نه یاپسه ، نه
 سورسه ، نه علاج آلسه ، نافله ... یاشلی کبی دورویورم !
 عرفان بکک زیارتمه کله جکی برکون بن (سوسلو ، شطارتلی ،
 نازلی ، شوخ ملك) کورونمکه مجبور دکلی یم ؛ اوچ ! نه طاتلی
 حاضر لاندیش !

[ساعت درت] — کیندیورم . یکی لاستیک قوشاغمدن
 اویله ممنونمکه ... قالچه لریمی طبیعی بر صورتده کرکین و ییچیمی

کوسترییور ؛ صاحبی کسیدیردیکمه ده اصابت ایتشم : بنی
اون یاش کنجاشدیردی ... بولیلای قیرویمی کیجه یه صاقلایه یم ،
کوندوز یوزیمی کوچوک کوسترییور ؛ حتی داهای ایسی ،
بستون کنج ، برکنج قیزکی کورونمک ایسترسه بر لاجورد
دار اتکله بر پنبه بلوز کیرم ... آه ، نهایی خاطر لادم ، مکمل
مکمل ! ایشته ، عادتا دارالمعلماتی بر قیزه دوندم ، اونلرک دها
کباری و داهای ییملیسی !

— آننه !

— نه وار جیجم !

— جانم بر صیقیلدی که ...

— نه دن ؟

— دادی (طرخان) ه ألما ویرمش !

— آلی قیریلسین !

صیح ، بن ساده اولاد دکل ، طورون صاحبی یم ده ...
فقط الله عشقنه سویله سینلر شو آینه ده کی تر وتازه ، صیقی
وجودلی وکنج یوزلی خانمک طورونی اولاییله جکنه اینانیلیرمی ؟
عرفان بک پک دوغرو سویله دی ، حقیقه بر خارقه یم !

[ساعت بش] — اوچ دعوتلیدن اولاعرفان بک کلدی ؛

ظاهر بنی بش ، اون دقیقه یالکیز بواق ایچون ...

— ناعیلسکز ؟ دیدم دالغین دورویوردی ، حزین صدا -

سیله :

— هیچ آبی دکل خانم افندیمز ، دیدی ، قرار ویردم ،

کیدییورم !

— نره يه ؟

— آنادولى يه ! اوراده ، جبهه لرده در ديمك تسليسى بولا جغم ! يوزيمه باقدى ، « سـنـك ايچون كيديورم ! » ديمك ايستيوردي . آه ، بنى آنادولى يه كيتمكه قورقوتمق ايسته ين بواوچنجى كنج ... ايلك ايكىسى ، ديدكاري حالده كيدمه ديلىر ، فقط بوكيده جكه بكزيور ، يا كيدر ، يا ئولورسه ...

-- درديكز نه در ؟ ديهه صوردم . يرم اوقادار ايايدى كه ... آيدىنلق آرقه دن كليوردى ، قارشيمده كي آينه ده ، كوز او جيله كنديمى سوزديكم زمان بن بيله بكنيوردم ، تازه ، نارين ، خاير ، خاير ، اونك ايسته ديكي كې : « سوسلو ، شطارتلى ، نازلى ، شوخ ، ملك » ايدم ، اويله نفيس ايدم . فقط ، عكسى كې ، عرفان بكك جواب ويرمسنه ميدان قالمه دن ايچرى ماجد بك كيردى ... ماجد بك اللى بشلك ، قيرانطه ، شيق براختيار ... فقط نه كوه زه ، نه مناسبتسز جه سنه كوه زه :

— افنديمز ، ديهه باشلادى ، شيمدى (آنتره) ده كريمه خانم افندى ايله كوروشدك ، بر آز حدتلى ايدىلىر ، حفيده كز خانمه دادى ألما ييديرمشده ... آه ، افندم ، بوزمانده چوجق نه كوچلكله بويور ... بزم زمانم زده ، بوندن اوتوز بش ، قرق سنه اول ، بز اويله مي يتشدك ؟ .. پك اعلى تخطر بويورورسيكز ، سلطان عبدالحميد خانك قيليج آلاي ... الخ ...

اووف ! بونه باياغى آدام ! عرفان بك ، دقت ايتدم ، ايشيتمه مزلكه كلييور ، فقط او (كريمه خانم) ، او (حفيده كز خانم) ، او (پك اعلى تخطر بويوردىغم سلطان حميدك جلوس

تاریخی)، هپسی بدیمی برر طوقاق کبی صارصدی ... مدهش
بریاریم باش آغریسی قاما کبی شاقاغمه صاپلاندى :

— آه ! دیدم و قالقدم . . . دنیا باشمه زندان اولدی .

عذر دیلهدم و اودامه قوشدم !

[ساعت آلتی] — آغرییه دایانامیاجغم . آمان اللهیم ،

نه قادار چو ککون بر یوزم وار ! آه محقق که یاشلیم ، بوکا

نه سوت بانیولری ، نه طارطیلما ، نه ماساژ ، نه قورسه ،

نه دوزکون ، هیچ بری فائده ایتیور .

— آلی ! چابوق مورفین شیرینغه سنی حاضرلا !

اوح ! نه لذت ... کندمدن کچمکه باشلادم . بکا شیمدی

کنجاشمشم کبی کلیور ، تازه حیات بولویورم . . . عرفان !

عرفان ! صحیح بنی تازه ، قیزم قادار تازه می بولویوردک ؟

[ساعت یدی الی سکز] — (اویقو) .

[صباح ، ساعت دوقوز] — آیینهم نرهده؟ آ ، کوزلرم

اویقودن نه قادار شیشمش . . . بو کون قابل دکل خلق ایچنه

چیقامام .

اوده محبوسم .

آه ، نه حیات ! !



بر استانبوللینک یکر می درت ساعتی

— ۴ —

[مفاس بر حرب ز نکینک روزنامه سی]

[صباح ساعت یدی] — عجبا بو کون هوا نه حالده ؟
اوو ! برباد ، برباد ... بوندن کوتوسی جان صاغلی ! آقشامه
قادر شوچیل هوا ده ، تراموایدن تراموایه آتلایهرق استانبولک
درت کوشه سنی دولاشمقدن کوچ نه ایش اولابیلیر ؟ ذاتاً صوک
سنه لرده کی سوء استعمال لرله وجودیمی خراب ایدوب بیتیرمیشم ...
ساده پارامی دکل ، عینی زمانده کندیمی ده یمش ، توکتمشم ...
یوبره کلریمک آغریسنه تحمل ایده میورم ، یایان چامورده بر آرز
زورلادمی بلمک اورته سنه بر صانجیدر یاپیشیور ، اوندن صوکرا
کلسین قان ... دوکدیکم ساده قانلی کوز یاشی اولسه بر شی
دکل ، بنده قانک اجناس مختلفه سی وار ! خوش اوحیاته بوقادار
دایانیشمه ده حیرت ایدیورم .. یاهو ، صیزمه دن اویودیغم بر کیجه یی
خاطر لایه میوردم ؛ درت بچق سنه ، متادیاً ، قولمه کیروب یاتاغه
نی او یله صوقدیلر ! هر نه ایسه ، کچمشه ماضی ، یینمشه قوزی
دیرلر ، (یا الله ! دیوب قالمالی ، ایشلریمه باقمالی !)

[ساعت سکیز] — شو ویانه ده کی اشیا دهنکلرینی
(چینکر) اداره خانه سی نهایت کوندرمش اما کومروک پاراسنی
تدارک ایتهدن آلمغه امکان یوق ... اونی بر آله کچیردمی یمک

طاقلرینی همان اوقوتورم ، خانمك تووالت ماصهسی تزییناتی ده
 صاتارم ، آرتق بونلره نه لزوم وار ، درت اودالی کیرا اونده
 یکر می درت کیشیلک صاقسونیا ییمك طاقلنی ده ، کسمه بللور
 تووالت اشیا سنی ده قوللانلره دلی دیرلر . . . کهل باشه شمشیر
 طاراق . . . بن بونلری نشانطاشنده کی قوناق ایچون ایصمار -
 لامشدم ، قوناق کول اولدی ، کیتدی ، بزده ایپ قوشاق ،
 سیوری کلاه قالدق . یاهو ، اوشاعر کیمسه نه دوغرو سویله مش
 تمامی پك ایی خاطر مده دکل اما هانی بریری واردر ، حیاتدن
 بحث ایدرده « اویاندم ده بیلدم او بر خواب ایمش ! » دیر ،
 بنده اویاندم ده اکلادم ، صحیح ، دنیا بر خواب ایمش . فقط
 اصل قیزدیغم جهت نه در ، بیلر میسیکز ؟ بزه حرب زنکینی
 دیدیلر ، اعلی . . . صلح اولونجه بزم ده بیتمه مزه برشی دینه مزه ؛
 لکن مملکتده حرب حالا دوام ایدیور ، قان کووده یی کوتو-
 رویور ، جان ویریلوب شان آلدیور . حرب تجارتی ده یاپیلیور ،
 بزی اسقارطیه چیقاردیلر . حالبوکه ، حرب تجارتی بزم ،
 بزلرك حقوق مکتسبه مزدن عد اولونمالی دکلیدی ؟ هم یکی
 یه تیشدیر یلنلردن فضله مملکته بزم فائده مز دوقونوردی ، آز
 تجربه می کوردك ؟ فقط نره ده ؟ یکر می دفعه در آنقره یه « مساعده
 ایدیکز ، کلهیم ، بر نفر کی حدودلرده قان فدا ایدیم ! »
 دیورم ده جواب بیله ویرمیورلر . . . بن ناصل اولسه قان فدا
 ایتمکده ایم ، استانبولده براز فضله یوروسه هم بیله ! . . . کند ی
 کندیمه « شواسکی کونلری خاطر لامایه ایم » دیورم ، اولمایور ؛
 صاحبین سوقاغه بر کوپوکسز قهوه و بر پارچه بیاض پینرله قهوه

آلتى ايدوب چىقاركن انسان ناصل اولورده اسكى قهوه آلتىلىرى
خاطرلاماز ... صوك كونلرمده يىكى برعادتده طوتدورمشدم :
صىجاق صىجاق پوف بورهكى يىردم ... بوكا مأمور برده منىكنهلى
آشجىم واردى ؛ لىكن حريف اما خور آچاردى !

[ساءت دوقوز] — تراموايدهيم. براسكى حربزنكىنى
ايچون اشكنجهنك بويوكى تراموايه يىنمك مجبوريتيدر ؛ اوتو-
موبىللى زمانمده تراموايلره اويله استحقارله باقاردمكه ... صانكه
الى آخرالعمر يىنميه جكم ظن ايدردم !

— بونثورور !

— بونثورور دوقتور !

ياهو ، بودوقتورلرده اما ايام رىئسى آداملر ... شو ،
شىمدى بكا قىصهجه « بونثورور ! » دىين دوقتور يوقى ، زواللى
هر صباح ياتاقدن قالقىشىمى بىكلردى ، كوز قاپاقلرمدن دىز قاپاقلرىمه
قادار معايينه اىتمهك يىرمى بىراقماز ، « افنديمىز » سىز لاف اىتمزدى :
— افنديمىز ، دىردى ، يىنه توصيهلرىمه رعايت اىتمهكه
باشلا دىكىز غالبا ، بوكون سىماي عاليكزده يورغوناق كورويورم !
آدامجىز شىمدى سىماي عاليه دكل ، صوراتمى بيله باقمغه
تنزل اىتمه يور !

[ساءت اون] — شو قاملىا خاننك اوكنندن كچركن
كوكسىم محقق برقاباير ... بزم اسكى يازىخانه ! اوچ تلفون متعل
ايشلر ؛ دوروردى . آه ، اورادن نهلر كلدى ، نهلر كچدى ،
ديوارلر ك دىلى اولسهده بر سويلهسه ... مسلمان ، خرىستيان
قادىن ، ارلك انتظار اوداسنى بىكله يىنلر ك بر لىسته سنى طوتمش

اولسه ايدم دفترلر دولاردى . اونلر ك هيچ بريسته بوكون كينم
يوق اما شوشاعر طاسلاغنى عفو ايدم ميورم؛ اوغلان سنه لرحه
راقى تپسيمك باشنده ، قادينلرله هم بزم عمر سوردى ، كيف
چاتدى ، بادهوا كوكل آووتدى ده شيمدى ايكيده برده حرب
احتكارلرى عليهنده يازى يازيور . ياهو ، قاچ كره بكا :

— سن بوكونك داماد ابراهيم پاشا سيسيك ، بنده (نديم) يكيم!
دير ، ندیم طرزنده غزلار اوقور ، مديحه لرك ، سنيحه لرك
دزينه ياتار ، صويتاريلقلر ايدردى . اولكى كون باب على
جاده سنده برون برونه كلدك ، باشنى چويردى . حال بوكه بكا
ويرديكى فوطوغرافى حالا دورويور ، آلتنده « جهاد مليك
تجارى سرحدلرينه باش قوماندان او دهاى رها كاره تقديم ! »
كې بر جمله واردى . خبر آلدیغمه كوره بوكونلرده آنادولىيه
كیده جكمش ... شايد اوراده ده تپسى ، قدح و كندى تعبيرنجه
(نكار) بولورسه ينه (ندیم) لكة عودت ايدم جكدر . هـاى
اخلاقسز هـاى !

[ساءت اون بر] — قارنم آج ، قارنم ... اون ايكي يي
بكليه ميه جكم . بيلدك لوقانطه لره كیده ميورم ، حريفلر اسكى
وضعيتده ايشم كې اعلاسندن نه لرى وارسه اونى كتيريورلر ،
بر قاچ كره :

— آمان ، فضله ات ييه ميورم ! قومپوستويه قايماق قويمه !
فلان ديدم اما يوزيمه بر معنالى باقديلر ، برداها كیده مدم .
شيمدى ، غلطه ده بر روم لوقانطه سى كشف ايتدم ، اويله نفيس
بالق قيزارتيور ، برده رچينه شرابي واركه . . . اللى غروشك

ابچنده انسان دویویور . هم اوراده کیمسه یه تصادف احتمالی ده یوق ... ینه اورایه کیده جکم !

[ساعت اونا یکی] — یمک هیچده فنا اولمادی ؛ اوزرینه برده طاووق کو کسی بیرم ، اولور ، بیتر !

[ساعت بر] — میشونه اوغرا دم ، بنم اسکی سمسار ... « هپ باتدق ! هپ بیتدک ! نه کوتو کونلر » فلان دیدی اما بنم کوزمک اوکنده بر آفیون ایشندن درت یوز ایرا قومیسئون آلدی .

— میشون ، یکر می ایرا داها ویر باقالم ! دیدم .

— ویرهیم . پاشام !

دیدی ، هان ویردی . لکن دقت ایتدم ، پارایی قاصه سنده کی دسته دن آیریرکن هپ یرتیقلرینی سه چدی ، ظاهر « نه اولسه یاندی ، باری اسکیلرینی ویرهیم ! » دییه دوشو نیوردی . نه ایسه ، ویردی یا !

[ساعت ایکی] — هاه ، حسن کانی کیدیور ، برتاریخده بندن آلی ایرا آلمشدی ، ایستسه می ؟ ایسترم ...

— نه در بو عجله ک جانم ، نزهیه قوشو یورسک هله دور ، بر آز کوروشه لم !

مقدمه سیله قولنه کیردم . فقط کلخانی اوسطه چیقدی :

— نزهیه قوشه جغم ، دیدی ، بللی ، پارا بولمغه . . .

جیبده متالک یوق !

کلده بوجواب اوزرینه آلی ایرا کی ایسته ... اوسته بش ایرا داها آلمادیغنه شکر . . . فقط یالان ها . . . دوموز کی

پاراسی وار . ایچندن : « ملتی صویوب صوغانه چویرمش بر
حرب محتکرینه بورجی اعاده ایده جک قادار آبدال دکلم ! »
دیور . حتی ده وار !

[ساعت اوچ] — صیر صیقلام . محقق آقشامه صانجیلر
باشلایه جق . ایکی سنه در بکا قیش دها شدتلی اوزون ورطوبتلی
اولویور کی کلیور ... ذاتاً استانبولک قیشی چکیلمز ، نه ایدی
او برلینده کچر دیکم قیش ... کورکی صیرتمده یادکار قالدی ،
قالدی اما یایان طاشینیر یوک دکل ، باللهی اوموز باشلریمی
چو کرتیور . لکن بر اییلکی وار سه بنی حالاحشمتلی کوستریور ،
دقت ایدیورم ، بعضی کیمسه لر یوزیمه بو کورک سایه سنده :
— کیم دیمش پاراسی توکنمش ، قالب قیافت یرنده هپسی لاف !
دیر کی باقیورلر . بناءً علیه حالا محترزو حرمتکار دورویورلر .
ظاهری اولسون قورتار مق لازم !

[ساعت درت] — سنیحه براوتوموبیلله کچوب کیتدی ...
او یله ملتفت داوراندی ، او یله بشوشانه سلام ویردی که ...
شو دوشکر نلکمدن بری آکلادم ، یهودی میشون ، خفیف
مشرب سنیحه وسمسار یووان بر دوقتور عرفاندن ، بر تجار
کاتبدن ، بر شاعر راغبدن بیک قات دها مزیت صاحبی ، بیک
قات دها نعمت شناس ... دوست اوله رق بکا اونلر قالدی ،
هیچ اولماز سه کیمیسی کیسه سنی آچیور ، کیمیسی سلا می
آلیور ، کیمیسی خاطری صوروور !

[ساعت بش] — نه هوا ! نه چامور ! نه غلبه لک ! شیمدی
اوه دوندمی باری استراحت ایده بیلسهم ، صویونوب دوکونوب

بر راحت گوشه بولسم ... نه كزر ، خامدوده ، كريمه دوده
 صورتات بر قاريشدر ؛ ذاتاً پويراز اُسَنجه صوبالى اودانك
 باجاسى ده توتويور ، دومان ايچنده ، چهره لر آصيق ، اويله
 برباد بر كيجه كچيره جكزكه ... كل ده ماضى يى يانه ، ياقيله آكا :
 اوه دوندى اونه ايشيق بولغى ، اونه صيچاقلق ، اونه كولر
 يوزدى ... قاريم ممنوندى ، زيرا اوكون بر چيفت كوپه آلمش
 بولونوردى ، كريمه ممنوندى ، زيرا يكي ياپديردىغى توال
 اوزرنده اولوردى ؛ مخدوم بكده نشئه ليدى ، زيرا يا بر
 موتوسىقت ، ياخود بر سبت آرابه يه قونمش بولونوردى ...
 صوكرامسافرلر . . . فدان كى كنج قيزلر ، نور طوپى كى
 ارڪك چوجوقلر ، شاعرلر ، تاجرلر ، مقلدلر ، مداحلر ،
 آقتورلر وغيرهم ... ايچر ، چالار ، يير ، اوينار ديزارقاليردق ...
 دوشونيك بر كره بنم بويورغون ، بزكين وجودمله اوتوتومش
 اودايه ، برده ايكي سنه اول زنده وتوانا او نشئه لى ، فرح ،
 صيچاق كاشانه يه كيريشيمى ! اوف ، الله ، ايچمى بعضاً بر ياس
 قاپلايوركه ..

[ساعت آلتى] — اوده يم . خانم پاندانتيفنى وحلب ايشى
 ياتاق طاقتنى صاتمغه قرار ويرمش ، بناءً عليه يوزى اودرجه
 آصغين دكل ... كريمه ايسه نشانليسندن مکتوبى آلمش ، نه
 متبسم بر حالده ... مخدوم كيجه كلييه جكمش ... اوج ، پويرازده
 لودوسه چه ويردى ، صوبا كورله يوب درويور :

— ييمك نه وار ؟

— دوندن قالمه كيميزنلى كوفته ، زيتون ياغلى پيراصه ، برده پالاو !

— اعلیٰ ، اعلیٰ ! آشانغی اودا صوئوقدر ، شورایه کتیر۔

یویرسینلر ، ییدیویرهلم !

عادتا آلتی سنه اولکی حیات ... چهارشنبه ده کی اوده ده ،
هوا صوئوق اولدیمی ، بویله اودامزده ، سینی ایله ییردک ، هم
ییمکلرده عینی شیلردی !

[ساعت یدی] — بوبر کلرم فنا حالده صانجیور ، یانایم!

[ساعت سکز الی آلتی] — اویقو .

[صباح ، ساعت یدی] — عجبا بو کون هوا نه حالده ؟

اوو ! برباد ... آقشامه قدر شو چیپیل هواده ، تراموایدن
تراموایه آتلایه رق ، کورکلی پالطوایله دولاشمق نه کوچایش ...
فقط ، باشقه چاره وارمی ؟ میشرندن آرتق ایستیه مم ، کیدوب
چارشیده یووانی بومالی ، بلکه بریکرمی لیراده اوندن قوپاریرز!
مملکتده حرب حالا دوام ایتدیکی حالده بر حرب زنکینی
سورونسون ها ! اینانیلیر ایش دکل ...

آه ، نه حیات ! ! !



اعلی ... اینجه کنارلی مندیله ده ایسترم ... ها ، اونوته جقدم ،
سیاه جا کتک اوکنه دون کیجه برشی دوکشم ، اونیده سیلیویر !
بونلر حاضر لانه قاده تراش اولورم ... نه دیک ؟ پانطانونک
آرقه سی اریشمی ؟ های کافر شیطان های ... نه عادی قاشمش
نه اوله جق ، ویره سیه بوقادارنی یاپارلر . سن ینه ئوتوله ،
خانملر اکیلوبده باقه جق دکلر آ ، او کورونمز !

[ساعت اون بر] — نه زمان تمیزجه کیینه یم دیسه مبر عارضه
چیقار : اوسترا یوزیمی دالادی ، سیویله جلر ایچنده یم ، پودرا
سورسه م قیزیل تپه لری بیاض زمین اوزرنده بسبتون کوزه
یاتیور ، (قدم سیمون) ده یاپیشیق ایدیور ... ینه اک ایسی
بوراقس ایله ییقامق ... ها ! کتیر باقیم دادی ، ناصل ئوتوله -
مشسک ؟ آی ! اولمامش ، اولمامش ... باق ایشته ینه پانطانونه
ایکی چیزکی یاممشسک ... صو کرا ، قاچ کره سویله دم ، جا کتک
قوللریله اوکنه باصمه دیدم ... جانم ، سن نه لاف آ کلاماز
قاریسک ! آندن ایش کلزمی ؟ هاه ، ینه یاشندن بحث ایدیورسک
« یتش یاشندن صو کرا آلا فرانغه ئوتو یاپا بیلیرمی یم ؟ » دییه -
جکسک دکللی ؟ بیراق الله عشقنه ... کتیر شو سجاده پی ،
بزی ، ئوتویی . . . ایش بکا دوشدی ! زهرايه تنیه ایت ،
قیرمیزی اسقارپینلری سیلسین ، پاردده سومی ده سوپورسک ،
سن بکا ایکی یومورطه یاپ ، اوف ! قان تر ایچنده قالدیم ...
ساعت قاچ ، ساعت !؟ وای اون بر یچغه کلش ؟ یا یه تیشه مرسم ؟
فلاکت ! فلاکت ! خنزیر فلاح ... آلی قیریلاسی زنجی !

[ساعت اون ایکی] — برکنارده بکله ییم و بکله ییورمش

کې دورایم ... نزیهه خانم کچدی، قیزی ده برابر، فقط نه عظمتلی
 قیز بو به ... بکا، بزه، بزلره هیچ یوز ویرمیور. لکن آئی
 پارتیدر ها! عقار، ایراد، نه بابا وار، نه باشقه قردهش،
 برأوک بر قیزی ... ئولونجیه قادار راحت کچنیر کیدرسک، هم
 قائن والدهی ده، قیزی ده خلق ایچنه انسان کوکسنی کره کره
 صوقار ... «قائن والدهم! زوجهم!» دیهه تقدیمه ده کرلر!
 شو کلنلری ده یابانه آتمالی... قارا کویده کی نرکس خانی اونلرک
 ایمش! ایشته کزیده خانم آرابه دن اینیور، آمان یاربی
 نه محشم قادین! هله کورکلرینه باقیکز، سوقاغه آتسه کز بیک
 لیرا ایدر، کوردکی ازدواجی ... آیده بیک لیرا واردات،
 اوسته ده شو ملاححت پر حشمت ده جاباسی! هاه، بنی کوردی،
 اکیلهیم یرلره قادار اکیلهیم، شاید آلی اوزاتیرسه ئوپرم،
 قونوشورسه بن ده قونوشورم.

— بو نثرور خلقت بک! سزده بو واپورده میسکز؟
 برابر، یان یانه یورویره رک اسکله یه کیردک... بوتون طانیدق
 ارککلر بکا غبطه ایله باقییورلر. آه دنیاده بونک قادار ذوق
 آلدیغم برشی یوقدر: غلبه لک یرلرده، طانیدقلره راست کله کله
 بویله یوکسک عائله دن بر خانمله یورومک!

[ساعت بر] — پانطالونی عرب او یله برباد ایتمش که عجله
 ایله بن ده دوزه لته مه مشم، ایکنجی چیزکی کیتدکجه میدانه چیقیور.
 مدیحه خانم واپوره یه تیشه مه دی، لکن بونک قادار قوجه سنه
 چو جو غنه دوشکون قادین کورمه دم. اوقاوروق حریفک نه سنی
 سه وهر بیلمم! استانبولک اک کوزهل قادینی بویله کنیدیسنی،

حياتدن ، ذوقدن محروم ايدييور ، آجينا زمي ؟ آه ، آه ،
وقتي له او اولمه دن اول پيشنه بن دوشمه لي ايشم ، صالح بكك
قيزينك آرقه سندن قوشه جغمه بوكا چاليشمالی ايشم . فقط بنده
او طالع زرده ؟ قرقني بولو يورز ، داهيا بر ايش بجره مدك ،
بر صا غلام ازدواج ياپامادق ! حسني ايله صلاح الدين نه بختيار
مخلوقلر مش ، بريسي اتحاد جيلر زمانك اك پارلاق آدامك قيزيني
آلدي ... اوته كي ده شيمدي آنادولیده بيلمم نه مبعوثاننه داماد
اولمش . . . اون چفتلك صاحبي بر حريف ، نفوذلی ده . . .
صلاح الدين تجارته سوقش ، متعهد ياپمش ، ميلیونرايده جكمش ،
[ساعت ايكي] — يازيخانه يه اوغرام ، ايش يوق ، يوق
اوغلي يوق ، دوستلر آليش ويريشده كورسون ، قاپاته جغم
اما بسبتون بوشده قالير سه م بزم ازدواج پلانلرينه كد وورور
دييه قورقويورم . « نه ايله مشغولسيكز ؟ » ديديلرمي هيچ
اولماز سه « قوميسيونچيقله ! » ديه بيليورم ؛ هله شومكتوب
كاغدرمله ظرفلريمك اوستنده كي عنوانلره بايكرز ، نه شعه شلي ..
بوبيله بر مسئله در ، بر فائده در . هله بر طاووق كو كسي كتير تهيم ،
يومورطه آغزيمك چاشنيسي بوزدي ، معده مي ده قايناتدي .
[ساعت اوچ] — آه ، نه ياپسه م ، بشه قادار وقتمی
ناصل كچير سه م ؟ . . . هله شو جيغاره دن بر دانه ياقالم ،
(سپاهي اوجاق) يني بن كوموش طبقه مده سووارلر ايچون ،
خانلرك ياننده كوستريش اولسون ديه طاشيرم ، اسرافه گلز ،
فقط يوكسك دوشونجه لره دالار كن (اك اعلي) ايچلمزيا !
شيمدي ازدواج ايسته مي كوزدن كچيره يم :

اولا ، مدیحہ خانم افندی ، او ملاحت پر حشمت و ...
 پر ثروت ! عادتاً دول عد اولینا بیلیر ، زیرا اوچ سنه در قوجہ سی
 آنادولیدہ خدمت وطنیہ سنده . . . غالباً یاقینده قیرقیز پایتختنه
 سفیر اولاجقمش . ظن ایتیم که اورادن صاغ دونه بیلسین . . .
 فقط بوکا دقت ایستر ، بنم ایسه انتظاره هیچ تحملم قالمادی .
 طویلولق کیجه لری اوه احمدقلاشوب دونویورم ، پریشانم ،
 او حالده بونککه شویله مناسبتیزی دوام ایله اکتفا ایتمیلی . . .
 لیکن نه ایری ، نه سہاپایہ قادین ، نه احتشام !

ثانیاً ، نزیہہ خانم قیزی لیلا . . . یوزیمہ بیله باقمیور ، او
 باقما دقجہ بن سہویورم . شو قارا کوزلی ، اسمر شاعرہ مفتون
 ایش ، « بن شعر ایچندہ یاشامق ایسترم ! » دییورمش ،
 ازدواج لری ده یاقینمش . بوندن ده خیر یوق فقط نه نارین ،
 نه خشین ، نه امثالسز بر مخلوق ، بر اینجی . . .

ثالثاً ، نورسزا خانم . . . قیزیل صاچلی ، ہم بیاض ، دورو
 بیاض ، چیللی بر حسن ثروتدار . عکسی کی یاور تاج الدینہ
 وعد ازدواج ایش . . . بونی ده کچلم !

[ساعت درت] — رابعاً ، ملاحت خانم . . . لیکن چوق
 خویبا ، چوق قادینلاشمش بر قیز ، تک باشنه استابول قازان
 بوکیجه . . . نرہ لرده ، نہ حالده ، نہ لر آ لیرکن وکیملرله قونوشورکن
 کورمہ دم . . . عجبا اصلاح ایدہ بیلیر مییم ؟ عجبا اولہ نجه دورغو-
 نلاشیر می ؟ بر مسئلہ کہ آلمادقجہ ویا بر باشقہ سیلہ اولنہ دجہ
 آکلاشیلاماز . ہم بنی فضلہ جدی بولویور ، جدی ویاشلی . . .
 بودہ فائدہ سز . . .

خامساً ، کوثر ... کوثر ای ، اعلی ، نفیس ، خارق العاده
اما بش پراسر؛ بزم آوه ، اون درت کیشینک صیقیشدیغی بش
اودالی بر آوه کله مزیا ؟ آه بوکون بوقادینلرک ایچنده بنی رد
ایتمه جک بر او وار ، فقط چیبلاق ...

— وای ، کل باقالم کرام الدین !

صحيح ، کرام الدینک همشیره سنی اونو تمشدم ، لکن اوغلان
بنم ایچ یوزیمی آبی بیلیر ، قابل دکل ازدواجه راضی اولماز !
[ساعت بش] — بوتون صایدقلم بوراده ، نورسزا
خانمک اونده ... آه ، هپسی آیری آیری مکمل ...

[ساعت آلتی] — اوت ، هپسی باشقه باشقه کوزهل !
[ساعت یدی] — هر برینک چشید چشید مزیتلری وار !
[ساعت سکز] — آه ، بنمده نه زمان بویله بر اوم ، بر
قاریم وبر مکلف سفرهم اوله جق ! حاضر بر قوناغه قورو -
لیویرمک وایپک پیژامالر ایچنده صباحلین آشجی باشی یه آقشام
ییمکنک لیسته سنی ویره بیلیمک بو نه سعادت ، بو نه سعادت !
[ساعت دو قوز] — پوکر اوینانیور ، بن دالغین دوشونویورم ...
نه اولور شو نورسزا اولسون بنی سه چسه ایدی . . . مندیلمی
دوشوردی ، لکن اکیلوب آلامادم ، آرقه مده کزیده خانم
اوطورویوردی ، شو پانطالون مسئله سی وارده ... کوروردیه
قورقدم !

[ساعت اون] — اوت ، هپسی باشقه بیچیم بر ظرافت ...

[ساعت اون بر] — هر برینک خارق العاده کوزل بر جهتی

وار .

[ساعت اون ايكي] — نه نفيس ، نه اثيري مخلوقات بونلر !
 [ساعت بر] — اويمه دونو يورم ، احمقلاشمش كېيىم ...
 آناختارى ده آلمغه اونو تمشم ، شيمدى ايشك يوقسه ساعتلرجه
 قاپي ي وور ، دور ... فقط ، خاير ، زيله باعار باصماز آچيلدى ،
 عادتا بكليورلر مش :

— كيم او قار انلقده كى ؟

— بن ايم ، أفندم !

ها ، زهرا ، خدمتجي قيز ... ياتمامش ، بكه مش ؛ فقط
 نه شيرين قيز بو ... نه طاتلى كوزلرى وار !

— قيز شو اداره يي ياقسه كه ...

— كبريتى بولاميورم ده ...

بنده ده يوق ... قار انلقده آياق آليشغينليغيه چيقارم .

— زهرا !

— أفندم !

نه خلى جانلى بر سس ... بنمكى ده اما بو غوق چيقدى ...
 آدام سن ده ، بكارلق بو ... بكه ديكنى دكل بولديغنى سورسك ...
 داديم اويانمازسه باشقه قورقو يوقدر !

[ساعت ايكي الى سكز] — اويقو .

[ساعت دو قوز] — بزم پانطالونى بو كون زهرايه ئوتوله تيرم ؛
 ظن ايدرم كه دون كيجه كى ماجرانك تاثيريله بكا قول كېي خدمت
 ايدر . شمدليك لازم اولانده او ... نه ياپالم ، بوده بر نعمتدر !
 بلكه او غور كتيرير !



بر محله بقالنك مشاهداتی

— ۱ —

آه ، بورۇيالر . . . او يانیشی نه برباد اولویور ! کندیمی بعضی کیجه لر ، او یورکن ، اسکی حیاتمده ، ترجمه قلمی ممیزلکمه ایکی بیك بشیوز غروش آلتون معاشله قیغوسنر ، زحمتسنر ، متعظم ووقور یاشارکن کوروب صوکر محله بقالی اوله رق او یانق ! . . . ایچیمه او یله بر آجی یاپیش-ییور ، یوزده کم او یله شیشیور و کوزلرم او یله بردومانلانیور که ... عادتا ، دوقونسه لر آغلایه جق کبی اولویورم ؛ بوتون کونمی دالغین ، مأیوس ، امیدسنر کچیریورم . ایشته بوسباح ده کوزهل ، طاتلی بررؤیادن او یاندم : حالا ممیزمشم ، مادمده اوطورویوردم ، مدیر چاغیریور دیدیلر ؛ کیتدم ؛ التفات ایتدی و :

— تبریک ایدهرز عطاءالله افندی ، رتبه ثانیه کنز اراده سنیهیه اقتران ایتدی !

بویوردی . اورادن چیقوب برر برر رؤسای برای تشکر دولاشدم ، هر طرفدن التفات کورویوردم ، یولده هر کس تبریکلر ایدیوردی ؛ قلمده ایسه ممیز اولك صوراتی بر قاریشدی ، حسدنن پاطلا یوردی . او تالته ده قالمشدی . سونجمدن ایچم ایچمه صیغما یوردی . آه ، آه ، نه عمردی او ! بردن کوزیمی آچایم که ممیز عطاءه افندی نك یرنده یلار اسییور ، یاتا قده یاتان بقال عطا افندی ...

مخلاه نك بوتون سسلری ، خطا بلری ، سپار شلری قولاق لریمه

دولدی :

— عطا افندی ، یوزدرهم غاز ویر !

— عطا افندی ، اللی درهم شکر ایسترم اما تمیزی اولسون !

— عطا افندی ، قارا بیرك وارمی ؟

— عطا افندی سنده سینامکی بولونورمی ؟

بن نروده ، بقاللق نروده ؟ مشروطیت چیقنجه عقمزده

قافامزدن چیقدی ، بر بوبورلنمه در کیدیوردی :

— آدام سن ده ، دیوردق ، مأموریت ذلتدر ، یاشاسین

تجارت !

نهایت آلمیزه بر قاچ یوز چیل لیرا ویردیله ، تنسیقات دییه

قاپی طیشاری ایتدیله . اوکون بوکوندر نه محله ده اعتباریمز

قالدی ، نه حیاتمزدده لذت ! صوکرالری ، دکل اصیل مأمور

اوله رق ، یومیله جی صفتیله او استحقار ایتدیلمز مسندلرده

سورتوندا ، دوردق ، جان آتدق اما ألمزه کچیرمه ده . . .

مأموریتده ایکن صباحلین بویله می قالقاردم ، قارغه کیرینی

ییمه دن ، کونش یوزینی کوسترمه دن . . . آغیر آغیر قهوه می

ایچر ، آهسته آهسته قهوه آلتیمی ایدر ، لذتی چیقاره چیقاره

غزته می اوقور ، بوتون او خلقندن اعتبار ، احترام کوروردیم .

شیمدی ایسه اونلر بیله بکا متالک ویرمیورلر ، قاریم بر آز

فضله سویله نسیم چیقیشیویریور ، اوغلمه بر آز سرت معامله

ایتسه م :

— آنادولی یه کیده رم ها !

تهدیدىنى صاوور وپور ... بو آنادولى ده آنا ايله بابادىن پارا
قوپارمق ايچون كنجلكك ائندە سـلـا ح ! يا قىزم ، خاصبه ...
يان باقمغه كلييور :

— سزك اكمككزى يمميورم يا ، معاشمله كچينيورم ، بوكونه
بوكون مأموره يم !

دييور . آمان اللهم ، كون كه جكمش كه بن بقاللق ايدە جكميشم ،
قىم مأمورلق ... نه عجائب ، نه عقل ايرمز ايشلر !! بر بنم
اينجى كى تلتى دوشونيكز ، برده كريمه خانمك چارپوق چورپوق ،
ايكرى بوكرى ، صار صاق يازيسنى ، صوكر اكللك ده مأموره لكـنـه
شاهماييك !

يازيسنه دكل ، يوزينه باقيورلر سه ديه جكم يوق !
هر نه ايسه ، بسم الله دييوب شو كه پهنكلىر قالديرالم ...
هاه ، ايشته هر صباحكى ايلك مشترى ... كوشه ده كى اوك
آخر تلدى : اللهم سحر نده كلير ، اون ايكي بچق درهم دو كولمش
بر صباح ده بيراقمايور كه بر باشقه سندن سيفتاح ايدەلم بر قاچ
كره سويلەدم :

— قىزم ، ديدم ، يابونى يكرمى بش درهم آليكر ، ايكي
صباحه يه تسين ، يا صباحككنى آقشامدن آليكر ، سحر وقتى
ايكىمزه ده كو جلك اولماسين !

آكلاتامادم كه ... هم جانم ، بوناصل اودر كه دولابنده يوز
درهم قهوه بولوندورماز ، صوكر اقادينلرى سينه مادن ، ار ككلىرى
سازدن باشنى آلاماز ؟ .. ايشته ايكنجى مشترىم ، اوستده كى
اوك انتاريلى بكى :

— عطا افندى ، استانبولدن شكر آلمغى اونو تمشم ، بش

غرو شلق ويريرميسك ؟

هر زمان بويله سويلر « استانبولدن آلمغه اونوندم ! » دير ،
هفته لر كچر ، اوى بش غرو شلق شكرله اداره ايدر . « طوپدن
آلمغه پارام يوق ! » ديمك عييميدر ، جانم ؟ كنديسى شكر
پارا بولاميور ، مخدوم بك كوركلى پالطو كييور . ايشته بو
ايشى ده آكلاميورم ، آرقة كده ياقاسى لوتر پالطو اولسون ،
معهده كده اون درهم شكر بولونماسين ! هم قيافته او بربرينه
اويماالميدر ؟ مخدومى سوقاقده كوره نلر كاشانه ده قوتله تيره رك ،
فيسقيق اوزوم بادمه بسله نييور ظن ايدر : آياقده روغن فوطينلر ،
الده آلتون حلقه لى باستون ، پانطالونك ياچارى چكيك ، ايك
چورابلر پيريل پيريل ميدانده ، بر احتشام ، بر شيقلق كه . . .
أوده ايسه درت نومرو لامبه يانار ، مندرلر كوتلر ييرلامش ،
آبدستخانه قوقوسى ديشارى يه وورويور ، بك بونك ايچنده
يورام بورام قولونيا قوقويور !

هر كس برر برر ايشنه كيدييور : مصر چارشيلي عبدالسلام
افندى اير كنجيدر ، اخذ واعطاسنى طوپدن ، بالق بازارندن
ياپار ، داها بندن بر ليمون ويا يومورطه آلدقلىنى كورمه دم .
پارا باباسييميدر پارا باباسى . . . لكن يكي آلدىغى خانم ، كنج
خانم چابوق ديبسه دارى اكه جكه بكزه يور . چن كون دكانه
اوغرادى :

— عطا افندى ، ديدى ، آقشامه افندى كلنجه اعاده

ايدهرم ، عجله لازم اولدى ، بش ليراك وارمى ؟

ویردم ... بر کون ، بر هفته کچدی ، سس ، صدا یوق .
 نهایت چات چات قاپی ، اوغرا دم . بر خیلی فیصیلدیله اولدی .
 صو کرا خانم بردن ، ئورتوسز ، آپ آچیق کورونمه سینمی ؟
 حقیقه کوزل قادین ..

— عفو ایدرسک ، عطا افندی ، دیدی ، بزمکنک حالی
 معلوم ، نکسمی نکس ، چکدیکمی بن بیلیرم ، بر قاچ کون
 صبر ایده مز میسک ؟ سز یابانجی دکسیکز ...

نه طاتلی قونوشویوردی .. « پکی ! » دیدک ، حالا بش ایرا
 اونده اللهک کونی آرابه دن اینمیور . عبدالسلام افندی کوزینی
 قاپار قاپاماز خانم اوله نیر ، هم محقق چاپقینک بریله . . . یازیق
 پارالرده ، قادینه ده ...

اوو ! .. دردانه خانم قیزیمز کلیور ، بزم کوچوک خانمک
 اشی ، اصحاب مأموریتدن . . عجیانه آله حق ؟ هله ناز و
 ادایه باقیک :

— عطا افندی !

بویوریکز !

— سزدن برشی رجا ایده جکم ... کلاج وارمی ؟

— بولونور !

— اما بن کلاچندن ایسته مییورم ...

یانه سندن ایستیورسیکز ؟

— اوزرنده کی غازدن ، قیرمیزی غازدن بکا بر آز کسر ،

ویریر میسیکز ؟

— باشقه سنه یاپمام اما ... ویرهیم !

آلدى ، تشكر ايتدى ، كيتدى . عجيبا بو بز پارچه سنى ده
نه ياپه جق ؟ ها ، آكلادم ، بوي ياپه جق ، آلق ... كاشكه اول
سويلسه ايدى . بن اوكا بزم كريمه نك علاجنى اوكرتسه ايدم
مصر چارشيسندن بش غروشلق قيرميز آله جقسك بر اوفاق
شيشه يه قويوب اوزرينه صو طولدوره جقسك ، چالقالايوب
قوللاننه جقسك ... اما يا كاش اولماسين ، شكر جى قيرمىزى !
نه ايسه ، بر داها كلاج قيليفى ايسته مكه كيرسه تعريف ايدرم !
... حسنى بك ينه اوتته كى قالديرمدن ، غزته سنه دالمش كى
ياپه رق كچيور . اوتوز بش غروش ايچون هر كون بويله بر زحمته
قاتلانير : يا منديلله بروننى سيلر ، يا هوايه باقار ، يا صدرات
آصار ... بر آقشامجق چالغىلى ميخانه يه اوغراماسه بو صباح
صيقينتىلرندن قورتولوردى ... اوتوز بش غروش به ، ده كرمى ؟
دفتردارلر ك اوشاغى كلدى ، آنده پوصله : پرنج ، مقارنه ،
صالچه ، فلان ، سكر قلم مال ... دفتره يازدق ، اونلرله اخذ
واعطامز ويره سيهدر ، آله پارا كچر كچمز بورجنى ئودهر ...
يورغانه كوره آياغنى اوزاتان برعائله . نه قادينلرى مسرف ،
نه ار ككلرى خاشارى ، هپسى كبار شيلر ، فقط عكسى كى
بختلرى كوسكون : بابا ايله اوغل وبرداماد بوشده ... نه طوتسه لر
قورويور ... بويله لر ينه قرهدى بروظيفه ! لكن نه دنسه ، بونلر
كيسنه ، بورجلرينه صادق ، دوستلرينه وفا كار ، اخلاقلى آداملره
فلك يار اولمايور !

— عطا افندى !

— افندم !

— ايكي چاريكك وارمى، بوزوق پارا اوله رق ... واپوره
 ويره جكم ... يكرمى بشلكى بوزدير امدام ده ...
 ويردم . ولى پاشا زاده كرامت بك نه زماندر صيقينتده ،
 محقق كه :

— ويريكز ، بن بوزايم !
 ديسه ايدم شاشيروب قاله جقدى . بچاره آدام كيم بيلير
 بوكون بش ، اون ليرا بواق ايچون استانبولى ناصل آلت اوست
 ايدە جك ! ... نه قادارده چوكمش ، آلتشنى كچكىن كورونويور ،
 حالبوكه آنجق قرق بشلك ! اولرى ياندى ، بر اوغلى
 حرب عموميده ، كوچوكى ده بوسفر آنادوليده شهيد اولدى ..
 قاريسى ياتاقده ، قيزى متورم ... بو نه حال ياربي ! شـكـر يـنـه
 كندى حالمه !

... ها ، ساعت بره كلييور ، آرتق ار ككلرك آرقهسى كسيلىدى ،
 شيمدى خانملىك استانبوله اينمەلىرى زمانى . . . ايش سز شيق
 بكلرده بوساعتده اينرلر . ناه ، بردانهسى كچييور :
 — عطا بك ، بريكيجه ويريرميسك ؟

بو چوجوق بكا هر زمان (بك) ديه خطاب ايدر ، تحف
 دكلى ، خوشمه كيدييور ، او (بك) كلمهسى خاطرينه ويردسيه
 بندن جيغارا آلير ؛ يعنى بنده ويرمسەم عمر نده توتون يوزى
 كورميه جك ، جيبي ده ليكمى ده ليك . . . فقط مبارك حالنه
 باقايورده يكيجه دن آشاغي سنه تنزل ايتەيور ، هم كوندده برپاكتى
 بتيرييور . ياهو ، بز حسابمىز بيلمز آداملر !
 ايشتە عبدالسلام افندي نك حرمى . . . اسكاهيه آرايدايلا اينسيور ؛

یكا دوغرو متبسمانه باقدی . بش لیرایی اعاده ایتمه مك ایچون
نه نازلر یاپه جغنی بیلمیور . آه بو قادینلر !... دردانه خانم
قیز مزده بو کون اوکله واپورینه قالمش ... لیکن کلاج قیلیفی نه ده
مکمل دوداق بو یایورمش ، آلمی آل ...

— مرحبا ، عطاءالله افندی !

بو آدامده اسممی او یله برخواجه آغزی ادغام مع الغنه
ایله تلفظ ایدرکده ... کندیزی مخالفدر ، دایما امید ایچنده یاشار .
لیکن داها بردفعه اولسون مسنده ، مأموریت کچدیکنی کورمه دم :
— برادر ! بزه ایکی اوقه پرنج طارتیور ، براوقه ده شکر ..
آقشامه مسافر لرم وار ، قذائف آلمغه کیدیورم ، بزمکیلر ،
فرقه آرقداشلری کله جکده ..

اماده صیق کلیورلر ... بو یوقلق ایچنده حاجی نظیف بک
کول اولدی کیتدی . مخالفلر غالبا فضله اکول ، فضله شکمپورور
آداملر ؛ فقط راقیه دوشکون دکالر ، اقشامجیلقلری یوق . .
حالبوکه احسان قایدان آرا صیرا اتحادجیلری طوپلایور .. تام
اوج اوقه ایچیورلر ! شیمدی بو آقشام دکانک اوکندن صاریقلی
ستره لی ، یاشلی باشلی ، آغیر آغیر مخالفلر کچه جکدر . احسان
قایدانککیلر کنج ، دینج ، اوچاری شیلر ... محله ده بر قضا
چیقاراجقلر ، لامبایی ده دهویروب دکازی ده یاقه جقلر دییه بوتون
ضیافت کیجه سی اویقوم قاچار !

— سزده تخته فیرچه سی وارمی ؟

محله یه یکی طاشینان کیراجیلرک خدمتچیسی اولسه کرک ...
آکلاشیلان اوی سیلیورلر . فقط قیز سسوقاغه عادتا چیپلاق

اوغرامش ، دیز قاپاقلرینه قادار چورابسز ، آچیق ، قوللری
 صیوالی ، باشنده بر صارغی، یوزی چالیشمقدن قیپ قیرمیزی .
 نهده کوجلی قوتلی ، صاغلانم یاپیسی وار ، نه قادارده کولر
 یوزلی... ایشته ایچری کیردی. هر طرفه، ئورکهده دن باقینیور...

ای که کنج دکلم ، بو قیز بنی باشدن چیقاریردی !

عادتاً ذهنمه بر دورغونلق چوکدی .

آدام سن ده ... ممیز قالوب ده نه اولاجقدم ؟ بوراده هیچ
 اولمازسه محله ده اولان بیتن ایشلره باقوب کوکل آووتویورم !



بر محله بقالك مشاهداتی

— ۲ —

بوكون بازار ايرتسى . . . يعنى دكانك اك اكلنجهلى كوني
بازار ايرتسىلى شكران بكك خانى چاى ضيافتى ويرير ؛ او
تا قارشیده در ؛ ساعت دردى كچدىمى مسافرلر سوكون ايتمكه
باشلارلر . قاپى آرابه و اوتوموبيلله دولار ، تا كيجه یدی بچغه
قادار پنجره لر آيدىنلقدر و پرده لر تول اولدىنى ايچون ايچريده
قادىن ، اركك دولاشوب كزينلرك شكلارنى قولايجه سهچه -
بيليرم . چاى ويرمك ، چاى كوني ، چاى ضيافتى ده ندر ؟
بو بكا خيلى مراق اولور . او كون ايركندن پاسته جیدن قوطى
قوطى شكرمه لر و چوره ككر كلديكنه نظراً هر حالده يمه ايچمه
خصوصنده مبدوليت اوله جق اما برماصه اطرافنه ديزيلوب هپ
برابر ، ييمك يير كييمى ييرلر ؟ يوقسه قهوه كى مى ؟ . . . هنوز
برفكرم يوق . . . مع مافيه مسافرلرك آيرى آيرى ساعتلرده
كلوب كيديشنه كوره هر يكي كنه باشقه باشقه چيقارلديغنه حكم
ايتمك ايجاب ايدر . خانه صاحبلرى ايچون كوچ و كلفتلى برايش
اولسه كرك !

ايشته ايلك دعوتلى ، برخانم ، آرابه دن اينسيور . . . باللهى
اسقارپينك اوجندن سورمه سنك قويروغنه قادار رسم كى
سوسلى ، مكمل ، منتظم . . . اتلاركن مانطوسى بر خوشبجه

دالغەلاندی ، بىم دكانك ايچنە قادار بر رايحە ، بر رايحە طيبە
 يايىلدى كە يايىلىيورم صاندىم ، عادتا صارصيلم . اكر هركلن
 خانم بودرجه عطرياتە بولانمش ايسە اوصالوندى باش آغريسندن
 اوطورولاماق لازم : بىم دكانك - پاصدیرماسنە صوجوغنە
 وكچكىن صالامورالرينە رغماً - داها صحى اولديغندە شېهە يوق!
 هيچ اولمازسە آچ قارننە انسانە اشتها علاجى كى تأثير ايدر ،
 او لاوانطەر ايسە آج آدامك باشنە دوقونور ، طوقنك
 يولانتيسنە !

بىجە — هانى صابون صاتييوردم ديبە سويلەمييورم -
 قوقو ، قوقو قادينە ياقيشمق اعتباريلە اعلی مسك كى حاجى جمالى
 ويا كريد صابونى قوقوسيدر او ايچدن ايچە تميزلك قوقار !
 هاه ، ايكنجى مسافر كوروندى : بو بر بك ! كوزلرى
 نشئەسندن پيريل پيريل پارلايور ، عادتا قاپيسى آچىق بر تل
 دولابە قوشان وكولباستى قوقوسى آلان آج ، عارسىز بر كدى
 كى . . . حقى دە وارىا ، نە طالعلى آدام ! او دمينكى خانملە
 صيجاجق اودادە يان يانە اوطورەجق ، ألدە چاى ، او كندە
 شكرلە كلسين خوش بش ، لطيفە و محبت . . . بر آرزو كرا
 او ايكي خانم اوچە ، بشە ، سكرە ، اونە بالغ اولەجق ، هررنكەدە
 هر بويدە ، هر جثەدە وهر ياشدە ! حريفى صورسەك كيمدر ؟
 يا مفلس ميراث يدى ، يا جيبى دەليك بر شاعر ، يا بر آووقات
 طاسلاغى . . . هراوچى بر آرايە كلسەلر شوبىم دكانك سرمايەسنى
 اورتەيە قويامازلر !

كون بويلە ايش سىز كوچنىز زوببەلرك والسلام !

ايشته بردعوتلى خانم داها . . . صباحكى خدمتچينك كبار
طورلىسى والى باستونلىسى . . .

— عطا افندى فستق وارمى ؟

دنياده بو عرب آشجى قادين قادار عكسى زمانده آلىش
ويريشه كلن مخلوق كورمه دم . . . كنديسى باقىلير شى دكل ،
برده اوسته لك باقىله جقلرك سيرينه مانع اولور . فقط ، دوغروسى
ياشايدشلىرينه بايلىورم : نه قىليغه اهميت ويريرلر ، نه قيافته . . .
مع عائله هپسەنك كوزى موطباقده ويمكده ! هر كون فرونه
هندى ، طاووق ، طاتلى كونده ريرلر ، اونه روانيلر ، اونه
مانطيلر . . . يا قبه ديدكلرى عرب كوفته سى . . . من السحر
الى الشام هاوان سسى موطباقده اكسيك اولماز ! ات دوكرلر ،
جويز دوكرلر ، صارمساق دوكرلر ، دائما چاشنيلى ، تىماتلى
مكمل يىمكلر ياپارلر . فقط قادينى ار كككى سوقاقدە كورسەك
ديلنجى ديه آووچلرينه برر يوزلك قويارسەك ؛ اوست باش
دو كولويور . يعنى كوشەدهكى ماوى بويالى اوك بىستون معكوسى :
اونلرك قادينى ار ككى مودا مغازەلر ندهكى بىكلر كى كينيرلر ،
اويله سوسلو پوسلودرلر ، فقط قارنلرى ده اوبىكلر كى بوشدر .
موطباق باجالرينك توتديكنى كورن يوق . . . عمرلرينى مونسمة
كورە قيشين طحن حلواسى ، يازين سيلورى يغون تى ايله كچيريرلر . .
باش غدالرى بونلردر ؛ پك درمانسز قاليرلرسە ، آرا صيرا
بندن قوطى صاردا ليه سى آلدقلىرى ده اولور ! زور ايله دكل آ ،
ييه جكه پاره ويرمكه آللىرى ياتميور : يكرمى بش غروشى اويرر ،
چويرر ، اويله اوزاتيرلر . صو كرا عطاردن هر آى اون ليرالق

قوپچە ، ماقارا ساتین آلیرلر ، آووج دولوسی پارایی تحافی
دکانلرینه صاچارلر !

بو ایکی یاشاییشدن هانکیسی داها موافق اولسه کرک ؟
اورتهسی ایی اما بز اوئی بولامیوررز .

اوو ... بر اوطوموبیل سوکدی ؛ محقق شکران بکه ...
أوت ، اوپله ، ایکی خانمه بر مادامه ... ایشته برارکده یایا
کلیور ... بر خانمده یوقوشدن کوروندی . ساعت تام بشه کلش
اوله جق ... تام بشته بویله قاپینک اوکی سینه ما مدخلنه دوزر ،
جیو جیوله شیر ! انسان هانکی برینه باقه جغنی بیله میور .
— عطا افندی مرحبا !

ایوالله ! قدرت بک ، سلطان عزیز مابینجیلرندن قدرت
بک ... ینه ئولمه مش ، ایشته صاپه صاغلام ... او خسته لانی
بری بن دکانده راحت قالیوردم . بوناق هرکون کلیر ، اوچ
ساعت تخته اسکمه ده اوطوروب حکایه دیکه تیر . به آدام ،
نه دن ، نیچر ، نه صلا حیتله بقال دکانی قهوه خانه یاپار ، بر
دکانجی یی ایشندن آلیقویارسک ؛ باری پک اسکی بر دوست ،
بر بابا دوستی اولسه ایدی ، بنده وقتیه بر اییلکنی کورمش
بولنسه ایدم ؟ خاییر ... برکون توتون آلدی ، دوقوز غرو شلقدن ...
اوکوندن بری — تام برسنه در — کلیر ، اوطورور ، اوکسورور ،
توکورور ، سویله نیر وکیدر . اصل غریبی اوینه خرجی بنم
دکاندن ، بندن دکل ، یان سوقا قدم کی روم بقال دن دوزدر ! بوندن
طولایی اولاجق که داها بر دفعه اولسون آغزندن یاغ ، پرنج

وپیاسه لافی ایشیتمه دم ؛ صانکه بقال دکانده دکل قرأتخانه ده
ایمش کی هپ سیاستدن دم وورورو کوزینی چویروب ده چووالله
ورافله بر کره جک اولسون باقماز !

کستاخلغک ، اذعانسزلغک بوندن اعلاسی اولور می ؟
بر آرابه داها ... بوسفر اؤک بکی ، شکران بک کلدی .
او ، اويله هر چای کونی کج کلیر . مکرسه عادت بویله ایمش ؛
هانی ویرهسیه بندن جیغاره آلان شیق واردر ، او سویله دی .
چانی قادین ویررمش ، اوکلنر هپ اوکا کلیرلرمش ، ایسته دیکنی
چاغیررمش ، بک ساده سیرجی اولور ، ممکن مرتبه کجیکیر
و آغزینی آچوب سوزه قاریشماز !
هاه پیانو باشلادی .

باشلادی اما بنم دکانده ده مشتری ، آقشام مشتری قارنجه کی
قایناشمغه باشلادی ... بونه عجائب خلقدیر یاربی ، بوتون کون
اوطوروب بکلرلر ، صانکه آقشام اولیه جق ، لامبه لریانمیه جق
وییمک نیمیه جگمش کی ... صو کرا هوا قاراردیمی هپسنده بر
تلاش ... شیشه سنی قاپان دکانده : کیمی غاز یاغی ایستر ، کیمی
زیتون یاغی ! آرایه عیاشلرده قاریشیر ، اولرنده ایچن مزوی
ودردلی عیاشلر ... مثلاً ایشته شوذات : هر آقشام تام آلتیده
کلیر ، شیشه سنی اوزاتیر ، یاریم اوقه لغنی آلیر ، الیلکی ویرر و کیدر .
سوقاغه چیقدیغنی ، کیمسه ایله کوروشدیکنی کورن یوق ...
مکرسه اونکله ، راقی ایله یاشارمش . باشقه برشی ییز وایچمزمش .
روایته کوره تقاعد ایتدکری کون شويله بر حساب یامش :
— بر دفعه بکا کونده الی غروشدن بهمه حال آیده بیک

بشيوز غروش راقى پاراسى لازم ؛ بيك بشيوزده او كيراسى ...
 ايتدى اوتوز ليرا ... معاشم اوتوز اوچ ليرا طوتويور ، قالان
 اوچ ليراسى ده جيب خر جلغى ... بكا يه تيشير !
 ديمش ، بوتون ديكر مصارفى حذف ايتمش ، سس سز ، صidasز ،
 كندى حالنده ياشايوب كيديور . احوال بويله دوام ايدرسهدها
 نه چشيد ، نه عجائب آداملر ، نه غريب انسان نمونه لرى كوره جكر !
 دعوتلير چايدن چيقمغه باشلاديلر ؛ وقتم يوق كه سيرايديم ...
 بوياشدين صو كرا بقاللق ايتمك يه تيشميور مش كى برده روسجه
 اوكر نمكه باشلام . محله ده باش كيره جك نه قادارده ليك ده شيك ،
 اويوق وچوقور وارسه هپسنى روسلر كيرا ايله طوتديلر . باش
 مشتريلرم اونلر ... قادينى ، ار ككى دكاندن اكسيك اولمازلر .
 بچاره لك آليش ويريشى اويله درهملى ، اولچولى دكل كه ... مثلاً :
 — بش غروش ... وير ... شكر !

دييورلر ، هر نه آليرلر سه بش غروشدين يوقاريسته
 چيقه مييورلر : بش غروشلق چاي ، بش غروشلق فاصوليه ،
 بش غروشلق چاي ، بش غروشلق پينير ... طارتماسى وحسابى
 كوچ اوليور اما بنده ، هانى صانكيم اويله پك اينجه اله يوب
 صيق دوقوميورم ! باشى پوسته كى صايرىلى ، آياغى چيزمه لى ،
 صقاللى صاچليسى اولور سه ألم بر آز نقصاننه طارتييور ؛ فقط
 اوكا مقابل ، سروى انداملى وکل چهره ليسى اولديمى ، ترازينك
 درهم طرفى هواده قالييور !

نه ديهيم ، انسانلق بو ... الله تقصيراتمى عفو ايتسين !



اسکی رمضانلری یاد

— آغلا چشم ، آغلا ، دورما ... —

أوت ، بيلم بوشرقی پارچه سی ده نره دن ، ناصل ،
بردن بره عقلمه کلدی : « آغلا چشم ، آغلا ، دورما ! »
ساعتلر وارکه کندیمه حاکم اولامیه رق متصل اونی تکرار لیسور .
أوده هم آشاغی یوقاری دولاشیسور ، همده اونی میریلدانیسور .
آه ، اسکی رمضانلر ، چوجو قلغمک رمضانلری ! او زمان
رمضان قیشه ، قارلی ، بوزلی کونلره تصادف ایدردی ؛ کوز-
لریمی قاپایوب چوجو قلغمک رمضانلرینی دوشونمک ایسته دجه
ایلک اوکجه ، دائما شویله برمنظره کوردیم : قارا یلک صاووردیغی
پارچه لری آلتنده ، کیجه ، تراویحدن چیقان غمسلدی ، وقوقوله-
ته لی برسیاه جم غفیر ... یرلری خاشیرداتان بر آیاق سسی و آردی
آراسی کسيلمه یین اوکسور وکلر ! بو اولدجه قورقونچ واولدجه
هیبتلی منظره دن صو کرا یاواش یاواش رمضانک بوتون صفحه لری
خیالده جانلانمغه باشلار . اولا عرفه کوننی خاطرلارم ، ایوبی
وعائله مزارلرینی زیارته کیتدیکمز کونی ... اوده رمضان تمیزلکی
بیتوب کیلار یرلشدکن صو کرا احمام یاناردی ، رمضان حمامی ...
بو ، یکریمی درت ساعت ، کیجه لی کوندوزلی سورهر ، بوتون
أوک خلقی ، اوزاق ، یاقین اقربا ، حتی قومشولرده کیره ردی .
آرتق باشقه ایش قالمازدی . عرفه کونی ارککلر بر طرفدن ،

قادينلر اوبر طرفدن ، محقق ، حضرت خالدى زيارته كىتمك
 معتاددى . تربهدن اول مزارستانه اوغراردق ؛ ادرنه قايسىنى
 خارجنده عائله مزارلغى ... اويله خاطر لايورمكه يالكز باشمه
 اوراجنى ، الاآن ، بولمايه امكان يوقدر . بوسرسرى و مزار
 طاشى اورماننك قويتو ، اوغولتولو ، اوجرى بر كنارنده
 اعمار وتزيين كورمه مش يوصونلى قيرلر ... اوراده اوقور ،
 اوفلر ، يوره كمزده عىنى زمانده بر كه نيشلك وقسوت دويه رق ،
 غالبا وظيفه مزي ياقمقدن متولد بر فرح وئولومه يقين بولونمقدن
 متحصل بر ملال ، آهسته آهسته آرابه لريمزه بينردك . بونه
 بويوك ، نه اوجى بوجاغى بولونماز بر سروستاندى ... تا ايوبه
 قادار لوشلق ، اوغولتو ويالكزلق ايچنده ، قونوشمق جسارتى
 بوله ميه رق ، عادتا پر خشوع ، كليردك . اوراده بزي حيات
 يردن قارشيلار ، قوجاقلاردى : اويونجاغى دكانلرى ، شكر جيلر ،
 قهوه لر وديلنجى قافله لرى ... تربهنك آلولوسنه نه كوچلكله ،
 ايتيشه قاقيشه كيريليردى ... ايكنه آتسهك يره دوشمزدى ،
 فقط قومرولر ينه دولاشه جق ير بولور ، اوكون دارى ييمكدن
 قورصاقلرى هكبه كى شيشردى . خانملر تربيه كيرمزلردى ،
 ديشاريدى حاجت پنجره سنده اوقويوب كرى دونزلردى . اركلرله
 كيتديكم زمان تا كرموش ايشله مهلى صندوقه يه قادار ، پر حرمت
 و طاعات يورور ، ايكله ايكله ، حتى كوزيمزدن ياشلر كلهرك
 اللهه يالوارير ، شكر ايدىر و كرى كرى كيدىر ك ديشارى اويله
 چيقاردق . اوزمان صدقه صيراسى كلش اولور ، اطرافى
 پلاسپارملر كيمش قوجه قاريلر ، قادينلر وچو جوqlر صارار ،

هپسنة چيل غروشلر داغيليردى . انعام ساتان اختيار بر حاجى ،
تسييجى يه ودارى داغيتانلرده اوغرار ، اونلركده كوكلارنى
آليردق . صوكرا ، اون قاپانى جاده سندن ، جبالى يى ، بالاطى
كچهر ك بر اكلنجه لى غلبه لك يول باشلاردى . بن اك چوق
اوراده اكله نيردم : كوركلى يهوديلرو آتقىلى قىزلر سيرايدهر ك ...
كچن سنه ، اون يىلاق بر فاصله يى متعاقب ، عرفه كونى
ينه تربه خالدى زيارته كيتدم : اولى بوم بوشدى ، شادروانده
صولرك سسى وقوفوقلرده قومرولرك دم چكىشى ايشيديليور ،
قاپيده بر تك آرابه ، بنم آرابه م بكلييوردى . كوكلم حزن ايله ،
او كسوزلكله دولدى . بوقادار آز زمانده بونه بويوك تبدلى !
بز اورايه قار فيرطينه لرى ايچنده قوشار ، كيدررك ، شيمدى ،
بهار وكونش ايچنده بيله كلن يوقدى ! نه ديهيم : آغلاچشمم ،
آغلا ، دورما ! ...

رمضانك اون بشندن صوكرا ، يينه بويله ، بوتون او خلقنك
اهمال ايدهميه جكى بر زيارت داها واردى : خرقة شريف زيارتى .
بونك ايچونده ترميز حاضر لانيور ، يوله كوكلاريمز ذكر و عبادتله
طاشقين ، اويله چيقاردق ، فاتحى كچهر ك بعضى دار سوقاقلردن
دولانه دولانه نهايت بياض بر جامعك اوكنه واريردق . انسان
يىغينلرى آراسندن يول بولوب قاپى يه ياناشمق نه كوجا ايشدى ...
نهايت ، زور ، زار كيرر ، بم بياض حاصيرلى يوللردن يورويوب
يشيل آطلسدن بر مبارك بوخچه يه يوز ، كوز سورهر دك .
ديشاريده خلق قاينا شيردى ، فقط بو حجرده و او كامنتهى دهليزلره

اخروی برسکون حکم سوروردی . چیقارکن برمدت ، ینه
 کری کری یوروردک . ایشته اوزمان چوجو قلغمک اک هیجانلی
 بردمی باشلادی : اولوده اوزون اوزون پول شیشه لره دولدیرلمش
 رنکا رنک بویالی صولر ساتارلردی . بونلر نه ایدی ؟ معناسی ،
 خوشلغی نره سنده ایدی ؟ اونی الا آن بیلمیورم ، تخمین ایده-
 میورم . غایت ابتدائی برنوع اویونجاق ویا سوسدی ، فقط
 دورک بوتون چوجو قلی اوکنده دیکیلیر ، قالیر ، آلمانجه
 کیتمزدی . بکا :

— هایدی ، اوچ دانه سیچ باقالم ؟

دیرلردی . برمور ، برطورونجی ، برده صاری سه چردم ؟
 یول بکا اوزون کورونوردی ، آه ، بر آوه واروب اوینامغه
 باشلاسم ... فقط بوشیشه لک اوینامغه هیچ برمزیتی یوقدی .
 هان صولرینی موصولغه بوشالتیردم ، کری یه بنکلی ، دالغلی
 و آغز طرفی قیریق ثقیل ، یچیمسز جاملر قالیردی و آلمی ، بر
 یریمی کسمه سین دییه اونلری ده اوصولجه حق آلوب آتارلردی .
 فقط او بش ، اون دقیقه لق هیجان نه کوزل شیدی ویکی بر
 رمضان ، یکی بر خرقة شریف زیارتی بکا نه صبرسزلقله
 بکله تیردی !

کیم بیلیر ، شیمدی ، اوراسی ده نه بوم بوشدر ... بلکه
 او رنکلی شیشه لری یاپان و آلانده قالماشدر . آه ، نه دییه یم :
 آغلا چشمم ، آغلا دورما !

*

* *

رمضان ایچنده بنی بر دفعه سلیمانیه جامعنه تراویحه وقدر

كيجه سى ده آياصوفيه كوتورويورلردى. سليمانيه ... اونه اولو
 معبدى ، اونه جوهرلى بر مسلمان جماعتىدى ، مؤذنلردهكى
 اونه سىدى وخلق سجدىه واريركن اونه هيتلى بر غلغلايدى!
 سليمانيه جامعنده بر تراويح نمازى ... بونى آنادولينك هر رمضانده
 بيلمز ميسكز نه تحسره آكار ، آراردم ! اسكى استانبولك
 جامعلى ورمضانلرى .. بونى بيلن ، بونى طادان مسلمانلر
 ولايتلر ك رمضانلرى نه دار نه هيتسز ونه ششعشعسز بولورلر ...
 يا قدر كيجه سى آياصوفيه ! بوتون بزم اوده كيلر ، او كيجه ،
 كوكلكر آچيلوب اوستمز نورلر ياغديغنى كوره بيلمك ايچون
 پنجره اوكلرنده قرآن اوقورلر ، نماز قيلارلر ، تابصباح
 عبادت ايدرلردى . بزده آياصوفيه كيدرلك . بن مهاديا
 يانمده كيلر :

— تلى ديركه كيدىلم !

ديه يالواريردم ، اوت ، تلى ديرك بويله خاطر مده قالمش ،
 بر صوماكى ديركه كى كى ايچنده بر مجلا اويوق واردى ، اورايه ،
 ديزلر مدن طوتوب قالديرلر ، پارماغى صوقاردم . صوكرا
 برر برر ، هر كرسينك او كنده دوروب آياقده ديكلردك . بعضاً
 يانمده كيلر ، بويوكلرم ، يا قرآن اوقويان حافظك سسنى ، يا خود
 وعظ ايدن خواجه افندينك علمنى بكه نيرلر ، برر برر بولوب
 اوطورلردى . بنده ديز چوكردم . بو بيكلرجه خلق ، بو
 قوجه مان سستونلر ، بويوكسك قبه ، بوطوپ قنديلار ، بوكور
 سسلر بنم ميني ميني روحم وميني ميني جشم ايچون او قادار
 بويوك ، اوقادار آغير و مدهش كليردى كه عادتاً از يلد يكمى ،

بر قرىنجە كېي چىكەنەنوب بىتدىكىمى حس ايدر ، قورقار ،
صوقولور وبعضاده اويوردىم .

آه ، بويلە ، دين وعبادت ايچىندە ، غىنەلرە باغلى بويومك
نە خوشدر ... ناصل شەشەلى ماضىلر بىزى مملەكتەمىزە باغلار
وهرخاطره بر صىزى كېي يورەكمىزى ياقهرق وطن سەوگىسىنى
ودىن مەربوطىتىنى ايچىمىزە صاغلار ... حالبوكة ، آرتق بابار
ياورولرىنىڭ ئالدىن طوتوب سەلىمانىيە تىراۋىچە قدر كىچەسى
آيا صوفىيە كوتورمىيورلر ، دىنمىزك عظمتىنى كورپە دىنلەرە نقش
ايتيورلر . نە دىمەلى ؟ آغلا چىشم ، آغلا ، دورما !

رمضانده بر كىچەدە ، بى پىك سۈەن رىجالدىن بىرىنىڭ قوناغە
افطارە كوتورولردى ، طوپە بىش قالە قايدىن كىرردى ، دائىما
بويلە ، حسابلى كىلك عادتى . اوشاقلر ھان قوشوب بىزى
يوقارى قاتە چىقارلردى . خانە صاحى زىيارەتتىن مەنۇن اولوردى ،
فقط ، اوروج كىفى ، بومىسرتى بىلدىرمىز ، تشرىفاتلە ، رەسمىتەلە
آياغە قالقار :

— شويلە بويورىكز شويلە تشرىف ايدىكز ؟
دىيە باش كوشەدە يىر كوستىردى . ھەركىس تىسەيىچ چىكىردى ،
لاقىردى اولمازدى . اودادەكى ساعىتلر كى طىقىردىسى نە جانلى ، نە
قوتلى ايشىدىلردى .. دىركىن ، بىردىن ، جاملىرى زىنغىر داتەرق
طوپ پاڭلادى ، يەنە تشرىفاتلە يىمەكە اوطورولوردى . شوندىن ،
بوندىن قونوششورلردى ، فقط ھەنوز بىنلە حسبىحال و ملاطفە
صىراسى كىلردى . قەھۋەلر ايچىلر ، نمازلر قىلىنر ، تىكرار

قەۋەلر ايجىلير ، نمازلر قىلىنير ، تىكرار قەۋەلر كىتىرىلبر واوندىن
 صوكراده مسافرلر ك چوغى چكىلىردى . آرتق سالوندى دىرت ،
 بش ذات ، صىمى واسكى دوستلر قاليردى ، كلسىن بىللە محبت...
 غالبا كندىمە خاص ، خوش ونشئەلى بر طرز مساحبتم واردى كە
 هم او صاحى ، همده مسافرلىرى پك زىاده متلنذ اولورلردى .
 اوزماندىن شعره ، ادبىيـاته مراقم اولدىنى ايجون هپسى ده كاتب
 وعالم اولان بو آداملر بكا شعر اوقوتورلردى ، هپچ اونو تمام
 شناسىنىك بر توحىدى واردى ، تمامى خاطر مده قالماش اما
 ايجندهكى «... الامكاندر اولاماز» كەلەرىنى نەدەنسه دوغرو
 تلفظ ايدە مىزدىم وبونى هر تىكرار مده سامەين ذوقلرنىدن بايىلىرلردى .
 بو اثناده ساءت اوچى بولوردى ، تياترويه كىدىلىردى . بن
 اوزمانده ، جانىلر ايله دىدىشن معصوم روللار ينه عاشق دم !
 شىمدى نرده بويلە چو جوقلرلە حسبـحالدىن ذوق دويان
 ياشلىلر . . . ياشلىلر ك درد ، قساوت باشلرنىدن آشمش ، نە
 رمضانده ، نە بايرامده چكەلرىنى يىچاق آچيور . نە دىيەلم :
 آغلا چشمم ، آغلا ، دورما !

ايشته چو جوقلغىمك رمضانلرنىدن بويلە طبائلى وجانلى
 خاطرلر ذهنمده نقش اولوب قالمش ... يايىنە رمضان ايجنده
 صوكنە دوغرو ، البسه آلمغە كىدلىكى كون... يا بايرام صباحى ؟
 آه ، بونلرى بكا هپچ خاطرلا تىمايىكنز ؛ بن يىنە شىرقىمە دونەيم :
 — آغلا چشمم آغلا ، دورما ! ...

ضابطه خبرلری

بم فکر مجه غزته لرك اوقونمغه اك لايق ، اكلنديرمكه اك
مساعد ، تدقيق وتتبعه اك محتاج ، خلاصه اهميتي اك حائر قسمي
نه باش مقالهلري ، نه سياسي خبرلري ، نه حكايله لري ، نه ده
مزاحي پارچه لريدر . ضابطه وقوعاتي آلتنده هاني دردر ، بشر
سطرلق غايت بسيط ، غايت عادي كورونن بعض حوادثلر
وارددر قضا ، ضرب ، جرح ، منازعه ، سرقت ويانكسيجيلك
كي . . . ايشته بم ، مساعد زمان بولدجه كال جديت و كال
ذوقله اوقودىغم قسم بوقسمدر . بوقسم قوه خياليه سي وسعتلي
اولان آدملر ايچون بىتمز توكنمز بر دوشونجه زميني ، بر
حكايه كلياتي ، والحاصل مثلي بولماز بر مطالعه وتدقيق ساحه سيدر .
فجميع وكولونج بيك بر حكايه نك اوراده تخملى اكيلىدر ،
بوتخملى خيال كرك حرارت وايشيغيله بولوشونجه در حال تنبته
فيلزلنمكه ، چيچكلنمكه ، ميوه ويرمكه باشلارلر ، بر قوجه رومان
اولورلر . فقط ديديكم كي بونك ذوقنه وارا بيلمك ، بونتيجه بي
آله ايد بيلمك ايچون ساده حروفاتي دكل ، سطرلرك آراسنى ده
اوقويه بيلمك ، كوزيكرك او كنده تجسم ايتدير بيلمك ، بو
اقتدارى ، بو استعدادى ، بوفطرى خاصه بي حائر بولنق لازم
كلير . يوقسه سرك ايچون بوستونلرده ده دماغاً يملنه جك هيچ
بر غذا يوقدر . حالبوكه اوراده ، ضابطه خبرلري فصلانده

مملکتک طبایع و اخلاقی ، عادات و عنعناتی ، استعداد و درجه ذکاسنی ، خلاصه بوتون قیمت و ماهیتنی او کرمک قابلدرد . او فصل ، اُک سفلی احتراصلری ، اُک عادی احتیاجلری ، اُک بایاغی احتسـاسلری ، آبداللقلری ، شـناعتلری و مزیتلریله ، یعنی هر شیلریله بربرلرینی ایصیران ، اینجیتن ، ییین ، یاخودده، سون، قیصقانان ، بسلهین قوجه بر خلقک خلاصه حسابیه سیدر .

ضابطه خبرلری بو کیزلی گوشه لره چه وریش اولان بر فوطوغراف ما کنه سنک ضبط ایتدیکی جاملردر . بونلری دماغکزک قارانلق اوداسنده قوه خیالیه کزک بیاض لکننه صوقه رق فکری و ذهنی اجزالره ییقامق ، حاضر لاق و صوکراده بویولتمک اقتضا ایدر . ایشته بن غزته لرده کی کوچوک خبرلری بویله ، عملیه لردن کچیره رک دائما بویولتیر ، اویله اوقور ، اویله سیر ایدر و اوندن دولای غایتله شایان دقت ، شایان اهمیت اکنجه نی و استفاده لی بولورم . سزه ، ایسترسه کز ، بعضی مثاللرله بوادعامی اثبات ، بو ذوقی ایضاح ، بو طرزی تسلیم ایدهیم : بر هفته دن بری بیریکمش نه قادار غزته وارسه ، تورکجه ویا فرنکجه ، آلوب هله شو قارشیمه کچیکز ... برده جیغاره یاقیکز ، آرزو ایدرسه کز بر قهوه ده ایـمار لایلم ، ذهنکزی طوپلامش اولورسیکز ، اوندن صوکرالا علی التعمین بر غزته نک (ضابطه وقوعاتی) ویا (کوچوک خبرلر) ستوننه کوز کزدیره لم . حتی اُک اهمیت سزندن باشلایا بیلیرز :

« جام تمیزلرکن — قوز غنجقده مقیم تجاردن نسیم افندیـنک خدمتجیسی ره بدقا اولیـکی کون اوست قات جاملری تمیزلرکن

موازنه سنى غائب ايتش و سوقاغه دوشهرك وخيم صورتده
جريحه دار اولمشدر .

شىمدى سز بكا : « بونده شايان اهميت نه وار ، بونك
نه سى توسيع ، نه سى توضيح اولنابيلير ؟ » ديرسيكز . فقط ،
بكا كوره بونده ، بوهيچدن وقعه جقده ، شو قضاده بيله بر
تخيل زميني موجوددر . كوزيمك اوكنه اولاقوز غنجه قندهكى
بر موسوى اوينى كتييرم ، پاريل پاريل يانان قوجامان جاملرى ،
ينه پاريل پاريل قاماشان قاپي طوقاقلرى ، پنجره لر آردنده
اوطوران بوم بوروشوق صوراتلى كوركلى عجبوزه لرى و چيل
يوزلى ، اوموزلرى آتقىلى ، بويونلرى قورده لالى قيزيل قيزلريله ...
صباحلين اوده تميزلكه قرار ويرلشدر وره به قا ، اون اوچ ،
اون درت ياشنده بر چليمسز يتيم ، بر معتاد جاملرى پارلا تمغه
مأمور ايديلشدر . آه بوره به قانك حياتى ... دوروب ديككنمه
يوقدر ، ايكي عصرلق خراب اوى تاوانلرنندن بودرومنه قادار
تميزله ين ، ييمكى پيشيرن ، مسافرلره ليكور كتييرن ، چاشيرلرى
ييقايان ، اسكله دن پاكتلرى طاشيدان ، هپسى اودر . . ايشته
شىمدى ، آنده پاچاورالر ، آياقلرى چيپلاق ، ييرتيق بلوزينك
آلتندن وجودينك يرير بياضلقلرى كورونه رك پنجره يه طوتونمش ،
سوقاغه صارقيق چاليشيور ، ياشلى ماداما باشنده :

— برازدها يوقاري سنى ، ديسرر ، چرچوهنك كناريني ...

ره به قا يتشمكه چابالييور ، بر آياغنك اوزرنده ، صول

قوليله پروازه طوتنه رق اوزانييور ، اوزانييور ، و اوغالييور .

ماداما ايسه دائما مشتكى :

— اولمادى ، دىيور ، داها يوقارىسى !
 رەبەقا بر آزدها اوزانىيور ، بر غيرت دها كوسترييور ،
 تام اويره بزىنى اولاشديرر كن ، ناعلى اولويور ، اونى كندى ده
 آكلامىيور ، بردن وجودىنى بوشلقده اوچار بولويور و (پات!)
 ديهه بوزوق قالدیر ملره يام ياصى دوشويور . آرتق سزیهودی
 اولرنده فریادی ، تلاشی تخیل ایدیکز . بوتون او قاپیلری
 آچیلیيور وقادینلر باغریشه هایقیریشه سوقاقلره اوغرایور .
 پولیسلر ، دوقتورلر ، آغلاشمه ، مناقشه وبو هرج و مرج
 اورته سنده بر تسكره ، ایچنده رەبەقا ، قانلره بوغولمش ،
 صاپ صاری ، كیدیور ... بر تمیز جام اوغورنده ، بر تیتیز
 قادینه قربان !

ایکنجی بر فقره :

« ایچكى محبتى — طاطاولالى پترو دون غلطهده بر میخانهده
 آلقو وقسطى نامندهكى ایكى آرقداشیه زاقی ایچر كن تهوره
 كمش و آلقوی اوموزندن ، قسطی بی باجاغندن سوسطالی بر
 چاقی ایله جریحه دار ایتشدر . آلقونك یاراسی تهلكه لیدر . »
 بو ماجرا دخی در حال كوزیمك او كنده جانلانیور : اوج
 پالیقاریا بر برلینه یان سوقاقدە راست کلیویر مشلردر . « برر شیشه
 آتالم ! » تکیلیفه هانی او كنده بالق قزار تیلان لوش ، رطوبتلی ،
 دار وباصیق میخانهلر واردر ، اونلردن برینه دالمشلردر . پترو
 یاغلی صاچلری قیوریم قیوریم وصیر صیقلام طارانمش ، چوخه
 جاكتلی وچارپوق اوموزلی بر سرسری ، شیشه لرك بشنجیسنه
 دوغرو بسبتون چارپولمش ، یا وه نیزه لوس ، یاخود پاپولاس کی

براسمه آتمغه، طوتمغه، سوووب صایمغه باشلامشدر. اوبرلری
 معترضدر. ماصهیه یومروقلر وورولهرق، بارداتلر قیریلهرق
 مناقشه متادیا آرتقمده، آواز آواز هایقیریلقمدهدر. بو اوچ
 روم دهلیقانلیسنک پرچملری آلنلرینه دوکولهرك، اللری هواده
 دوکونهرك کفرلری جاملری زینغیرداتهرق مناقشه لرنندن فجیع
 وکولونج نه اوله بیلیرکه... دیرکن آلقو یرندن فیرلایور، قسطی
 اوکنه کچور ومیخانه جی قوشوب یتیشنجیه قدر بر :
 — بره آمانک قیدی بکا ...

فریادی، برقان فیسقیه سی ... صوکر افریادک ایکنجیسی..
 دهوریلن ماصه لر، قیریلان شیشه لر، برهجوم، « طوتیک ! »
 صدالری، هرکسک اوستندن آتلا یوب قاچان بر آدامله یره ییغیلان
 ایکی یارالی ! ضابطه سی، محکمه سی، حکمی وحبسی، تا ایکی
 سنه سورن وایکی سنه بواوچ آدامله اوچ محله وواوچ عائله یی
 دیدیشدیروب دووشدورن هیچ یوقدن بر وقعه !
 اوچنچی بر خبر :

« قیز طاشنده ساکنه زیبا خانمک یانغین یرندن کچرکن
 اوکنه چیقهرق اوزهرینه هجوم ایدن آقسرایلی عبدی ورجب
 دردست اولتمشلردر . »

بو قیز طاشی ساکنه لرنندن زیبا خانم اوتوزینی کچمش، درت
 بش قوجه دن بوشانمش، فقط جیوه لک یوروییشیله قالچهلرینک
 دولغو نلغنی محافظه ایتمش بر خاصبه در. اوزرنده سیاه غرون چارشاف،
 آیاغنده بیاض چوراب و صاری اسقارپین، یوزی بویالی وپچه سی اینیک
 محله قهوه سنک اوکندن کچدکجه عبدی ایله رجب برلرینه ایشمار ایتمشلر :

— ايلك قىجىسى ! بىزە آوورت زاوورت ايدىيور .
 دىيە قىزمىلردىر . اويلەيا قولتوقچىنىڭ اوغلنىە التفات، بونلرە
 حقارت ... نە حقى وار ؟ اوصولجە حق ىرلرندىن قالقوب تعقىبە
 باشلامىلردىر . زىبا خانم بو تاثيرندىن اىچىن اىچىن ممنون قىرىتە
 وكولە اوكدە يوروركن بونلردە كرىدە بىق بوكوب يانپورى
 يانپورى كليورلر . ايشتە بر دار سوقاق ، بر يقوش ، برسبىل
 اوندىن اوتەسى تا دەكيزە قادار يانغىن خرابەلرى ، همەدە تنهامى
 تنها .. عبدى سلاح دوشكونى ، بوينە آرقداشنى :

— شو قامايى ايكى كورەكنىڭ اورتەسنە ساپلايەيمى ؟
 دىيور ؛ اوبرى صلحپور :

— ھلە بر قونوشالم ، اويوشورز بىلكە ...
 فكرندە ... اوقدر ياقلاشديورلر كە يىقىق باجالرك آراسندە
 كلن روزكار دالغەلرى قادىنىڭ پلەرىنى ھوالاندىردىجە آرقە
 دوكمەلرى دوشوك قىرمىزى بلوزك آلتىدىن صرىتنىڭ بىناض
 پارچەلرىنى كورويورلر . دىركىن اوزاقدىن بر پوطورلى آدام
 كورونويور ، اوزاقلاشديورلر .. تىكرار كليورلر وبومىنوال ايلە
 داھا بر خىلى يورويورلر . كىمسە نە ياپەجىنى بىلميور . فقط
 آرتق خرابەلر بىتمىك اوزرە ... بو ، نە قادىنىڭ ، نەدەار كىكلرك
 ايشنىە كلير ، بردىن زىبا خانم دونويور :


— عىب دىكى سىزە ، مىلە دلىقانلىسى اولاجقىىكز ، بىندىن
 نە اىستىيورسىكز ؟

نەمى اىستىيورلر ؟ بر آغزقالا بالىغىدر كىدىيور ، قارشىلقلى
 تحقىرلر ، دھا صوكر صولت ، فرىاد ، امدادجىلر ، اھالى ،

پوليسلار ، قاراقوله مواصلت وسائره . . . بر اينجىر چكردەكى
 دولدورمىيان بو تعرضك محله يى اوچ آى آلت اوست ايدن بر
 تاثيرى ، بر ديدى قوديسى واردر !
 ديكر بر حوادلر :

« اميركانده مقيم آصف افندينك كريمه سى وصفيه خانم
 قومشوسى جودى بلكه ازدواجنه عائله سنك موافقت ايتمه مسندن
 متأثراً سرور ايچمك صورتيله اتخاره تعمدي ايتش ايسه ده
 وقتنده خبر آلىنه رق بر موت محققدن تخلص اولمشدر . »
 بودرت سـطـر لـق خبرك سز بوتون صفحاتى هله بر تخيل
 ايدك . . . وصفيه خانم ، سيم سياه كوزلى ، ايپ اينجه قاشلى
 صارى ، صولغون ، شاعره بر مكتب طلبه سى . . . هنوز اون
 دردنده ، فقط نه رومانلر اوقومامش ، نه شعر كتابلى از بر
 ايتامش كه . . . معيشتك دارلغى ، عائله نك حقيقتيسى ، او احتياجلر
 او مشكلات ، هيچ برى اومورنده دكل ، دكيزله حسب حاللر
 ايدىيور ، مهتاب ايله هم بزم ، قوروده چيچك طوپلايور .
 عاشقانه قارت پوستالار قوللكسيونى ياپيور . ايشته تام بو ائناده
 جودى بك قارشيسنه چيقييور . . . هنوز تحصيل ايله مشغول ،
 اوچ سنه صوكر اقايدان اوله جق ، او بحريه قالپاغى ، او كتن
 جاك و بول پانطالون دينج ، كوربوز اندامنه نه قادارده ياراشيور ،
 كونشده قيزارمش او طاتلى رنك ، او دهرين ، عالمانه باقىش ،
 اوجدى طورلر نه قادارده جاذبه لى و تاثيرلى . . . ايلك تصادفلر
 ايلك تبسملر ، قوروده ايلك تلاقى ، پوست رهستانت ايلك
 مکتوب ، بوتون بونلر ، بونلردهكى هيچان ! صوكر ا دو يو لما

کیفیتی ، غائله غوغالری ، آغلامه لر ، ممانعتلر ، تصاورلر ،
 تصمimler واک نهایت (آه !) لر ، (اوف !) لرله دولو صوک
 مکتوب ، زهر پاکتی ، او بر بارداق صو واک صو کراده صانجیلر
 قیورانه لر وئولومک صوئوق تماسلری ... هپسینی بر ذهنکزده
 بویولتیکز ، خلیجانه قاپیلماق ، آجیماق و آوونماق قابیلیدر ؟
 ایشته ظن ایدهرمکه ، بو برقاق مثال سزی کافی درجه ده
 ارشاد وایقاز ایده بیلمشدر ... بن ضابطه خبرلرینی بومه تود
 اوزهرینه اوقورم ویک متلزد ، پک مستفید اولورم ؛ سزده
 تجربه ایدیکز ، بو بادهوا خیال سینه ماسسندن هر حالده ممنون
 قالر سیکز !



دوغروسی هانکیسی ؟

دون صباح اویانجه قاپالی پانچورک آردنده کورپه برکونشک
ایچری دولق ایسترکی هر بولدیغی دهلیکدن اودانک قارانلقلرینه
کوموش بر بورغو اوزاتدیغی وهلزونلر یاپه رق کولکه لری دهلمکه
چالیشدیغی کوردیم . همان قوشدم ، بالقونک قاپیلرینی آچدم .
کوز قاماشدیریحی ، جوشغون و طاشقین بر آیدینلق درحال
هر طرفه صاریلدی و اوقادار فضله ، کسکین بر ایشیقله اودایی
واشیایی قاورادی که بر مدت اطرافمه هیچ برشی کورونمز
اولدی ؛ صانکه باشمک اوستنده براشتعال اولمشدی ، کوزلریمی
قاپادم سر سمله شهرک ، بولندیغم یرده ، حرکتسز بکله دم . صو کرا ،
یاواش یاواش ، کیرپیکلریمک کولکه لری آلتندن باقیندم : نه
شعشه لی بر بهار صباحیدی ، هم بوکون بهارک برنجی کونی ،
نوروز ایدی ، پاریل پاریل کونشی ، یم یشیل قیرلری ، دورغون
ده کیز ایله تام بر بهار صباحی ، تام بر نوروز ؛ فی الواقع کونش
او جوشغون ایشیقلرینه رغماً هنوز داها پک حرارتسز ، پک
نفوذ سزدی ؛ یشیللرکله قاروب طاشمغه باشلامش بر فیض
داها یوقدی و ده کیز پاریلتییسی آلتنده هنوز صوئوق دورویور ،
انسانه صولرینه یاقلاشمق احتیاجی ویرمیوردی ، فقط کوک
بولوطسز ، یرلر ویولار قورو ایدی ؛ قیشدن اثر قالماش ،
قیش صیریلوب کیتمشدی .

بالقونك سېرلرینه دایانوب ، شیمدی ، اوزون اوزون ،
کیفلی کیفلی بوبهار صباحنی سیر ایدیوردیم . کوزلرم ، نهدنسه ،
کیتدکجه ایلری یه ، کوردیکم یرلرک اوتتسنه ، آناطولی یه اوزانییور ،
خاطرمدە آنادولینک بهارلری جانلانییوردی . ذاتاً بهار سیاحت
وسیران دمیدر ؛ بن نه زمان بویله ، بر صباح بهارله قارشیلایشیر
وهواده بهاری بولورسەم در حال کوکلده بر یوجلیق آرزوسی
دویار ، اوزاقلره آتیلیمق وطبیعتە دالمق ایسترم . ایشته بوسوقله
آنادولی یوللرینی و آنادولینک بهارلرینی دوشوندم و کندیمی
بیلمه دیکم ، طانیما دیغم یابانجی دیارلرده ، کروانلره قاتیلیمش ،
اوزون اوزون کیدر تخیل ایدەرك بر ذوق ، بر تسلی بولدم .
بو اثناده دوشوندم که آنادولی الآن بزده تصویر ایدیله مەمش ،
آنادولی سیاسی جریانلردن اوزاق بر صنعتکار کوزی و صنعتکار
قلمیله حالا آکلاتیلامامش ، حالا آنادولی فکر و صنعت آداملرینه
جدی ، علمی بر موضوع تشکیل ایدە مەمشدر . عجیبا نه زمان
آنادولی سیاسی احتیاجلره کوره المزده ایستە دیکمز بیجمە
صوققدن واز کچه جکز ، اوکا قافامزه کوره معنی ویرمک عادتتی
بیرا قەرق بو اوز وطن دیارینی حقیقتە کی معناسیله دوس دوغرو
کوره جک و کیمسە یه یارانمق ایچون دکل ، بیلیمک و طانییق ایچون
تدقیق ایدە جکز ؟

زوواللی آنادولی ! سیاست ایجاب ایدیور ، بر طاقم نفوذلی
آداملر ایستتور دییه سنی مدح و ثنا مودا اولدی . سنی مدح
و تقدیر بو کون مسند و منصب مردیوه نی ... قصیده لر ، شعرلر ،
حکایه لر ، مقاله لر هپ سکا دائر ، سندن باحث ، سنک شان

وشرفك ايچون ... ذملرده بويلهيا ، بر فرقه نك سكا استنادى
 بر قسم خلقك سكا عليهدارلغنى ايجاب ايدييور ، خلاصه سن
 سياسى بر مقصد ، بر آلت اولدك ؛ اورتهده چه وريلوب ،
 چيكنه نوب دورويور ، آنجق سياسه سرمايه بحث ومقال
 اولويورسك ! عمرنده ايزميتى كچمه مش وقاواقلىرى آشامش
 نه شاعرلر توره دى كه بيك بر شعر يازهرق كويا سنى تصوير
 ايتديلر . . . كوى نامنه يقه جقلا آق بابادن باشقه سنى بيلمه ين
 نه ناثرلر چيقدى كه بيك بر حكايه يازهرق سنى بزه تفهيمه يلته نديلر ...
 باش مقاله لرده بويوك سياسى يلر يمز (آنادولى نك مقصدى) ،
 (آنادولى نه ايستر ؟) كى شاتافاتلى سرلوحه لر آلتنده ستون
 ستون بزه سندن بحث ايتديلر ؛ او سياسى يلر كه هنوز بروسه يه
 كيده مه مش ، يالوه يي كوره مه مشلر در . . . خلاصه بيلمينلر ،
 طانيانلر سندن او قدار چوق دم ووردى ، اويله مدحنده ويا
 ذمنده بولندى كه طانيانلر بيله شاشيردى ، شاشقينه دوندى .
 سن سياستك مغدورى اولدك !

اويازيلره باقه جق اولور سهق آنادولى يي كاه بر قورسيقه كى
 انتقام مملكتى فرض ايتك لازم : آنادوليلى ، آنده مارتين ،
 بسا پيشنده داغدن داغه قوشويور ومتريسلر قوروب قبيله قبيله
 ماليسورلر كى بر بيله جنك ايدييور . دره ايچارى نعلرله
 وداغ باشلىرى طابانجه سسلريله دولو ... حتى قادينلر بيله پر
 سلاح ، چيزمه لرى چكوب فشنگلرلى قوشانمش ، اركك
 قيلغنده كزييورلر و :

— انتقام ! انتقام !

دییە نەرە آتوب دیش غیجیرداتیورلر .
 ینه اویازیلرە کورە آنادولی گاه خیالی بر بلده کی چیچک
 وشعر مملکتی : یاز قیش وادیلرندە منکشلر آچیلیور ، کالر
 فیشقیریور ، یاسمنلر ولالهلر سرپیلیور وبونرک اورته سنده
 بول اطلس شالوارلی، دار ایپک یدکللی شوخ قیزلر، اوموزلرندە
 دستیلر وباشلرندە چلنکلر آهسته آهسته ، تورکیلر چاغیرەرق
 کزیورلر وچشمه باشلرندە دوروب یاووقلوریلە ساعتلرجه
 عشق وسودا حسب حاللری ایدیورلر . . . هواده کوکر جینلر
 اوچویور ، آچلردە بلبللر اوتویور، درەلردە غوغولریوزویور،
 دالره کله بکلر قونویور وبوعشق پرده سی اوکندن چیفتر چیفتر
 سوکیلر الہیلر او قویہرق وجد واشتیاق ایچندە کچوب
 اورمانلرە دالیور !

ینه او یازیلرە باقار سەق آنادولی قحط وغلا دیاری : بر
 دری ، بر کمیکدن عبارت قالمش قدید بر خلق، چیریل چیبلاق
 صحرالردە دولاشیور و آچ کولکلینی کمرەرک قووقلردە وحشی
 مخلوقات کی یاشیور ویول کنارلرندە آجلقدن دوشوب تولویور .
 اورادە نەر نشئەلی صحبت ، نەر شرقی ویا چالغی سسی ، نەر
 عشق وخولیا . . . دامارە سوروسورو بایقوشلر تونەمش لاینقطع
 توتویورلر وداغ تپہلرینە غاغہلری قانلی طوق قارتاللر قونمش ،
 متمادیاً کمیک وجسد چکیشدیریورلر . باشدن باشە فریاد ، نالہ
 وافغان !

حالبوکە ینه او یازیلردە او قویورز ، آنادولی بوللق، برکت
 وطوقلق مملکتی : باجار کیجہ کوندوز توتویور ، قازغانلر

و تاجرلر دائماً قاینایور، بقلوا، بورهك تپسیلری دیزلمش، هندی
 وقوزی دوله‌لری ییغیلمش، خلق سینیلر اطرافنده وقتنی طعام
 ایله، اطعام ایله شکمپورانه کچیریور و معدە سندن باشقه هیچ
 بر شی دوشورنمیور !

فقط بر باشقه قسم محررلر ایسه آنادولی یی علل واسقام
 قطعەسی عد ایدیورلر: صیتمەدن بکزلر صاپ صاری، دالاقلر
 شیش، کوزلر چوقورده، فرنکیدن برونلر دوشمش، ورمەدن
 جکرلر پارچه لاشمش، هر طرفده خسته‌لر ییغیلمش، ایکله‌مه‌لر،
 آهلامه‌لر، تابوتلر و مزارلر ... معاذاه آیغکی باصهك همان
 سن ده یاقالانوب هفته‌سنه یووارلانوب کیدیورسك !

اما بر باشقه نوع مقاله‌لره کوره آنادولی ذوق و صفا
 دیاری : عشرت تپسیلری قورولمش، مشعله‌لر یاشمش، اورته‌ده
 چنکیلر بر ته‌وییه زیل دووویور، بر ته‌وییه ایلچیلیور، اوینانیدیور،
 وورولانلر، ووروشانلر، خلاصه بر سفاهت، بر رذالت که
 مثلی کورولمه‌مش، شوق، ذوق، صفا واکنجه‌دن خلقت باشنی
 قالیرمغه وقتی یوق !

هانکیسی دوغرو؟ ایشك اصلی نه؟ هانکی برینه اینانالم؟
 ایچندن چیقیلیر ایش دکل که... ایشته شاعرلرله محررلرک مخیلاتی
 بودرجه بر برینه ضد ! سیاسیئریمزه کلنجه، اوده باشقه ییچیم :
 بر قسمنه نظراً آنادولی خلقی حربدن بیقمش، بزمش،
 صلحه، صلاحه جان آتیور، نه‌به‌اسنه اولور ایسه اولسون
 آنده‌کی سلاحي قیروب اوراغه صاریلقی، تارلاسنه، باغنه‌دونمك
 ایستیورمش، « الویرر عسکرلک، الویرر حرب و ضرب حکایه‌سی

وظفر نہائی ترانہ سی !.. « دیور و آنجق جبراً، قہراً جہہ لرہ
 کیدیورمش ... فقط بر قسم سیاسیلر ایسہ : خایر، دیورلر،
 آنادولی خلقی کوکرہ مش، کوپورمش برر آرسلان، (حرب
 ایستز ! جنک ایستز !) دیہ ہایقیریورلر و طاقم طاقم
 سلاخانہرق جہہ لرہ قوشویورلر . . . اوکلرینہ کچیورز،
 بیراقسہق ایرانی، تورانی چیکنہ یوب کچہ جکلر و « داہادہ
 وارمی؟ » دیہ سوراجقلر. قادینلربیلہ جنک عاشقی: صاحبزینی
 کسوب ارکک قیلغنہ کیریورلر و کوکللی یازیلوب اوک صفدہ
 حرب ایدیورلر . آنادولیدہ بر سس وار :

— یاشاسین حرب !

بونکدہ ہانکیسی دوغرو؟ ہانکیسنہ اینانمق لازم؟
 ییلن، آکلایان یوقکہ ... بر آنادولیدر طوتدورمیشز، فقط
 اصلی نہدر ہیچ بریمز فرقندہ دکلز. بر آغز غلبہ لکیدر
 کیدیور، کیمی فیض وبرکتندہ دم ووروپور، کیمی قحط
 وغلأسندن . . . کیمی ذوق و صفاسنی آکلاتیور، کیمی یأس
 وفلاکتی . . . کیمنہ نظراً بر کلستان، کیمنہ کورہ ایسہ
 سفالتکاه ... بری جنکاور مملکتی دیور، بر دیکری صلحپوران!
 اللهم ! بزى دوغروسنہ نہزمان آکاه ایدہ جکسک؟ بوسر
 نہزمان منکشف اولہ جق: یوقسہ آنادولیدہ بویلہ کورولتویہ می
 کیدہ جک؟



بر کوچوک فاجعه

کچن کون ، يولده کیدرکن ، زهرلنمش بر کوپکه راست
کلدم ؛ باجقلری کدریش ، وجودی قاص قاتی ، تویلری ئورپره
ئورپره جان چکیشدیور ، صوک نفسنی ویریوردی . بوتصادف
بکا سینوبده کچن بر مثال وقعهی ، آجیقلی بر کوپک ماجراسنی
خاطر لاتدی ؛ ایچم صیزی ایله دولدی . ذاتاً کوپکلره قارشى
برضعفم ، شدتلی بر مراق و محبتم واردر . یانمده انساندن زیاده
بر کوپک آرادینم و بر کوپک کوزندن ، انسان نظرلرندن فضله
محبت و تسلی بولدینم چوقدر . خسته ، سقط ، آج کوپکلره
دائماً یوره کم ئوزوله رک ، بویوک بر رقتله باقار ویانلرندن یاردیم
ایده مدیکمه مایوس ، کوزم آرقهده ، وجداناً معذب ، اويله ،
اذا ایچنده ، مرحمتدن طاشقین آیریلیرم . . . فقط هر سفیل
هر خسته و سقط آدام اوزرمدده عینی تاثیرى یاپماز ، مرحمت
ورقت دامارلریمی قبارتماز ؛ لاقید ، حتی بر آزده قیزغین کچوب
کیتدیکم چوقدر . بو محبتک اسبابنی آراشدیرمغه بيله لزوم حس
ایتم ؛ انسان بر سبيله می سوده ؛ بن حیواناتدن کوپکی ، چیچکلردن
قرنفیلی ، آغاجلردن کیرازی ، میوهلردن قاوونى ، قوشلردن
قومرویی ، اوتلردن یونجهیی ، بوجکلردن قرنجهی ، سبزهلردن
اسپناغی سوده رم . . . نه دن ؟ نه بيلهیم ، ایشته اويله ، فرقنده
اولیه رق سهویویرمشم ، بویه مقدرمشده اوندن ! مع مافیسه

انسان هر سو كېسنة مطلقا بر سبب بولاق لازمكلىرسه قولاي ...
 البته بر چيقار ، اويار جهتنى بولور . مثلا قرنفل ايچون قيور -
 يملرندهكى شوخلغى ، رايحه سندهكى بهارى ايلرى سوردر ؛
 كيراز آغاجنك دالارندهكى تناسبي وياپراقلرندهكى موزون وجانلى
 شكللى مدح ايدر ؛ قاوون قوقولى ، معدوى وهاضمدر دير ؛
 قومرونك قيريلوب دو كولهرك ، نازلى نازلى يورويشنة هفتون
 اولديغى سويلير ؛ يونجهنك قويو يشيلاكنى وقيور اقلغى سبب
 ترجيح اولهرق كورور ؛ قرنجيهي معاشرت وتشكيلات اعتباريله
 شايان تقدير بولور ؛ اسپناغكده يومر رطه ليسندهكى چاشنى ولذته
 بايلىديغى ادعا ايدر ، خلاصه بروياچوق اسباب بولور چيقارير .
 حالبوكه سز قرنفللى عادى كوره بيليرسيكز ؛ كيراز آغاجنك
 كولكه يانمادىغى ايلرى سوردرسيكز ؛ قاوون معدده بوزار ،
 قومرو چيىلاق قافاليدر ، يونجهسويمسزدر ، قرنجه خودبيندر ،
 اسپناق بوبرهكلره مضردر ديهه بيلير وعليهده داها بر چوقده
 دلائل ذكر ايدى بيليرسيكز . ايشته كوپك ايچونده بويلهدر ،
 بن مدحنده صحيفه لر يازا بيليرم ، سز ذمنده ستونلر دولدورا
 بيليرسيكز . بناءً عليه فرنكلرك ديدىكى كى « طبيعت ورنكلر
 مناقشه ايدلمز » ، بز وقعته كچهلم . فقط داها اول ، استطراد
 قيلندن شونى ده سويله يهيم : وقتيله اون سنه قادار اول ، بن
 بلديه باش كاتبل كننده ايكن بركون اودامه ملعون چهره لى بر آدم
 كيردى ؛ يوزنده او درجه ميمنتدن اثر يوق وناصيه سنده او
 قادار علويت وانسانلق مفقود ايدى كه بلاختيار پرمده دوكه
 قالد ، بيلديكم وتعريفنى ايشيتديكم نه قادار مضر ، قورقونج

و بخونخوار حیوانات وارسه بو آدم اونلردن داها آزیلی ، داها
 قان دوشکونی ، داها مخوف کورونیوردی . مکرسه استانبول
 کوپکارینی اتلافه مأمور ایمش ، دائره دن زهرلی اتلرینی ایسته مکه
 کلش ... آه ، اوزهرلی پارچه لردن برینی بن بو آدمه ناصل آجیمه دن ،
 صوئوق قانلیقله ، وجدانی بر وظیفه یاپار کی یوتدورابیلیردم !
 اوت ، سینوبده ایدک . کونک برنده منفیلر قافله سنک
 آراسنه برده کوپک قاریشیدی . قیزیل ، کور توپلی ، ذکی ،
 شاقراق ، سویملی بریاورو کوپک ... غالباً چوبان ایله سوراق
 قیرمه سی ، فقط بر نادره حسن ! داها ایلاک کونندن اويله
 یالتاقلاندی ، نشئه لندی ، صوقولغانلق و صمیمیت کوستردی .
 هر کسی کندیسنه بند ایتدی ، میک ، شکر ، اکمک خصوصنده
 هیچ بر نقصانی یوقدی و اوقشامه ، ئوپمه ، خوپلامه ، صاريله ،
 دولاشمه کی محبت جهتندن ده هر درلوسنه مظهردی . ایش سز ،
 کوجسز بو بر قافله آدم اونک پیشنده دولاشیور ، واونکله
 کوکلنی اکلندیریور ، اوزون ، صیقیجی منفا ساعتلرینی اونک
 ماسنارالقلری و یالتاقلانمه لریله چار چاپوق ، فرقنده اولمیه رق
 ممنون کجیریوردی . کوپک بر آیده قاپلانده دوندی ؛ اويله یدیرمشلر ،
 اويله بسله یوب باقمشلردی . هر پنجه سی بر قالدیرم طاشنی دولدورو-
 یوردی ، قیپ قیزیل ، پارلاق و قیویریم توپلی بر ایری یله ایله
 سوسلو اولان بونی نه قادار قوتلی و باشی نه ایری ، نه مهیب
 دورویوردی . قارشیدن بردن بره چیقینجه قلبه دورغونلق
 وعقله زیان ویرمه مسنه امکان یوقدی . محقق که هر باقیشنده انسانک
 بر قولنی ویا بر باجاغنی چکوب قوپارا بیلیردی ... فقط اودرجه

مونسی دی که شاقه و لطیفه دن باشقه برشی بیلمیوردی و او قادار
 انسان حمایه سنده یاشامغه آلیشقیندی که هنوز غوغا و ایسیرما
 نهدر ، سیفتاح ایتمه مشدی . قور کی پارلاق آلتون رنکلی
 کوزلری دها چو جوق ، یاورو کوزیدی . درین بر محبت و امنیتله
 مسعود و منتدار منفیلره باقیشی واردی . او یالکز بر کیشینک
 مالی دکلدی ، هرکسک متساویاً سومکه ، باقغه ، اکلنمکه و کز-
 مکه حق اولویوردی و قرق کیشی ایجابنده اونی حمایه ، و مدافعه
 و محافظه ایچون بیرلشه بیلمیوردی . قهوه لر هپ اونک مدحیه
 دولمش ، شهرتی قصبه یی طوتمشدی .

ایشته بواشناده سینوب بلدییه سی ده سوقاق کوپکلرینی اتلافه
 قرار ویرمشدی . بو خبر کوپکی سوه نلر و تصاحب ایدنلر آرا-
 سنده مدهش ، آلیم برهیجانی موجب اولدی . در حال حیوانک
 بویننه بر طاسمه طاقدیلر و صاغلام برزنجیرله کوتوروب اونی
 قایقخانه لر دن برینه باغلادیلر . عینی زمانده درت کیشیلک بر
 هیئت ده بلدییه رئیسینی زیارت ایدهرک کوپکلرینه دو قر نلما سی
 حقنده رجاده بولندی ، اتلافه مأمور اولان قبطی یه ده صیقی
 صیقی تنبیه ایتدیلر :

— بریا ککشلق یاپارسه ک کوزیکی پاطلاتیرز ها ! دیدیلر .
 هر طرفدن وعدلر و تأمینات آلدقدن صو کرا آرتق کوپکی
 اشکنجه یه سوقمده معنی یوقدی . کیدوب قویویردیلر . اوج
 کوندر باغنی اولان حیوان بر دلی کی قایقخانه دن فیرلادی ،
 اولا اوزون ، اوزون ، باشنی آلا بیلدیکنه قوشدی ، صو کرا
 دوندی ، ها اولادی ، زیبالادی ، سور توندی ، یالتاقلاندی ،

بويوك برنشئە كوستردى. حيات اسكيسى كېيىك درلو شطارتلە
تكرار باشلامشىدى. فقط اطرافدە هر كرن كوپك لاشەلرى
طوپلانىيوردى. (قاپلان) بوتون ذكا وفراستنە رغما، باشنك
اوزرنده دولاشان وهم جنسلرینی یرە سرن فلاكتدن بی خبر
كورونویور، یاتان ئولولرى قوقلایوب كچیور، اكلنجەسنە
دوام ایدیوردی.

بركون قصبە یە بریكى ژاندارمە ملازمی كلدی. قارا، قوری،
دیك بیق، ال آینه سی مراقلیسی، سویمسز بر آدمدی.
صاچلرینی صیریل صیقلام ایصلاتیر، تازە تازە طارار، بیقلرینی
قوزماتیقلە یاغلایوب منكنە ایله قالبە صوقار، زماننی یانیق
چهرەسنە وقاوروق بدنە چكى دوزەن ویرمكلە كچیریر؛ خلاصە
هم منفیلرك، هم یرلی اھالینك كوزینە باتاردی. كرنده درت
دفعە، صباحلری دائرەسنە كیدركن، اوكلەین دونركن، اوكلەدن
صوكراینە كیدوب آقشاملین ینە عودت ایدركن بزم قھوہلرك
اوكندن كچردی. فقط نہ كچیش یاربى؟ منفیلرە بالخاصە عظمت
صاتمق ایچون اویلە برقورولور، دیم ديك، سرت وخشین بر
وضعیت آلیردی كە باشدن آیاغە قادار بستیون عجائب، ماسقارا
قوقلا برشی اولوردی. بزاونی، هب بردن كوزلریمزی كوز-
لرینە دیکرك مخصوص سیر ایدردك. بو قادار خصم كوزلرك
انعطافی اونى شاشیرتیر، آیاقلرینی بربرینە دولاشدیرر، ايكیدە
بر سندهلەتیردی. بونی بیلن وبزم خوشونتیزی سەزەن (قاپلان) دە
او، داھا اوزاقدن كورونوركن یرندن فیرلار، صاتاشمغە
باشلاردی. ایللك كونی كوپك كور سسیلە بردن هایقیروب

اوزرينه آتيلديغى زمان ژاندارمه ضابطى قورقوسندن آزداها
 دوشوب ئوله جكدى . صوكرالى آليشدى ، بيليوردى كه
 ايسيرميوردى . فقط اوني منفيلر اوكنده كولونج ايدىوردى يا..
 هر دفعه سنده قامچىسنى قالديرمه (خوشت !) ديه باغيرمه
 مدافعه وضعيتى آلمه مجبور اوليوردى . كونده درت كره
 قهوه لرك اوكنده بويله بر سير واردى .

— هله ياپسين ... دووهرز ، وورورز !

ديه هايقيريشديلر . اچلرندن بر عقلليسى ؟

— داها ايسى كوپككزى او كچر كن بوش بىراقمايكنز !
 ديدى . ديدى اما بوتديره رعيتده كچ قالمشق . ايرتسى
 كوني ، ايكندى اوزهردى ، هر كس قهوه لرك اوكنه ديزيلمش ،
 بر آز سرينلك آليوردى ، (قايلان) اوزاقدن كوروندى .
 قوشدى ، آياقلىمزه سورتوندى ، ديزلريمزه چيقدى ، صيچرادى
 هاولادى ، بزي ، بر معتاد ، اكلنديرمكه باشلادى . صوك
 كونلرده بسبتون ايريله شمش ، آرسلا نلا شمش ، مثلى كورولمه مش
 بر كوزمللك آلمشدى . او قوجامان ، مهيب باشك اوستنده
 بومعصوم ، نشئه لى و كيفلى ياورو كوزلرى نه لطيف دورويوردى !..
 بردن (قايلان) صارصيلدى ، ايرى ، دهرين بر نفس
 آلدى وهيمزك يوزينه قورقو واضطرابله دولو بر نظرله اوزون
 اوزون باقدى . بو كوزلر كيتدكجه فرسزله شيوردى ووجود
 ئورپرمله لرله صارصيلور ، كريليور وچارپيليوردى . هپ بردن
 باغيريشق :

— زهرله مشلر !

اوت زەرلەمشلردى . (قاپلان) بدنك بوتون قدوتيله
 ئولومە مقاومە ايتىمكە چابالييور ، آرامزدن ، بوكيفلى حياتدن
 آيرىلماق ايچون قالمىغە ، ديزلر يىزمە ياقلاشمىغە اوغراشييور ،
 فقط موفق اولەمىهرق دوشوييور ، دەرەشييور و كيتىدكە سونوييور
 ييتيوردى اجل ايله تام اون دقيقە ديديشدى . عمرينك ايلك
 وتك مجادلەسى بو اولمشدى . صوك نفسى ويردكن صوكرا
 هيمز باشى اوجندن صاپ صارى قالدق . ايچمز حزن ايله
 دولو ايدى . تام بواشناده ژاندارمە ملازمى كوشەدن كوروندى .
 آرتق (قاپلان) اونى تعجيز ايدەمزدى ، انتقامنى آلمش اولمقدن
 متولد بر فضلە وقار ايله ، قامچىسىنى صاللايه صاللايه واورتەدە
 ياتان جسده باقهرق اوكمزدن متبسم ، كچدى ، كيتدى .
 كيمسە يرنەن قىمىلدامادى ، كيمسە (قاپلان) ك هينجنى
 آلمق ايچون اوكا ايكي سەلە عشق ايدەمەدى وبو خيانتدە
 - - بر چوق جنايتلر كى - جزاسز ، مقابلەسز قالدى .



صحتہ دائر

اولماید دولت جهانده بر نفس صحت کبی
سایمان قانونی

صباحلین اویاندیکزمی بول صو ایله ا کسه کزدن باشلایه رق
تا کو کسکزه قادار ئور پر مه دن ، ئوشومه دن شاقیر شاقیر ییقانه
بیلدیککز کون صحتکز یرنده دیمکدر . بن نفسمده بویله تجربه
ایتدم . صوئوق صو آنجق صحتده بولنان وجودلری اینجیتمز .
حالبوکه بر آز قیریقلیغکز ، کسیکلک وصیزیکز وارسه بر دامله
صوئوق صو ده ریکزک اوزهرینه دوشر دوشمز بر کسکین
ئورپرتی ، بوغاز ایچنده کی آنافورلری ، صاغناقلری خاطر لاتان
بر روزکار سرپینتییسی کبی ، بلیکزدن دوغرو قویار ، آنواحدده
هر طرفکزی قاپلار ، یوره ککز قادار ایشلر ، کیمکاریکزی بیله
ئوشوتور ، تتره تیر وصیزلاتیر ... اوزمان ایچکز قاتیله رق ، حتی
درجه سنه کوره دیشلریکز زانغیردایه رق دوزر و یاتاغیکزه
کیررسیکز . خسته لغک باشلانغیجی اکثریا بویله ، بر دامله صوئوق
صویک تماشیه میدانه چیقار و خسته لق صوئوق صوایله صباحلین
شاقیر شاقیر ییقانه بیله جککز کونه قادار دوام ایدر !

صحتده بر آدم یاتاغه قارشى دائماً نانسکور و قیمت ناشناسدر .
اویانیر اویانماز فیرلار . آرقه سنه دونوب باقماز بیله اوداسنده
یاری چیبلاق پرواسر دولاشیر ، پنجره یی آچار ، جریانلره
کوکسنى ویرر ، نشئه ایچنده در ، تورکی سویلرویا ایسلامیق چالار ،

جىغاره جىغاره اوستنه ياقار ، صولر ايچىندە چىرىپىنير ، ايسالانير
 وصحتدن ايلرى كىله بر وقار بر حاكىتله ، دنيايه لاقيد ، يوكسككن
 باقهرق ، متعظم سوقاغه چىقار ، حالبوكه صحتىز بر آدم غايت
 كوچ اويانير ، كوز قاپاقلرىنى زور آچار ؛ باقاركه دامارلرىنىڭ
 ايچىندە بر صىجاقلىق ، باشىندە بر آغىرلىق ، آغزىندە بر چاشنىسىزلىك
 واردر ؛ كىرىنير ، دونر ، ئورتونور ووايىستە كىز ، اشتهاىىز قالقار ،
 آرقەسنە بر خرقة آلير صودن ئورپىر ، روزكاردن ئوشور ،
 جانى جىغاره اىستەمز ، قونوشمىقدن بىزكىنلىك دويار ، كوزى
 ياتاقىدەدر ، آرقەسنە باقە باقە ، ياصدىغە ويورغانە متحسەر ، باشى
 اكىك ، وجودى قىصىق سوقاغه زورلە چىقار . بويلە خستە
 خستە بوتون بر كونى كچىر مكه چالیشان بر آدم نىهايت آكلاركه
 مقاومت امكانسىزدر ؛ آتش بدنى صارىيور وئوشومەلر جلدىنى
 دولاشىيور ، كوزلرى جام كى پارلايهرق ، يوزى بياض ، دوداقلرى
 بەلەرمش قاتىلە قاتىلە دونر . بوتون املى ياتاغنە قاووشىمىق ،
 كىندىسىنى ياتاقىدە بولمىقدىر . اورايە انسان بر تىختە چىقە جقمش كى
 طاتلى بر خىلجان ايله قوشار ، باشى ياصدىغە بر تاج كىييورمىش
 كى تەسالىكه اوزاتىر وكوزلرىنى ، سەنەلرجه عشقىلە ياندىغى بر
 مەبەسنىڭ كوكسەنە دايار كى غشى اولەرق قاپار .

بر خستە ايچون ياتاقىدن معزز ، ياتاقىدن قدسى ياتاق قادار
 محبوب نە واردر ؟ خستە ثروتلى ايتىر ، دفينەلرى چەلر ،
 سوكىلىلرىنى كچر ، ياتاغنە اويلە قوشار ! خستەيە ياتاقىدن دەا
 جاذب هېچ برشى يوقدر : ايكى شىلتە وبرىورغان خستەيە علامت

سلطنت واستقلال اولان توغ و طبلدن داها دلپسند کورونور
ودها قیمتدار کلیر !

بر زنکین فرض ایده لم که ، اوی خالیارله قاپلی ، آویزدرله
سوسلو ، کوموش طاقمار و ماهون اشیالارله دولودر . قیشین
هر طرف ایلقدرد و یازین سرین . . . مو طباغنده ات صولری
قاینار و مخزننده شرابلر بکلر ، چفتلکلردن تره یاغلری کلیر
و کومسلارنده هندیلر بسله نیر پاراسی جاننک هر ایسته دیکنی
آلمغه و کیفینه کیدن هرایشی یامغه مساعددر . نه بکنسه یتیک
نه دن خوشلانسه کییمکه قدرتی واردر . عمری سیرانله ، ضیافت
وسازله ، طيقه باصه ییهرک وقانه قانه ایچهرک کچه بیلیر . . .
فقط معدده سنده بر آغری اولماسه ! اوت بر عجائب آغری ،
زمان زمان طوتویور و اوکا یاصدیقلری ایسیرتیور . . . صانکه
ایچنده آج ، آزغین بر کوپک وار ، باغیر صاقلرینی دیدیکلییور ،
یاخود معدده سنده بر تمساح یا وروسی یاشییور ، اتلرینی دیشلییور !
بوتون یتیکلر ممنوع : سوت ایچهرک ، یغورت بیه حک و آرا
صیرا ، نادراً بر پورتقال و یا قیسی خوشاشی . . . ذاتاً ، ایسترسه
بر لقمه اکمک و یا بر پارچه ات ییسن . . . قارننک ایچنده کی
صانجی زنبهرکنه بو یابانجی ، ممنوع نسنه دوقونور دوقونماز
خسته در حال قیوریلغه ، قیورانمغه ، آجی آجی باغیرب ایکیم
ایکیم ایکله مکة محکومدر . کوزنده بر دیلیم بیاض ، صیجاق ،
تازه اکمک توتویور و یا صدیرمه اوزرینه قیریلش ایکی یومورطه یه
جان آتیور . فقط قابلی ؟ « آجیقدم ! » دیر دیمز خدمتیجی
بر کوموش قاشیقله بر بللور طاباق اوزاتیور : یغورت ! اونک

خیالنده ایسه شمدی بول جويزلی بر یصی قدائی وی تراتورلی
 بر میدیه قیزارتمه سی واردی ... بیچاره زنکی قیرلری کزرکن
 باقییوره رنجبرلر ایکی باش صوغان قیرمشلر ، طوزه بانهرق
 سیاه بر اکمه که قارنلرینی دویوریورلر ؛ ایمره نیور . صو کرا
 غلطه دن کچرکن کورو یوره کوشه یه مردار حریفک بری بر
 آیاقلی مانغال قویمش ، آوو جلرنده کوفته لر یاپیور و جیزیر داتهرق
 پیشیریور ؛ اوکاده ایمره نیور . اسکله یه چیقیور ، اشتهای
 قامچیلایان بر صیجاق اون ووصوصام قوقوسی ... فروندن یکی
 چیقمش ، کهوره ک ، تازه سمیتلر ؛ بوکاده ایمره نیور و اوینه
 قیزدیرلمش بر بوغا کی قوشویور : بر معتاد آز شکرلی سوتی
 بلور کاسه ده حرمتکارانه تقدیم ایدیورلر !

حالبو که محتده بر آدمی دوشونیکز : اوکله یه قادار آلد
 کسر ویا قلم ، قامچی ویا کهوره ک متادیاً چالیشمش ، یورولمش
 و آجیقمش ؛ شیمدی ییمکنک قارشیشینده ... معدده سیندن
 پرواسی یوق ، راقیسنی آتیور ، دولماسنی یوتویور ، پیلاوینی
 قاشیقلا یور واوزرینه ده بر بارداق دولوسی صوئوق صوی دوکه
 صاچه یووارلایور ، « اوح ! » ، طوق و ممنون ایشنه دونویور !
 وجود صحتده ایکن آغز چاشنیسیله بر بارداق صواچیه بیلیمک ...

بونه سعادت ، نه مظهریتدر ! بوندن بویوک دولت اولورمی ؟
 صو کرا بر زنکی دها فرض ایدلم : پاراسی او قادار بول ،
 چوق و دواملی که دنیا نیک هر کوزل بلده سینده بر قصری و هر
 قصرنده دائماً حاضر بر خدمه بلوکی موجود ... ایسترسه بو
 قیشی نیسده ، که جاک قیشی مصرده ودها صو کرا کنی سیلانده ،

تو کیوده ، تمبقتوده کچیره بیلیر . یازین گاه بوغاز ایچنه کیده بیلیر ،
 گاه اسوه چک شمال ساحلارینه ، گاه فینلانیدیایه . . . حتی
 خوشلاننیورسه قاپلان آوینه هندستانه ، بالینا آوینه ایزلاندايه
 اوغرار ؛ نیاغارا شلاله سنی سیردن عودتده ووزو یانار داغنی
 کورور ونیل نه رینی مقایسه ایچون بالذات آمازونه کیدر . اونک
 ایچون دنیا کندی مالکانه سی وموسملر بازیچه سیدر ؛ کره نک
 بش قطعه سی بش چفتلک کیدر که ایچنیده کی خلق رفاهنی تأمین
 و تماشاسنی تزیین ایچون باغچه لر طرح ایتشلر و اوتلار قورمشلردر .
 هپسنی دبدبه و داراته مستغرق ، عمری اولدجه کزه بیلیر ،
 هریرک آیری آیری ذوقنی چیقارابیلیر . . . فقط جکرنده او
 دلیک ویا یوره کنده او بره اولماسه !.. اوکا هر شهر ، هر هوا ،
 هر تبدل ممنوع : یوکسک بر داغ باشنده ویا آچاق بر اووا
 اورته سنده ساکن ، باغلی اقامته مجبور . . . اوتوموبیل یاساق :
 هیجان ویرر دییه . . . آت یاساق : یورار دییه . . . تره ن یاساق :
 دومان دییه . . . رقص ایده مز ، آوه چیقماز ، کیجه کزه مز . . .
 یالکز ، آهسته آهسته ، یورولمه دن ، ترله مه دن یا یا یاریم ساعت
 دولاشه بیلیر ، عمرینی آچیق هواده ، بر سیدیره اوزانمش ،
 متمادیاً داغین ، ساکن کچیرمک ایجاب ایدر . هله بوتعلیماتک
 خارجه چیقسین ، ملعون درجه در حال یوکسه لیر ویا اوکسوروک
 صیزی ، تر ، عسرت تنفس همان باشلار . . . ایشته بو آدام
 ایچون ده مثلاً برده میرجی ، بر عمله ، بر جانباز نه جاذب ، نه غبطه یه
 شایان ، نه مکمل بر انسان نمونه سیدر . بوتون ثروتی فدایه
 حاضر در : او ده میرجی کی چکیج صالایه بیلیمک ، او عمله کی

طاش طاشیمق و او جانباز کی پرنده آتمق ایچون !
 حالبو که صحتده بر آدمی دوشونیکز: مردیونلره طیرماندیور،
 یاغمور آلتنده قوشویور، روز کارلره آتیلیور، ووروشویور،
 دوووشویور، دیدیشیور و صوکره یا تاغنه کیروب تابصباح
 ده لیکسز اویویور !

وجود صحتده ایکن آغریسز و صیزیسز براویقو چکمک...
 بونه سعادت، نه مظهریشر ! بوندن بویوک دولت اولور می ؟

بیر اقیکنز بویوک آتشی، مهلاک صانجیلی، عملیاتلی و التهابلی
 خسته لقلری، او قولرلری، او تیفلری، او قضا زده لری
 و مجروحلری... بر دیش آغریسنی، بر معده صانجیسنی،
 حتی، بر بولاتی و بر کوز قارارماسنی دوشونیکز، ناصل دنیا
 در حال قیمت و ذوقنی غائب ایدیورر، ناصل اک سودیککنز سزه یا بانجی،
 اک طانیدیگکنز مجهول، خلاصه هرشی، هر کس بی معنی و بی لزوم
 کور و نور... ناصل مسکینه شیر.. اوفالیر، عاجز و مغلوب اولیورر،
 ناصل بر چو چوغه بر او کسوزده و بر کوله یه دونر سیکنز ! اوزمان ایسترسه
 او ککزدده بر بوزلی شامپانیا شیشه سی و دیزیکزدده بر دنیا کوزده لی؛
 ایسترسه جیکزدده یوز بیک لیرالق بر چک و قارشیکزدده بر جواهر
 چکمه جه سی بولونسون کوزیکزه کور و نمز... اطرافکنز ده هرشی،
 رنک، حسن، ثروت، کیف، نه وارسه سیلینیر، سونر؛ بر
 طرزده، بر بیچمه، سویمسز بر شکله کیرر، چیرکین کور و نور...
 یالکنز بر دوشونجه کنز واردرکه بوتون دیکر فکرلریکزه
 و حسلریکزه حاکمدر: آغری بی دینش و بولاتی بی چمش کورمک؟
 دنیا ده اک زیاده مرحمه شایان آداملر خسته لردر، فقط

خسته لر ايچنده ده اك فضله رفته لايق بولد قلم بوتون عمرلرينى
 او كسوره آق صيره ، ايكله يه صيزلايه ، علاجلره باغلى و بطانيه لره
 كومولو ، خسته لقاكه چيرمه مجبور اولانلردر . كلوب كچي
 خسته لقلرك كنديلرينه مخصوص بر آجى ذوقى ، بر خوشجه جهتي ،
 نقاهتي و ياتداويسى ، بر كيڤى واردركه عمرنده بر ، ايكي كره باشندن
 صاومق پك او قادار فجيح دكلدر . يالكلز بعضى خسته لر طانيرم :
 هر زمان معدمى بوزوقدر ، باشى آغريز ، ديشى صيزلار ،
 قارنى سانجى لانير... بر آز اوشوسه او كسورور ، بر آز يوروسه
 ياتار ، بر آز يورولسه نوبتى طوتار ، ياغمورلى هوا دن نم قاپار ،
 كونشدين بونالير ، صوئوقدن قورقار ، صودن قاچار . قلى اي
 ايشله مز ، بوبره كي اي سوزمز ، جكرى اي چكمز ، ديشى
 اي او كوتمز ، معدمى اي اريتمز ، كوزى اي كورمز ، قولاغى
 اي ايشيتمز . . . خلاصه (اوح !) ديمز ، (آه !) دن
 قورتولماز ، ئولمز ، چكر ! ايشته دنياده كي فلاكتلرك اك بويوكى
 بودر . بويله بر آدام ايچون نه كونشك ايشيغندن كيڤله نمك ،
 نه روزكارك اوقشامه سندن حظ دويمق ، نه سازدن آ كلامق ،
 نه سوزدن خوشلانمق ، خلاصه ذوق نامنه نه وار ايسه ، كز مه
 قونوشمه ، يمه ، ايچمه ، اويومه ، سومه ، هيچ برندن
 استفاده ايتمه مك مقدردر !

صحتله ايچيلن بربارداق صو ، صحتله اويونان بر ساعت اويقو ،
 صحتله چكيلن بر نفس هوانه بويوك نعمتدر . بونلرك قدرينى
 انجق خسته اولانلر ، انجق خسته لق زماننده بيلير . . . هر عضوى
 انتظامله وظيفه سنى كورن صاغلام بر وجوددن بويوك دولت

اولاماز .. بو محقق! فقط دولت دیدیکلک ده هر شعبه سی انتظامه
ایشنی کورن صاغلام بر بنیه مالک اولمالیدر . یوقسه هر عضو
باشقه تلدن چالهرق حما آتشری ایچنده صایه قلايان و عملیات
ماصلرنده هر پارچه سی آیری آیری قوپاریلوب سقط و کوتوروم
یاشایان صحتسز دولترلک ده اويله پک دکری ، قیمتی یوقدر !
ها اوخسته وجود ، ها بوخسته دولت ! ایکیسنک ده دنیاده
نصیبی چکمک و باشقه لرینه دردینی ، چله سنی چکدیر مکدر !
مع مافیه کرک وجود ، کرک دولت خسته لغی ینه چکیلیر ...
پاراسزلقله بیرله شمه مک شرطیه ! پاراسز خسته نک حالنه داغلر
دایانماز !

شو غملی ، خسته لقلی ، پاراسز زمانده بونی نه بن سویله یم ،
نه سز دیکله ییک !
چکدیکمز کافی ... برده لافیه ئوزولمه یه لم !



ایکی اوغلک حکایه سی

کچنلرده ایلیق و کونشلی بر قیش کوننک لطافتندن استفاده
ایدهرک یورویہ یورویہ چاملیجه یه قادار چیقدم، خراب و حزین
کاشانه لر آراسنده غملی غملی دولاشدم، یوره کم شیشکین و کوزلرم
دومانلی، متأثرانه دونویوردم، بر چشمه باشنده اوطوروب
دیکله نن اختیار بر آدام بکا سلام ویردی :

— طانییه مادیکزمی؟ دیدی؟

باقدم : الی دکنکلی، ایکی بوکلوم، جنازه کی صاری
وجسد کی ضعیف بر فلا کتدیده ... بللی که چوق درد کورمش،
چوق اذا چکمش، متادی فلا کترلله، مصیتلرله دیدیشه دوووشه
بویله چوکمش، قدیده دونمش ... یوزنده معنی و حیاتدن نشان
قالماشدی له طانییا بیلهیم؟ ... فقط کوزلرینه باقنجه، ایری،
وقور ایکی کوز، درحال طانیدم :

— سز، بو حالده، بورالرده؟ دییه ککه لهدم .

— اوت، دیدی، بن، بو حالده و بورالرده !

اینانیلیر شی دکلدی، حیرتمدن دوکه قالدیم، بو ذات، دها
سکز اون سنه اول، دنیانک آدی، صانلی، شانلی، شهرتلی بر
زنکینی، بر اصیلزاده سی ایدی؛ اشقودرهدن ادرنه یه قادار روم
ایلیده حساب سز چفتلک لری، آنادولیده حدودی نامعلوم اراضیسی،

بصره ده خورمالقلری ، یافه ده پورتقالقلری ، طرابلسده کل
 باغچه لری ، یمنده قهوه لکلری ، خلاصه او چ قطعه ده هرچشیدن،
 منبت و محصولدار مالکانه لری ، بها بیچیلمز املاکی واردی .
 سکر ، اون سنه ایچنده بوقادار مال ناصل توکنمش ، بواراضی
 ناصل اولوبده آلدن چیقمش ، ناصل بر فلاکت بو عظیم ثروتی
 یوقلغه قلب ایتشدی ؟

— آکلاتایم ! دیدی .

بنده چشمه نك یقیق بر طاشنه اوطوردم ، اطراف تنها
 وحشی و حزیندی . او سویله دی ، بن دیکلدم و شو غریب
 ماجرای او کرندم .

— بن بوحاله ایکی اوغلمك یوزندن دوشدم ، بوفلا کتمه
 ایکی اوغلم سبب اولدی : برینك خویراتلخی ، او برینك اویوشوقلخی
 تام بر سنه اول ، بر مصیبتلی کونده ، اوزوربا و خاشاری اوغلان ،
 خالایقدن اولما کوچوکی ، روم ایلیده کی چفتلکلرنده محافط ،
 قوروجی ، دشتبان بکچی کی آلی سلاحلی نه قادار اوشاغم
 وارسه هپسینی قاندردی و باشلرینه کچوب بکا میدان اوقودی ،
 « یاشلیسك ، اداره ایده میورسك ، ایشلر تذبذب ایچنده ، سن
 چیکل ، اداره سنی بن درعه ده ایده میم و بر قازان دیغمز یردن
 بیک قازانایم ! » دیدی . اول موافقت ایتك ایسته مه دم ، زیرا
 اخلاقنه کووه نه میوردم ، فقط زورلادی ، تهدیده قادار واردی ،
 ناچار بویون ا کدم و اوکا وکالت ویردم .

ذاتاً بو چوجوق ، اك کوچوک یاشندن بری ظالم ، خویرات

واخلاقسزدی . ألنه بر چکیچ آلیر ، صوما کی ماصه لره ، بلور
 آویزه لره ، فغفور کاسه لره وورور ، بیک پارچه ایدر ، بوندن
 ذوق آلیردی . اوك کدیلمی ، آیاقلرینه طاش باغلا یوب ،
 حوضه آتار ، کوپکاری غازه بولار ، یاقار ، خلائق لک صاحلمی
 دیندن کسر ، اوشاق لک البسه لری ماقا صالار ، تول پرده لری
 قویاریر ، ماصه ئورتولری چکر ، جاملری طاشلار ، آینه لری
 قیرار ، خلاصه هر طرفی آلت اوست ایدردی . چکرک لری
 باجقلرندن طالمجه سنه آیریشنی ، کله بکاری آوو جنده مرحمتسزجه
 آزیشتی ، باغچه ده کی کوکر جین و طاووسلری تفنکله انصافسزجه سنه
 ووروشنی کوردکجه استقبالده نه اولاجغنی سه زمز دکلم . . .
 غوغادن ، دوووشدن بر دقیقه راحت دورمازدی ؛ طوتار قومشو
 چوجوقلرینه ، حتی اُک قوتلیرینه ، سیبسر صا تاشیر ، اونلرله
 غیرتلاق غیرتلاغه کلیر ، شورالری بورالری دالار ایصیرر ،
 فقط نتیجه ده تمیز بردایاق بیر ، اوه او یله دونر ، فقط او صلا نماز ،
 داهاقانلری قورومهدن ، بره لری ای اولمه دن ینه فیرلار ، تکرار
 هجومه قوشاردی ! .. عمرینی محله نك آزعین اوغلانلریله قایدیراق
 اویوننده ، اوزون اشکده ، قار طوپنده ، قیزاق اکلنجه سنده
 کچیرردی ؛ اوه کوچ صوقاردق !

او برینه ، بویوکنه کلنجه ، او کامل برچو جوقدی ،
 غوغادن ، نزاعدن حظ ایتمز ، طابانجه ، خنچر اویونلرینه
 یاناشماز ، خویراتلق لری سومزدی . کاتب ، چلبی ، حلیم ، عادتاً
 درویش مشرب بر طبیعتی واردی . اوته کی بلده پیدشتوو ، آیاقده
 چیزمه ، باشده قالپاق نعره آتوب قدح قیره رق سلاح چکوب

ميدان اوقويەرق دولاشدقچە عارندن يرلرە كچر ، فقط سوزىنى كچىرتەمز ، حتى اكثر يا اونك كوچوكنك داياغنى بىلەيىردى . آفاجان اوغلان زواللىيە نەلر چكدير موزدى ! بر آز تويىخنە ، تنقىدينە اوغرايىمى ، « آه قردشم ، آغابكجكم ! » كى طاتلى خطابلرلە سىنسى سىنسى ، اصول اصول ياننە صوقولور ، ئوپر كى ياپاركن بر يرنىن ايصيرر ، قاجاردى ؛ اوبرى ساختە دىللارە آلدانەرق وقوجە صقالنى دائما بو كوچوچك قوپىلك الئەويرەرك هر زمان آلدانير وهر زمان اونك اكلنجەسى اولوردى .

ايشتە كوچوكى بر كون كلدى كەنى قورقوتدى ، آغابكىسىنى يىلدىردى ، مەرى الئە آلدى واملاكمە حاكم اولدى اولانەقادار امكدار ، مجرب اداملرم وارسە ھېسنى برر بەھانە ايلە صاودى ، بوتون كەيالرى دەكەشەيدىردى ، يرلرينە برابر جە قايدىراق اوينايدىنى وكلاخان بىلك ايتدىكى صويسىزلىرى طوپلايىوب كتىردى ؛ قمار ، اچكى ، قادين بر طرفدن ، ظلم ، اشكەنجە ، سوء اداره دىكر طرفدن ، ايكى سەنەدە ايشلر چوربايە دوندى ، بر طاقم منازەلى اراضى قومشولرك الئە كچدى ، واردات آزالدى ، بركت بىتدى باقدم كەاولمىە جق ، برقاج آرنالود طوتوب زورلە الندىن مەرى آلدەم وبويوكنە ويردم . او عقللى ايدى ، فلاكتى كورويور ، بويلە خار كورلە كيدرسە آز زماندە ھېسنى المزدن چىقارە جغمزى ، سفالته دوشە جكمزى آكلايوردى . « نزاكتلە ، ھەركسە جىسن معاملە ايدە وقومشولرلە كوزل كچينە كچينە ، غوغاسز ، مارازاسز ، كمال احتياط ايلە حركت ايتىرسەك صوكى فلاكتدر ! » دىيوردى ، دىيوردى اما الندىن

ایش کلیور ، کوچوک قرده شيله او غراشامیور ، اونك خاشار یلقلری
ایله باشه چیقامیوردی . طاتلی دیلرینه آلدانه آلدانه ، نهایت ،
بر کون ، آندن مهری قایدی ، یوزینه کوزینه بولاشدی !
اصل فلاکت بوندن صوکر باشلادی . او خویرات ، ظالم
حریفله او غراشمق آرتق هانکیمزك حدیمزه ... قودوردی ،
قودوردی ، ضبط ایدلمز بر حاله کلدی ، اول ، قرده شنی چفتلکلردن
برینه حبس ایتدی ، بنی آوه طیقدی ، اوندن صوکر اووردی ،
قیردی ، دوودی ، سوکدی ، یاقدی ، ییقدی ، اراضیمك آلر ،
طوتار یرینی بیراقلادی ، رنجبرله ظلم ایتدی ، کویلیلری
آنغاریه ده چالشدی ، اشقیا ایله ووروشدی ، چفتلک بکلریله
نزاعلر چیقاردی ، محکمه لری تهیدیه واردی ، حاکملری تحقیر
ایتدی ، خلاصه جهانه میدان او قودی ، قمار ، قاری ، راقی
بر جهتدن ، صاتم ، یاقه ، ییقمه ، اوبر جهتدن دو قوز سنه ده
نه روم ایلنده بردام ، نه عربستانده بردان خورما ، نه عربستانده
بر دیکیلی آغاچ قالدی ، هپسی کیتدی ، کندی ده بر کون
دعوا جیلر آندن قاچوب بر طرفه سیندی . قاله قاله او ثروتدن
آنادولیده بش ، آلتی چفتلک قالمشدی .

نه نه یاپالم ، دیدک ، ینه آج قالمیز ، چیللاق قالمیز ، کیمسه یه
محتاج قالمیز ، کچنیر کیده رز ... بویوک مخدومی چاغیردم « آل
باقالم شو قالان پارچه یی اداره ایت ، کورهم سنی ! » دیدم .
آه ، نه یاپیم که ، دوشونجه سی تام ، فقط ایشکدارلنی نقصان
اولان بزم بویوک اوغل ینه صاف چیقدی ، ینه طاتلی دیله
آلداندی ، خاشاری اوغلانك بیراقدیغی بر چوجوق واردی ،

طبیعتی باباسی اخلاقده ، غوغا مراقلیسی ، سلاح عاشقلیسی ،
 خویرات و ظالم ، چویک و عقلسز ... ایشته اوکا امنیت ایدوب
 اراضیه نظارت ایت دییه چفتلکاره صلاحیتله کوندرمه دیمی ؟
 شیمدی اوراده وور پاطلا سین ، چال اوینا سین یاشیور ، برغوغا ،
 بر قیامت ، اطرافی قاصوب قاوورو یور ... امیدیمز اورادنده
 کسیددی ، بوراده ، اون پاراسز ، عاجز ، محتاج ، شاشقین
 سورونویور ، بویوک مخدومه ایکیمز باش باشه ویرمش برابرجه
 آه ایدوب ایکیلیورز !

ایشته ، عزیزم ، بنی بوایکی اوغلم بیتیردی ، او ثروتک
 دینه بو ایکیسی داری ا کدی ، بری خویراتلخی و خاشاریلغیله ،
 دیکری صافلخی و بجریکسز لکیله ... فقط کوچوکنی هیچ عفو
 ایتتم ... نه اولوردی ، اللهم ، باری بریسندن اولسون بر آزیحق
 یوزم کولسه یدی ، بوقادار غم یه مزدم ! ...



آه ، هانی او کونلر ؟ ...

چردن چوپدن مناقشه‌لر و صاحبه صاپان دیدی قودیلرله
حیات هیمزه عذاب اولیور . شو آردی آراسی کیلمه‌ین
مناقشه‌لر وشو بیتوب توکنمه‌ین اختلافلر ، فرقه و احتراض
جدالری آرتق آلورمه‌دیمی ؟ بعضاً نزاع و اختلافدن ، شخصیات
و مناقشاتدن اوقادار بیقییور ، اودرجه یورولویورم که ذهنمه
دورغونلق چوکیور ، دامارلریمه برکدوشه‌مه‌کییور ، یوردمک
قیزغین طاوایه آتیلش بر یاغ پارچه‌سی کی ایچمده قایه قایه
اریدیکنی ، دماغمک تلبنندن سوزله‌رک عصاره‌سی آلتش بر
آیوا پوصه‌سی کی قافامده چورویوب پورسودیکنی دریویور ،
حیاتی ساده ذوقسز ، شرفسز دکل ، عینی زمانده‌ده منفور
و مستکره بوله‌رق عادتا طاتلی جانمدن بزییور ، عزیز عمرمدن
ایکره‌نییورم . کندی کنده‌یه دییورم ، صورییورم که :

— جانم ، نهدر بو اون سنهدر قارشیلقلی هایقیرمه‌لر ،
صوکر قوشوب بوغوشمه‌لر ، بو نوبت نوبت ظلملر ، بوصیرا
صیرا سهپالر ، بووقت وقت فغانلر ، بواوزون اوزون ولوله‌لر ،
بو بوغاز بوغازه کلیشلر ، بو غیرتلاق غیرتلاغه آتیشلر ، بوزهر
صاچان سوزلر ، بوجان یاقان تعریضلر ، بواصلسز اتهاملر ، بو
اساسسز اسنادلر ، بوتون بونلر نهدر ؟ داهانه‌قادر سورده‌جک ؟
نه زمان بیته‌جک ، نه نتیجه ویره‌جک ؟ صوکی کلیه‌جک ، بزه

صلاح ، سکون میسر اولمیه جق ، شو دیار دده بر کون بان
دوکوب جان یاقه دن ، بوغوشمه دن ، ووروشمه دن ، سیاست
یاپمق ، فرقه جیلق ایتک ، غزته چیقارمق امکانی بولمیه جقمی ؟
آرتق یه تمه دیمی ؟

عجبا بزده ده بر کون کلوب مدنی بر فرقه حیاتی ، ئولومسز
سیاست ، اعدامسز اقبال ، زندانسز ادبار ممکن اوله جقمی ؟
ایشته بو جانلره جان قاتان ، یوره کلره فرح ویرن طاتلی
امید ، طاتلی احتمال اوزرینه شویله مخیل بر حیات تصور ایتدم ،
یو خیال ایله بر مدت آووندم ، اکلندم .
آه ، هانی اوکونلر ؟

لوندره قونفرانسک یوز کولدورن قرارلرندن صوکر
نصلسه ، نه دنسه ، معجزه ، الهام ، کرامت قیلندمی دییه می ،
اتحادجی ، ائتلافی ، بی طرف ، نه وارسه هیمزده بر دوغرو
دوشونوش ، بر منطقی محاکمه ، بر درایت ، بر مزیت حاصل
اولویور ... کابوسلی بر رؤیادن ، بر خشخاشلی اویقودن ، بر
افسونلی ماجرادن اویانیر کبی ، بویوسی چوزلمش ، سرخوشلغی
کچمش انسانلرده کنه بکزه یین بر اصابت نظرله اطراف مزه باقییور ،
یایدقلمزه شاشیریور ، کوردکلریمزدن ئورکویورز :

— ایواه ، دییورز ، بو ویران اولمش داملر ، بو کرپیچ
کشمش تارلالر ، بو صولری آقماز چشمه لر ، بو آیاقلری
طوتماز کوپرولر ، بودومانلری ، توتمز اوجاقلر ، بو قاپیلری
آچیلماز مسکنلر ، بو قدیده دونمش انسانلر ، بو سقط کنجیلر ،

بوصيصة چوجوقلر، بوعليل قيزلر، بوتون بوسفالت، بوخرابي،
 بو انقراض بزم اثيريمز، بزم معرفتمز، بزم جنايتيمزى ؟
 بزمى بويله اون سنه در اورته ده باباسى طوتمش زنجيلر كى
 صاچ صاچه، باش باشه چيرپيندق، سله طوقات، تكمه داياق
 چارپيشدق، مشعله او كده، بالطه الده، پيشتوو بلده ديار ديار
 كزدك، او ياقدق، اوجاق سوندوردك، خلاصه راحت نهدر
 بيلمهدك، خير نهدر ايشلهمهدك، فلاح نهدر طاتمادق، صلاح
 نهدر كورمه دك، نهايت بو آجيقلى، بوقورقونچ، بو پریشان
 خاله كلدك، بيتدك، خراب اولدق. بونلر نه نخوستلى كونلر مش،
 بز نه سرسام، نه مضر، نه آزيلى انسانلر مشز ! آرتق كافى...
 ماضينك تصحيحى، حالك اصلاحي زمانى كلدى، آل برلكيله،
 اك مدنى همجنسلر يئزى تقليدا چاليشالم، ضرر ستونى قاپاتالم،
 كار قسمنى آچالم، آدام كى ياشايالم !

بوفكر، بوقرار بوقناعت اوزرينه، ينه هر فرقه، هر جمعيت،
 هر فرد فوج فوج ميدانلرده طوپلانوب صارىلا قوقلاشه،
 اوپوشه قوجاقلاشه، بربرلرينه « قردهشم، برادر جانبرابرم،
 عزيز دوستم، محب محترم، مير مكرم ! » كى بغايت نازك،
 ظريف كبارالفاظ احتراميه ايله خطابلاشه خطابلاشه شويله بر
 تحليفنامه صورتى حاضرلارلر ويكان يكان، جان و كوكلدن،
 عزم و ايمان ايله امضالارلر :

(بعدما كيمسه يي قناعت سياسيه سى بنمكنه موافق دكلدر
 ديهه خائن وطن، جاسوس، صاتيلمش عد ايتيه جكمه،
 فرقه مى حميت اداره انحصار يه سى كى كورميه جكمه، اعدام

سپاسنه آل سورمیه جکمه و کوزمله باقیه جغمه و قراری امضا
ایتمه جکمه ؛ درایتمدن فضله ، اقتداریمک فوقنده ، عرفانله
غیرمتناسب مسندلری ولوکه صدارت ، نظارت ، سفارت ،
مرخصلق کبی بویوک ومهم ولو اماملق و مختارلق کبی اوفاق
و اهمیتسز ، هر نه اولورسه عهدمه آلمیه جغمه ، آلتک تریله
قازاندیغ پاران غیری جیمه وقورصاغمه هیچ بر کیلار وهیچ
بر الدن ، ولو بحریه آنباری ، اعاشه ده پوسی ، هلال احمر
آشخانه سی ، مرکز عمومی صندیغی ، تخصیصات مستوره فصلی
اولسون ، بر متالک و برلقمه صوقیه جغمه ؛ شاعر سه شاعر لکمی
بیله جکمه ، تجارته قالدیشمیه جغمه ؛ محرر سه یازیمله اوغراشا جغمه ،
پوسته جیلغه یلتمیه جکمه و پوسته موزعی ایسه ده صدارتی
کوزه کسیرمیه جکمه ؛ صلاح و سکونی سلاح وجداله ، سوزی
طوقاته ، اوقشامغی تکمه له مک ، سوقاقلره فنر آصغی میدانلره
آدام آصغه دائما ترجیح ایده جکمه ؛ سیاسی قباداییلقلردن
واز کچوب آرتق تهدید مکتوبلری یازمیه جغمه ، فدائیلک
طاسلامیه جغمه ؛ جاهلدن عرفان ، توره دیدن خدمت ، حیدوددن
حمیت و چته جیدن وفا بکله میه جکمه ؛ جبراً رای آلمیه جغمه ،
رای ویرمیه جکمه و حیللی انتخابلره مبعوث چیقمیه جغمه ؛
شوراده ، بوراده حکومت اویونی اوینامیه جغمه ؛ بویاجی
کویندن ایکیده بر قانون اساسیلر چیقارمیه جغمه ؛ کندمده
کیمسه دن فضله مزیت ، حمیت ، وطن پرورلک کورمیه جکمه
وهر نه خدمت ایدر سه م ایدیم قهرمانلق صفی طاقینمیه جغمه
یمین ایدرم)

بو تحلیفنامه یی متعاقب باقیووزکه بر ذاته صدارت توجیه
اولونویور ، فقط قبول ایتیمور :

— فلان پاشا بندن دها مقتدر ، شو زمانده دها ایا
خدمت ایدر ، بنم سیاسیاتده بهرم آزدر ، تجربه کم کوچوکدر ،
شیمدی یه قدار عالی خدماتده بولمده دم ، دوائر دولتک معاملاتنه
واقف دکم ، استرحام ایدرم ، اونی تعیین بویوریکز !
یکی صدر اعظم ایسه نظارت ایچون برچوقر جاله مراجعت ایدر ،
هربری بر سبب بولور :

— آمان افندم ، دیر ، عنایت ایدیکز بنده کز امور مالیه
ویا اوقاف ویا معارف ویا تجارت ، بونلره واقف دکم ، حتی بر
کون او یله برایش باشنه کله جکمی عقلمدن کچیرمده دم ، سعیم هبا
اولور ، وضعیتی تدقیق ایدنجیه قدار قیمتی کونلر کچوب کیدر ،
عجمید کلرم یوزندن ایشلر بوزولور ، محجوب اولورم ، قابینه کزکده
موقعی صار صیلیر ، خلاصه هیئته دخولم سزه ده ، مملکتده
مضرت ویرر . حالبوکه فلان بک سنه لردن بری کرک مأموراً ،
کرک مبعوثاً او نظارتک معاملاتنی تتبع ایتمش ، پروژهلر
حاضر لامشدر ، اونی دعوت و تعیین بویورسه کز بنده کزی
بالخاصه منتدار ایتمش اولورسیکز !

ایشته تعیینلر بو منوال اوزره کیدر . بری طرفدن فرقه لر
بیننده ایسه ، آراده کی اختلاف سیاسی یه رغماً ، بویوک بر مخادنت
حکم سورور . مثلاً ائتلاف فرقه سی رئیس افندی حضرتلری
اتحاد رئیس بک افندی ایله آرا صیرا بولوشورلر ، قول قوله

کزهر ، مبادلہء افکار ایدرلر ؛ بعضاً برچای ضیافتی ویریلیر ،
 هرایکی فرقه ارکانی طویللاشیرلر ، برابرجه ایچرلر ، ییرلر ،
 صحبت ایدرلر ، آل صیقہرق ، کولوشوب سوزلشہرک بربرلرندن
 قردہش کی ایستہمیہ ایستہمیہ آیریلیرلر . انتخابات مجادلای
 اثناسنندہ ایسہ اویله دایاق ، جبر ، رذالت خاطرہ کلز ، غایت
 ظریفانہ تلمیحلر ، پروغراملردہ کی موادک تنقیدلریلہ اکتفا
 اولونور ، اویله :

— حسن افندی اسکی دورده خفیہ ایدی ، بر
 زمان اتحادجی اولدی ، پارالر آشیردی ، صوکر ائتلافہ
 دوندی ، بیلیم کیمدن بشیوز ایرا آلدی ، ایچ ایتدی ،
 جاسوسدر ، صاتیلمشدر ، اوغلی ده اویلهدر ، قیزی ده بویلهدر ،
 قاریسی ده شویلهدر ، عائلهجه کوتودرلر !

کی بایاغی اسنادلر ، افترالر آغزه آلتق نرہده ، ذہندن
 کچمنز ... مبعوث کرسی یه چیقار :

— معارض محترمک بیان بویوردقلری افکارہ بندہ کز
 سرد ایدہ حکم شو اسبابدن دولای معالاسف اشتراک ایدہ -
 میورم . لطفاً استماع ایتدکدن صوکر امید ایدہرم کہ محترم
 معارضم بی بر درجه معذور کورورلر !

عیارندہ فوق العادہ جمیلہ کار بر مقدمہ ایلہ تنقیداتی یوروتور ،
 فرقہ سنک نقطہ نظرینی ترویجہ اوغراشیر . اویله « وورقافاسنہ !
 ایندیر آشاغی ! خفیہ حریف ! خیرسز کوپک ! » کی الفاظ
 غلیظہ دویولماز ، اسلوب ظریفانہ وحکیمانہ ایلہ فکرلر چارپیشیر

وبو نزاكتلى مصادمه دن قابل تطبيق بر چوق خىرلى قانونلر
دوغار !

رجال سياست داغه چيقمق ، تلغراف تللرينى كسمك ،
مأمور وورمق ، سها قورمق كى وسائط غيرمدنيه ايله مقصد-
لرينه واصل اولمقدن چكىنيرلر ، سلاحه قوت ، زوربالقاه خلقى
باشلرينه طوپلامقدن وقارشيلرنده اعدام قورقوسيله كلاه صاللا-
تمقدن آرتق ذوق دويمازلر . (ديل قيلينجدن كسكىندر ،
چكه او قشامق بويون وورمقدن مؤثردر ، هايقيمقله ايشيتد-
يررسك ، فقط سويله مكله آكلاتيرسك) كى يكى يكى دستورلر
فرقلر ك معيار فعاليتى اولور .

مثلا كله جك سنه بر بهار فرض ايدلم ، ماييسك برنجى كوني :
حكومت هر كيمك النده ايسه مملكتك طانمش سيمالرينه ، بلا
تفريق فرق ، قورولردن برنده ، بر قوزى ضياقتى ويرسيور ..
دورغون ، كونشلى بر اوكله وقتى ، اورمانك كولكلره بوغولو
برسرين ميدانلغنده كتن اورتولو ماصه لر قورولمش ، طوپراق
دهستيلرده صولر صوغومش ، نار كى قيزارمش اتلردن اشتها
آچيجى بردومان يوكسه ليور وتازه يپراقدن صاريلمش كهر بار
رنكلى دوله لردن برمايخوش فيليز قوقوسى كليور ... هر طرف
چيچكلره كومولى وهر كسك يوزى شن ... باقييورمكه مصطفى
كمال پاشا على كمال بكه برشى سويلييور وكولوشويورلر ، شهيندر
مسفور صبرى افندى ايله طاتلى بر مباحثهيه دالمش ، خالده خانم
افندى بكاء صوك يازيمدن طولاي بر التفات بويوروركن ، اوتهدن
كاظم قارا بكر پاشا :

— عزیزم رفیق بك ، شو طو زلخی ویرسه که ..
 دیوز ، صو کرا یاننده کی براسکی قوای ملیه علیهدارینه
 دونویور :

— بو کونلره ایردی کمزدن دولایی جمله مز شایان تبریکز !
 دییه رك اوکنه کلن قوزویي ممنون و پراشته بودندن آیریور .
 آه ، هانی او یله کونلر !



ياز حقنده

دون اوکله واپورندن کوپرويه چيقدیغم وقت باقدم که بو سنه
ایلاک دفعه اوله رق آسفالت قالدیریملر صیجاقدن یوموشامش ،
کونش سر سمله تیجی بر شعشعه ایله استانبولی آلتنه آلمش ،
هر طرف یانیور وهر کس از کین ...
ياز بردن بره کلیویر مشدی .

ایچمه بر فتور دوشدی ، دهرین بر تنبلک دويدم ،
ایسته دم که همان کلدیکم واپورله کری دونهیم و بوایلک صیجاق
کونی کندی اویمک اک سرین بر اوداسنده ، صویونمش ، هیچ
بر ایش یایمیه رق یاری دالغین ، کیفمده کچیرهیم . فقط قابل
دکلدی ... مطبعه یازیمی بکلیوردی ، شمدي بو طوتوشان
کوپرویی کیم بیلیر نه اذا ایله کچه جک ، آمین اوکنک غلبه لکنی
نه زحمتله یاره جق ، سیرکه جی جوارینک بقال وقصاب قوقان
جاده لرینی نه استکرا هله آشوب غزته یه نه یورغون ، نه اشتها سز
بر حالده کله جکدم . بکا :

— چابوق ، دییه جکلردی ، بر آن اول بیتیریکز !
وبن ماصیه اوطوره جق ، اوکه بر دسته کاغد آله جق ،
قلمی حقه مه باتیروب دوشونمکه ، بر زمین بولمغه چالیشا جقدم ...
یوشرائط آلتنده یازی یازمق نه مشکلدی ... ایچمدن :
— آه ، دییه جکدم ، بوکون یازیم اولماسه ایدی ، بسبتون

سربست بولنسه ايدم ، شيمدى پانجورلى قاپانمش اودامده ،
 ياتاغه اوزانمش ، كوندوز اويقوسنه وارمشم . ايش سز بر
 ادامك صيجاق بر كونده اوكله اويقوسنه وارماسندن كيفلى
 نه واردر ؟ ييمكك آغيرلغيله كوزلر قاپانير ، خارjedeكى سسلر
 كيتدكجه اوزاقلاشير ، اطرافى بردور غونلق ووجودى بررخاوت
 صارار ، بو اويقو عادتا آفيون تر كيباتندن بر علاجك تاثيرى
 كى غايت لذتلى ، خوليالرله دولو ، عىنى زمانده آغيردر ، فقط
 تسكين ايدىجى بر نفوذى واردر ، كوجلكله قنپه كزدن قالقار ،
 اودا كزه كچر وهمان دالارسىكز . سز بويله كمال رفاهله ديكله نير
 و اويوركن خلق ديشاريده ، استانبولك يانان سوقاقلرنده يورويوب
 ديديشمكه ، چاليشوب چابالامقله مشغولدر . دار وكيزلى يوللر
 حرارت وتعفن ايچنندهدر ، او خان اودالرى نه قدار قيزغين ،
 دائرلر نه درجه بونالتيچيدر ، البسنلر انسانى اويله ياقار وتر
 وجودى ايچين ايچين اويله اريتيركه . . . او ايچيلن صوئوق
 ليموناظه لردن و بربر اوستنه يوتولان دوندور مالردن هيچ بر فائده
 حاصل اولماز . ايچدكجه صوصار وييدكجه يانارسكز . اوت ، اك
 ايسى بوساعتده اويكزده و ياتاغكزده اولمقدر ، بر ساعت قدار
 اويودقدن صوكر ائتارى صيرتيكزده موصلوغك باشنه كچمك
 و بول بول چارپيشديره چارپيشديره ييقانوب اورادن كوپده
 صوغومش ويا طوپراق دستيده روزكاره قارشى ترله مش صويى
 يا مشربه ايله ويا دستى آغزندن كوكسكزه دوكه دوكه ايچمك ،
 دها صوكراده آچيق پنجرهيه قارشى اوطوروب بر جيغاره
 تلنديرمك ايشته ايكندى اوزرى ياپيلاجق ياز كيفى بونلردر .

بنم فکر محجه یازین راحت ایتمک ایچون ایکی درلو حیات
 کچیرمک لازم کلیر . بری غایت آلاتورقه بریالی حیاتی، دیکری
 غایت آلافرانغه بر اوتل حیاتی ... بونلرک اورتەسندە ذوقدن
 زیاده ادا، کیفدن. فضله مشقت واردر. مثلاً قاکلیجه، چوبوقلی
 ویا آنادولی حصاری ساحلارنده قوجامان، یاری ویران، چوق
 پنجره‌لی، کنیش صوفه‌لی، یاری اشیاسز بریالی ... بابادن قالمه
 درت بش دکان وکدک وارکه سزه آیده کچینه بیله جککز ایرادی
 تأمین ایدیور، هیچ بر ایشله مشغول اولمغه مجبور دکسکز،
 آلتی آی یاز عمریکز همان همان یاری چیلاق، بر انتاری وبر
 کوملکه، سدیرلره اوزانمش، فتورسز، زحمتسز کچیور.
 اختیار بر امکدار اوشاق اویکزک نواله‌سنی آلمغه، اختیار
 بر دادی یمککزی پیشیرمکه مأمور ... سز نه آلیشه، نه ویریشه
 قاریشیورسیکز، بوتون ساعتلیکز بوش اندیشه‌سز وکلفتسز ...
 هفته‌لر اولویورکه صیرتکزه بر جاکت و آياغکزه بر پانطالون
 کچیرمیورسیکز، ایکی یابانجی چهره کورمیورسیکز. صباحلری
 اویاندیکزمی بولندیغکز یردن، ده‌کیزه بر قامش اوزاتمق صو-
 رتیله بالق آونده کوکل آووتویورسیکز. استاقوز ایچون آتیلمش
 سیتلر معاینه اولونویور، یاخود باغچه‌ده کلر بوداندیور. صوکر
 صیجاق باصدیمی همان ایچری کیریورسیکز، آشاغیده کنیش
 مرمر طاشلغه بر ماصه قورولمش، تازە بالقلر طاوادن یکی چیقمش،
 رایحه‌سی جکرلریکزی دولدورویور. اشتها ایله یدیورسیکز.
 قهوه، جیغارا وایقو مقدمه‌سی ... شیمدی آرقه اوداده،
 کوناش کورمین طرفده‌سیکز، بوغازدن قوپان وده‌کیزلرده

سرینله نن بر روزکار یان پنجره دن ایچری کیریور و جیندلیک کیزی
 خفیف خفیف شیش-یریور ، ده لیکسز او یو یورس-یکز . بونی
 متعاقب قایق خانیه اینیور و ده کزه کیریورسیکز . دیشاریسی
 کونشلی و صیجاق ، فقط اوراسی لوش ، قویتو و سرین . . .
 برقهوه ، بر جیغارا دها ، آقشام سرینلکی باشلایور . ده کیز
 طرفنه کچیور و واپورلری ، قایق لری سیره باشلایورسیکز .
 کیجه ینه بویله ، عینی سدیرده ، عینی رخاوت ایچنده
 کچیور و باقیورس-یکز که او کون چوراب بیله کیمکه احتیاج
 حاصل اولماش ، وجودیکزدن هیچ بر عضو یورولمغه میدان
 بولماش ، بر داملا ترله مه مشسیکز و بر ذره کونش یوزی
 کورمه مشسیکز .

ایشته ، بنجه ، یازین ایده ئال اولان عمر بودر . بر آز باغچه
 بر آز بالق ، بر آز کتاب و بر چوق اویقو ، و بر چوق خولیا
 و بر چوق استراحتله کچیریلن برایش سز آدام حیاتی ... حالبوکه
 اونک یرینه بر مأمور ، بردکانجی ، بر غزته جی ، بر عمله دوشو-
 نیکز که هر کون چالیشمغه ، کونش ، صیجاق ، تراچنده دیدیشوب
 یوروله رق کچینمکه مجبور ... اونک ایچون یاز نه تحملسوزدر .
 بر ایکندی اوزری نرده بولونورسه بولونولسون ، حتی ناظر
 قولتوغنده ، ینه ایش ، خدمت زوردر ، بونالیتیجی و او یوشد-
 وروجیدر . دکل یازی یازمق ، امضا آتمق بیله بو ساعتده
 بر یورغونلقدرد ؛ دکل لایحه ، بر حکایه اوقومق بیله بو زمانده
 بر زحمتدر . اوکله نک رخاوتی انسانی یاواش یاواش او یله شدتله
 قاپلار ، ایچنی او یله بر فتور ایله دولد رورکه ... قلم اودالری

قىشىن يانان صوبالرى ايله عادتاً خوشدر و مأمورلار اىچىندە مسعود كورونور . فقط يازىن جاملردن كىرن كونس باشلارندە ياناركن بىچارەلر نە ازكىن ، نە مجالسز ونە خراب دورورلر .

اسكىدن استانبولده يازلر همان همان اكثريت اىچون ، بر تعطيل كى كچردى . بر كره مأمور جمعه ، بازار و چهارشنبه كرنلرى اينمزلردى . اك فقيرينك بيله ينه بر كوى جوارنده بر صيفيه سى واردى . اوراده باشلارندە تا ككه ، بلارندە قوشاق ، يالين آياق ، پوفرر پوفرر هفته نك اوچ كونس استراحتده كچر- يرلردى . دىكر كرنلرده قاقماق ياپدقلى چوق اولوردى .

حتى صارى ياره ، قاقماق نكل ايتدك ديهه ايلرجه ماموريتلرينك باشنه اوغراميان و عمرلرني قهوه لرده ، بوغازدن قوپان پويرازه كوكسلرني آچهرق طاولا اويناقله كچرن مأمورلر چوقدى .

شىمدى هر كس معيشت دردى اىچىندە ، يازه ، قىشه باقهدن ، هر كون اينسيور ، خان مرديونلرني دردر دردر آتلايهرق ، صاغه صوله باش ووروب جواب رد آلهرق ، يوقوشلر طيرمانوب يانغين خرابه لرى دولاشهرق بر خدمت ، بر اكك پاراسى آرقه سنده بيك زحمت ، بيك كلفته قوشويور و آقشاملرى اوينه بى مجال دونويور . آيده درت يوز غروشه اولر اداره ايدىلن اودورك يازلارندە كيمك اىچون فضله چاليشق مجبوريتى واردى ؟ استانبول يانوب طوتوشور ، خلق بوغاز اىچى كىنارلارندە سديرلرينه اوزانمش سرين سرين اويوردى .

يازين بر كوپرونى ، بر فنجانچيلر يقوشنى بويلامق ، بر ترامواى آرابه سنه بينمك ، برواپورده يربولمق نە كلفتى ، نە زحمتلى برايشدر .

اسکیدن بوکا نادراً قاتلانیردق . . . ذاتاً او زمانلر کیمسه نك
مستعجل ، مهم ایشی اولمازدی ؛ بر کون ، بر هفته ، بر آی
دکل ، قوجه بر موسم بیله ایشلرک تأخره تحمیل اولوردی :
— هله هوالر بر سرینله سین ...

دییه درت آی ایلری یه آتیلان نه مهم ایشلریمز واردی ...
خلق موسملره کوره کندیسینه بر طرز حیات سه چشدی ؛
عادتلریمز اقلیمه اویدورمشدق ؛ محقق که بوصیجاق کونلرده
صباحدن ایکندی یه قادار متادیا استانبولده ، بر ایش پیشنده
وقت کچیرن آداملرک حتی مختل اولور وینه محقق که نه البسه لریمز ،
نه بنالریمز بویاز موسمیله مناسبتداردر . بوراده یازین بر اوزون
تعطیل واستراحت دورهی کچیرمکه هرکسک احتیاجی واردر .
یوقاریده ، یازین یا پک آلاتورقه ، یا پک آفرانغه یاشامق
لازم کلدیکنی سویله مشدم . . . آلاتورقه سی هیچ کینمه دن
انتاری ایله یاشانان حیاتدر ، آفرانغه سی کونده بش قات
البسه وبر قاچ قات چاشیر ده کیشدیرهرک یاشانیلان حیات . . .
صباحلین صیرته کچیریلن البسه ایله آقشامی ایتک نه عذابلی بر
محکومیتدر ، یا بوتون کون ده کیشمه یین بر آیاق قابی ؟ آرتق
بو تحمیل سوز بر اشکنجه در . پارالی بر فرنک یازین لا اقل اوچ
کره البسه ده کیشیر ، ایکی دفعه ییقانیر ودرت ، بش کرده آیاق
قایسنی دیکله ندیرر . بر کوملکی بر کون متادیا کین عادتاً
عیبلانیر . . . بز ایسه ، یازین بیله ، اوچ کوندن آشانغی کوملک
نادر ده کیشدیریرز . اسکی آداملر ، اوزمانکی البسه لرینه نظراً

ياز سحتنه اعتنا ايدرلر مش ؛ بزلر آلافرانغه البسه يه باشلايالي
تميرلکدن ده محروم قالدق !

ياز بر قات البسه وايکي قات چاشيرله چيقماز . استانبولاک
بويله بردن بره باصديران صيحاقلرينه هر درلو اعتنا ورفاهدن
محروم يورغون وجودلر يمز يک قولاي تحمل ايتمز . داها حرارت
يکي باشلادی، فقط کورو يورم که چهره لر شيمديدن سوزولدی،
وجودلر شيمديدن آريدی .

يازين وجودلر بول اويقو ، بول چاشير ، بول البسه و بول
صو ايله محافظه اولونور . اندیشه حیات اويقويه می میدان
دیراقييور ؟ معیشت دارلغنک بول چاشير آلمغه می تحملی وار ؟
بوقوراق کچن بهار بندلرده صومی قویه جق ؟ دیکه نمکه امکانی
بولونويور ؟

بکا اويله کلييور که بزم حالمزه دوشن بدبختلر ايچون ياز بيله
بر عذاب اولويور . بر ايکندي کونشي آلتنده يايا اوله رق
کوپروي کچن بر آدام امين اولیکز که ، مسعود صاييلاماز واوراده
آتديغي هر آديم حياتندن بر ساعته مال اولور . ياز اويقو ،
استراحت ، أسنه مه ، کزيمه ، انتاری وترلک موسميدر . برتک
البسه و چيفت قوندوراسنی کيه رك صباحلين بوسيجاقدده سوقاغه ،
ايشه قوشان و آقشام اوستی اوينه عینی قيافتده دونوب عینی
البسه لرله اوطوران بر آدام بيلسين که قيش موسمی چيپلاق اوله رق
دولاشان بر بدبختدن همان همان فرقی هيچ يوقدر !



دهوه نك دردی

كچن كون ، (تقويمدن بر ياپراق) ستوننده دهوهلره عائد
بر فقره او قودقدن سو كرا ایدی ، بهار كوشنه كو كسمی
ويوزیمی ویرهرك دوشونجه لی فقط ممنون ، آغیر آغیر ادرنه
قاپیسنه قادار یورودم ؛ اوجری سمتلرده فقیر خلك حیاتنه
قاریشهرق یابانچی یابانچی دولاشمق ، خراب مسجدر ، كوزل
تر بهلر و صارماشیقلی دیوارلر آراسنده بر سیاح كوزیله مملكتی
كزملك سیرانلریمك اك ذوقلیسی ، اك لذتلیسیدر . سنه ده بویله
بر قاچ دفعه ، مارت و تشرین ثانی ایچنده ، صماتیه ، ایوب ،
طوقیو جوارینه دوغرو تك باشمه جر ذوقه چیقماق اسکیدن ،
تا چو جقلغمدن بری معتادمدر . ایشته بواعتیادله ، بر قاچ كون
اول ، ینه یوللره دوشدم واسکی استانبولی باشدن باشه كچوب
تا سورلرك خارجه قادار اوزاندم ، قیرلره چیقدم ... زده ده ایدم
بویم یشیل اووالر اورتەسندەکی تنها کویلك اسمی نه ایدی ،
دونمك ایچون اك قیصه یول زه دندی ، هیچ بیلمیوروبو مجهولیتی
ذهنمه محافظه ایچون ده کیسهیه صورمق ایسته میوردم .
کیدە کیده هنوز یشیلانمکه باشلامش ایکی سو كود آغاجنك
آلتنه ، بریقیق چشمه باشنه واردم . اوزاقدە، تارلالرده رنجبرلر
چالیشیوردی . فقط یانمده کیسهلر یوقدی . اوطوردم ، بر
جیغاره یاقدم و ایوب اوستندن ، خلیجه دوغر ، اوق میدانیه

قارشى قارشى يه اطرافى سيره دالدم . منظره اوقادار كوزل ،
 كونش اودرجه پارلاق ، هوا اويله صاف ايدى كه عادتا يارى
 مست ، كندمدن كچمش ، كندىمى اونو تمشدم ، بردن صيچرادم :
 قولاقلىرىمك ياننده قورى ، قابا سسلى بر چان دالغه لاندى . . .
 دوندم وبر دهوه ايله برون برونه كلدم . اوت ، ايرى ، باشى
 بوش ، ياشلى بر دهوه . . . باشى تا اكسه مه اوزاتمش ، قارا ،
 قوجه مان ، دوشونجهلى ومايوس كوزلرني اوزدرمه ديكمش ،
 عادتا بر يول صوراجق ، بردرد دانیشه جق ، برلاف ايدجك
 كې معنالى ، بشرى بر باقىشله دورويور ، لاابالى بر طرزده
 كه ويش كتيرمه سنه دوام ايدرك ، بكليوردى . صانكه :

— شوصوباشى ، شوبهار كوني وشويشيل قيرلر نه خوش . . .
 سن ده بنم كې دالغين و دوشونجهلى ، بنم كې يالكزو ايش سزسك ،
 ايسترميسك اوطورالم ، سن جيغاره كى ايچ ، بن كه ويشىمى
 كتيره يم وبر آز درد لشم ، درد ليرىمى آكلاشالم !
 باشمله اشارت ايتدم :

— پكى حاجى بابا ، ديدم ايسته ديكك كې اولسون !
 دهوه قارشيمه چوكدى ، او كوزل ، اومونس ، اودردلى ،
 اوده رين و او پر وقار قاپ قارا كوزلرني كوزلرime ديكرك شو
 وجهله بنمله حبس حال ايتدى :

— درديمز بزمده چوق ، باشدن اشغين اماك آجيتايىسى ،
 يوره كه اك فضله ايشله يه نى حيثيت دردى . . . بيليور سيكز كه
 بزلر ، دهودلر ، حلیم ، سليم ، متحمل و ص - بور اولمقله برابر

چوقده عنعنه پرست ، چوقده متعصب و خشین مخلوقلار .
 ده وه کینی سزك لسانکزده بیله مثل اولمشدر ، بویون اکر ،
 فقط کین طوتارز . ایچمزده کین و خصومت اون بر سنه دن
 بری ، بیریکدی ، بیریکدی ، نهایت یوره کمزی دولدوردی ،
 آغزیمزدن طاشدی ؛ اوقادار کهویش کتیریرکن چیکنه دیکمز
 ماده صفرا ولعاب دکل ، آرتق کین و خصومتدر . . . کین
 و خصومت ایچنده دیش غیجیردا تمقله عمر کچیریورز ! آه ، بو
 مشروطیت ، بوتون اسکی و کوزل اصوللاری ده کیشدیردی ،
 فائده لی و ظریف عادتلی ترک ایتدیردی ، هر ایشی هر ج
 و مرجه اوغراتدی ، مملکتی نهایت شو حاله صوقدی . سز
 هیچدن آداملر ناظر اولدی ، موزعلر صدارته کچدی ، جاهلار
 کرسیلره قوندی ، سفیلار ثروتلره بوغولدی دییه قیزیور ،
 نا اهللار آله قالمقدن شکایت ایدیور ، هر کسک یرنده
 قوللانیلمادیغنی ایلری سورهرک قیامتلیر قوپارییورسیکز . . .
 بزلر او یله اولما دق ، عینی فلا کته اوغراما دق ؛ بر زمانلر
 بوتون اهلینک حرمت ورعایتی قازانمش اولان ده وه لر ، خلقک :

— نه شیرین ، نه حلیم مخلوقات !

دییه اعتبار کوستردیکی ؛ چوجوقلرک ، معصوم یاورولرک :

— حاجی بابالر !

خطبیلله سهو دیککی ، سیر ایتدیککی ؛ قادینلرک ایسه ، آنادولیده
 دوغوب بویومش اولما مزه رغماً ، مکه و مدینه دن کلش بر کنار
 مقدس کبی :

— مبارک حیوانلر !

توجهيله قدر و مزيتنى دوبالا ايلديكى ده وه لرنهايت مشروطيتك
 بيك خطاسى آراسنده بوتون موقع و اعتبارلرني غائب ايتديلر ،
 قاطير و مركب مقولهسى كى عادى و خسيس ايشلرده قوللا نيلمغه ،
 چولوق چوجوق ماسقاراسى اولمغه باشلاديلر بزي شو قوجه
 قابور يمز ، شو يامرو يومرو باجاقلر يمز و دوشوك دوداقلر يمز
 رغماً اودرجه سوهن ، سويملى و شيرين بولان ، مبارك و مقدس
 عد ايدن خلقك توجهنى غائب ايتك ، دوشونيكز ، نه فلاكت ،
 نه آجى ونه درددر ! ... وقتا كه حریت اعلان اولندى
 وصيرتمزه رأى صندوقى قوندى ، بن ، در حال آرقداشله :
 — بيتك ، محو اولدق !

ديدم ؛ اونلر ، اولآ آكلاميلر ، بو اوافق علامتدن
 شو قوجه فلاكتى حس ايدجك درجه ده ذكا و فراست
 كوسترمه ديملر :

— جانم حاجى ، نه اولويورسك ، ايسته باق ، نه مزين ،
 نه شاتافاتلى بر آلاى ، صرهدن داهاپارلاق ، داهاشعشعلى و داهاشعشعلى
 اكلنجهلى ... بر زمان پادشاه فرمانى طاشيردق ، شيمدى ده
 ملتك برات نجاتنى طاشيورز ، ينه اعتبار يمز يرنده ، ينه توجه
 باقى !

ديهرك آلدانديلر و بنى ده آلداتمغه چايشديلر . فقط بن ،
 آقشاملين اونلره ديدم كه :

— خاير قرده شلر ، بن بو آلايى بكسنمه دم ، بو صره يى بنم
 كوزم طرتمادى ، او كده زورنا دونبهلك ، آرقه ده لاتارينما ،
 اورته ده موزيقي ، بوچوق قاريشيق ، چوق كورولتولى ، چوق

اويغونسز ايش ... هم سز رآى صندوقلرينى خفيف بولديكز
 اما بنم اوموزلرئى چوكرتدى ، غالباً ايچنـده كيلر حلال مال
 دكلدى ! مادامكه بر دفعه بو ايشلره ، بزه عائد اولمايان بو عادى
 ايشلره بى صوقديار ، آرتق خلاص اميدى يوقدر ، باشمى
 بلادن قورتارامىز ، داها كيم بيليرنه عادى ونه كوچ خدمتلر كورمكه
 مجبور اولاجىز !

ديديكم برر برر چيقدى ؛ هراتخابده صوپا ، سله وحيله
 ايله خلقدن آلىنان پوصلهلر صيرتمزه يرلشديريلدى ، ساخته
 برنشئه و صوئوق بر عظمت ايچنده زورنا سسلرى وداوول
 پاطيرديلرينه قاريشمش اولان سوقاقلرده كىزديريلدى ، توزدو-
 رولدى . فقط بى هر دفعه سنده خلقك توجهندن بر مقدار داها
 غائب ايتديكمى ، آرتق :

— مبارك حيوانلر ! حاجى بابالر !

دييه تقدير كورمه ديكمى آكلايور ، كدرىمزدن صاراروب
 صولويوردق . اتحادجيلر بىلرى ، دهوهرلى ده اك مناسبسىز ،
 اك آيقيرى ايشلره صوقشلىر ، حيثىتمى قيرمشلردى . اونلره
 خدمت ايتدكجه ، على الخصوص بويله سياسى دالاولرلرينه قار-
 يشدكجه اهالى بىزدن آدام عقللى يوز چه ويريوردى . حتى بر
 قسمى ، مخالفلر داها ايلرى وارهرق :

— بوتون دهوهرلر اتحادجى اولمش ، اتحاد قلوبلرينه يازيلمشلىر !

دييورلر ، بهتان ايدييورلردى . اتحاد مركزى نه دنسه
 حليم ، مطيع ، سىس سىز واعتراض وتنقيدى سومىز اولديغىمىز
 ايچونمى ، نه در ، بىلرى ، دهوهرلى كندى افرادى ، كندى

اخوانى عد ايدر ، بوتون سياسى نمايشلارنده بىزى قوللانيردى .
 بز بحسب التصادف اتحادجى اولش-دق . نيازى بىك غزال
 حرىتن-دن دولايى بوتون كيكلك اتحادجى اولوشى ، كيك
 كورونجه انسانك اتحادجيلرى خاطرلايشى كى... خلق نظرندە
 اتحادجى ، دەوہ وكيك بربرى خاطرلاتان اوچ اسمدى وبز
 بونك آدام عقللى فرقە واردىغمز ايچوندى كە او صندوق آلا-
 يلرندە ير ياريلسە دەقوجە قانبورلار يىزلە يره باتسەق ديه ايچمزدن
 يالوارير ، اھالىنك بوزينە باقمە اوتاندىغمزدن باشمىزى ھوايە
 قالديرر ، اوزاقلرە باقاردق .

ديركن حرب عمومى پاتلادى ، بن بونى خبر آلنجه :
 — آرقداشار ، ديدم ، اك فنا كونلرە چاتدق ، اتحادجيلر
 بىزى نمايش و منفعتلرينە واسطە و آلت اوله رق قوللانمق
 معتادندە درلر ، محقق بو حرب ايشلارندەدە بزم بويوك بر آنغارىه
 ويره جكلردر . فقط ، دوشونيكز كە محاربە ، زورنا ، لاتارينا
 اوكدە ، بىك كى سوسلو قىزچو جوقلرى صيرتدە استانبول
 سوقاقلرندە دونوب دونوب دولاشمغە بىكزمز ، جان تھلكەسى وار!
 قورقدىغمز باشمىزە كەلدى ، كىمىمىزى مولوى طابورلرى ،
 كىمىمىزى نقلية قوللاريله داغار ، قطعەلر آشىرمرق تا قوم چوللارينه
 قادار سوروديلر . آچلق ، صوسزللق ، مشقت ، ھانكى برىنى
 صايایم؟ دەودلر بو حربدە نەلر كورمە ديلر ، نە فلاكتلر چكەمە ديلر كە...
 ايللە ايچمزدن برينە بر جنكاور چوجوق صاحب اولدى ،
 ھر صباح فرنكك ديش معجونى ودیش فيرچاسيله زواللى
 ھم جنسمزك زورلە ديشلرينى اوغاردى ... دوشونيكز ، مبارك

بر دهوه آغزنده ، نه اولديغى بلليسىز بر فرنگ علاجيلاه دوموز
 تويلرندن معمول فيرچه يي ! بونه حرمتمسزلك ، بوانصافسزلقدر!
 بارى بر مسواك اولسه يدى . . . ايشته بز ، بوغنغه پرست ،
 متعصب و محافظه كار دهوولر بويله ماجرالر ، بويله دردلر كوردك!
 نهايت متاركه اولدى ، فقط اعتبار وحيثيتمز رخنه دار اولديغى
 ايچون ، آرتق بر داها اواسكى حرمت واسكى توجهى بولامادق .
 صره دن و انتخاب آلايندن بيله محروم قالدق . حريفك برى شو
 عجز وضعف حالمزدن بالاستفاده هور كوچلر يمز سوت وسوتلى
 اون اعلانلرى قويه رق ايكي قيلار ييناتا ، بر زيللى ماشا او كده ،
 چولوق چوجوق آرقه ده ، آپوقوريا اكلنجه سى كى بزه سوقاقلرى
 كزدير مكه باشلادى ! نه ، نه ياپارسك ، بوكاده قاتلاندىق ،
 سوتدر ، اوندر ، حرام مال دكلدر ، بونى تشهير بر كناه
 صاييلماز ديوردق . فقط كچن كون ، آه مدهش ، او اونوتولماز
 كون ، برده نه كوره يم ، بزدن ، دهوولردن برينك ايكي يانه
 ايكي قوجه بيكلك طاقشلىر ، راقى ، شراب اعلانجىلغى ايتدير -
 ميورلرمى ؟ واه زواللى دهوه واه ! صره و انتخاب آلاينده
 ايمش كى عيى عظمت ، عيى وقار ، عيى يوكسكدن باقىشله
 اورته ده صالينه صالينه كچيور ، خلقه حرام مال توصيه ايتيورمى ؟
 عقم باشمدن كيتدى ، بردفعه :

— حاجى ، برادر ، بو حالك نه ؟

دييه باغير مشم واو حدتله يولار يمي صاحبمك آلندن
 قوپاروب قيرلره دوشمشم . . . او كون بو كوندرك باشمه
 دولاشيور ، ياسله ديوانه اولقدن قورقويورم !
 واه بزه واه !

دەۋەنك او كوزل ، او مونس ، او دردلى ، او دەرىن
 واو پروقار قاپ قارا كوزلر ندىن قوجەمان ايكي داملە ياش فيرلادى ،
 بردفعە دە ، آھ چكر كى ، اوزون اوزون ، ياسلى ياسلى بوكو-
 ردى . مكرسە دەۋەلر ك دردى نە قاداردە بزمكەنە مشابهمش !
 دەۋەلرلە نە قاداردە هم حال ايشىز !

واه هېمىز ، دەۋەلرە وبىزلرە !



تولومه دائر . . .

« ایسترم ، بکلیورم ! » دینلره اینانمام : بکا اویله کلیرکه
ارزوسیه آغزینه برطابانجه صیقان ویاخود سرای برونندن
کندینی آقینتییه آتان کیمسه لر بیه : « بلکه قورشون صاپار ،
بلکه برقورتاران چیقار . . . » امیدیه ، بوصوک امیدله اتخار
ایدرلر . . . « تولومدن قورقام ! » دین بر آدام توله جکنه ،
نه دنسه ، اُک آز احتمال ویرن بر آدامدر . دیندار ویا دینسر
هرکس ، تولمکدن قورقار : بری جزا کورورم ، بری آرتق
هیچ برشی کورهم دییه . . . بیلدیکم حکایه لک اُک معنالی واک
بلیغی اودونجی ایله عزرائیل حکایه سیدر :

— کل جانمی آل !

دییه چاغیزوبده قارشیسنده ملک الموتی کورونجه :

— صیرتمه شو یوکی قویویور !

دین اختیار بوتون انسانلرک حسیاتنه ترجمان اولمشدر .

تولهمک ایچون قهر وجفا چکمکه کیم راضی اولماز ؟

مثلا میلیونر (قارنه جی) یه :

— یوز سنه داها یاشایه جقسک ، فقط طاش طاشیمق

شرطیه . . .

دینسه :

— خایر زنکین اوله رق تولمکی ترجیح ایدهرم !

دیرمی ؟ هیچ ظن ایتیم ... اتخار ایدن هر آدامه ، قابل
اولسهده :

— دیریل !

دینه بیلسه محقق که اوینایه اوینایه دیریلیر . قورتولدقون
صوکرار تکرار اتخاره قالدیشانلر ، فی الواقع ، کورولمشدر ،
فقط بونلر حادثه اتخار اثناسنده قورقوسندن عقلنی بسبتون
غائب ایدن امیدسز دلیردر . ذاتاً حیوانلری انسانلردن داها
مسعود ایدن کیفیت حیواناتک ئولوم حقنده بر فکری ، بر حسی
اولمامه سندهدر . . .

عجیبا حیاتمزد ئولومی قاچ دفعه خاطرلار ، کدرله نیر
وقورقارز ؟ حسابیه صیغماز ... یکریمی درت ساعتک منتظماً
بر ساعتی ئولوم قورقوسیله کچر : واپور باتار ، ترمن چیکر ،
اوتوموبیل چارپار ، طاش دوشر ، قورشون ایشلر ، خستهلق
کچر دییه عمریمزی قورقو تملندن هدر ایدر . حالبوکه حیوانلر
ئولومی بیلمز لر ، ولوکه یاننده همجنسلری بوغازلانسه ... خوش
بیلمکه برابر انسانلرک الندن قورقمقدن بشقه نه کلیر ... کاشکه
بزده بیلمه سهک ، چاره سنی بولمادقون صوکرار خستهلغی ایستر
بیل ، ایستر بیلمه ... ئولوم حقنده کی بویله یاری بیلکی دکلیدر که
انسانلری بیله بیک درلو مشکلاته ، اذایه ، مجنونلقلره سوق
ایتمشدر ...

کیمیمز کندیمزه ئولوم اتخاب ایدمزر : قیمه بر خستهلقه
یاتاقده ویاسکته قلبدن سوقاقده ئولهیم دیرز ... بعضیسی بوغولمغی ،
بعضیسی یانمغی ، بعضیسی بر قضا اثناسنده پارچه لایمغی مرجح

بولور... كىمىمىز ھىچ قورقماز كورونور، مزارىنى صاغلغندە
 ياپدىرانلار، كىمنى باشندە ويا بوغچە سىندە طاشيانلار چوقدر...
 فقط بوتون بونلار قورقودن ايلرى كلير: بن بر ذات طانيردم كه
 حياتندە بر تر به باغچە سىنە لىدىنى حاضرلاشمىش، برده ايجرىسنى،
 اوجى تر به دار اوداسنى كىدن بر چىغراق قايتانى قويدورتمىشدى:
 — ئولمىكەن قورقۇمىورم، دىردى، فقط يا ئولدى دىيە
 كوسىرلار، مزاردە جانلانيرسەم چىقەمامقەن قورقۇمىورم، چىغراغى
 اونك اىچون ياپدىردىم! —
 كچىلدە وفات ايتدى، بالطبع چىغراغى دە چالامادى...
 برىكت كه ھىمىزە ئولوم، اىك ياقلاشدىغى زمان بىلە اوزاق
 كورونور. رىقاسىندن برى بر خستەنى زيارتە كىتمىش، باقىش كه
 صوك ساعىندە... آرقداشنى طانىيەمامش بىلە، كوشەدەكى
 بقال ظن ايتىش و...
 — نىلىسىكز، اىنىسىكز انشاالله!
 نىسوالنە...
 — حمد اولسون، كچىشدىردىم بقال آغا...
 دىمىش، اوبرى دايانامامش:
 — بو عقلە سن زور كچىشدىرىسك!
 دىمىش!

*

ئولوم فكىرىنك دنيا قورولالىدن برى انسانلارە ياپدىردىغى
 لزومىسزلىقلارك حد و حسابى يوقدر... بو خصوصىدە بر نىزەجك
 تحقىقات ياپىق اثبات مدعايە كافى كلير. ئولوم قورقۇنچىدر، فقط.

اۋنى ، اولدىغىندىن فۇخايە قورقۇنۇپ دىك ، بىر آزىدە ئاھىل دىيەلمە ،
 ئولۇم كەلەسەنك دەشتە پىك ياقىشىمىز ، اما ، تىخف و كولوئىچ ياپان دە
 اۋنلردى ، بىزى . مەنىلەك بو بابدەكى عادەتلىرى ، او تىشلىقات .
 او مىراسىم ، او باطل اعتقادلىرى ، او اساس سىز ئوزونىتولر ، اۋنلر
 معلوم ھېمىز بىلىۋورز ، ھېمىز مەنىلەكلىرىنى آ كىلايۋورز ،
 فقط ئولۇمك كەندىن قورقۇدىغىمىز . ايچون اطرافىدە ياپىلان
 ايشلىرى دە ، نە اولور ، نە اولماز ، پىك اولور اورتە تىنقىدە
 جىسارىت ايدە مىلورز
 لىكن ، امىن اولمالىكە ، ئولۇم داھا آز خىجىع كورونوردى ،
 داھا كەلگەن شىرائىطە ، داھا بىلىپ و مەقۇل تىشلىقاتە
 تابع اولەيلىسە ايدى مع التأسف پىك آزى مەشتىنا اولۇق
 شىراطىلە ھا قبائل وحشىە ، ھا مەنىلەر بو بابدە ئولۇمى داھا
 خىجىع بىر شەكە سوقۇق ايچون تامام بىرلەشمىش و بلا لزوم اۋنى
 اۋنى داھا قاھىر ، داھا دىدەلى بىر مەرتىبە يەلچىقار مىشلىرىدە ، ئولو ،
 نام و نشانى قالمىە جىق سورتدە كورولتوسىز جە ، عادتا كىزلىدىن
 كىزلى يە درحال اورتەدن قالدىرىلسە ، نە مىراسىم ، نە مىزارستان
 اولسە ، امىنمەكە ئولۇم بودر جە قورقۇنۇپ كورونمزدى اۋنك
 ايچون آفرىقادەكى بىر قىيىلەنك بو خصوصە اتخاذايتدىكى اصول
 كەلگەن سىزدى : ئولنى اقرباسىندىن بىرى تىش سىز ، سىداسىز ،
 باجاغىندىن سۈرۈكلەيۈب دوغرو جە نەھرە كوتورور و آتارمىش
 اوقادار ! شەكالبۇكە دىككىز بىر چوقۇق قبائل بۇنك بىسەيتۈن عەكسىنى
 ياپارلر . و بىر ئولو ايچون ، لزوم سىزىرە ، بىك جان تلف ايدىرلر مىش
 مثلاً بىر قىسمى ، ولو كە اجلىلە ئولمىش اولسىۋىن ، ھىز ئولو ايچون

بر کیشی بی ئولدورمك و انتقام آلمق اصولی! موافق بولمش :
 علی ئولدیمی ، کیدر ولی بی وورورمش . . . حتی علینك ماتمی
 ولینك قتلنه قادار سورورمش ! جاوايه جوار بر آداده کی اصول
 داها مدهش . اوغلی وفات ایدن هر بابانك سوقاغه چیقار چیقماز
 تصادف ایدم جکی هر هانکی بر شخصی ئولدورمك حتی ایش . . .
 مثلاً ، دوش-ونیکز ، سز ، دالغین دالغین ایش-کزه کیدرکن
 آرقه کزدن بری قوشوب قافا کزی بر قیلیجده بدنکزدن
 آییریور . . . نه دن ؟ زیرا اونك او ائناده بر اوغلی ئولمش ،
 سزده تصارفا اورادن کچیورمش سکر . . . به داوايه ئولوم ایشه
 بوکا دیرلر . مع مافیه دهافناسی ، داها مدهشی ده وار : مغولستانده
 بکلردن بری وفات ایدوبده جنازه سی دفنه کوتورولورکن
 توابعی ، در حال :

— هایدی ، او بر دنیا ده بککزه خدمت ایدیک !

دینه هایقیردق اوکلرینه کلنی قیلیجدن کچیرلرمش ! بر
 آفریقا قبیله سنده ایسه عادت باشقه درلو ایش : قبیله شیخی
 ئولدیمی ، اوغللری یالین قیلیج سرایدن دیشاری فیرلارلر و کویا ،
 تأثرلرندن عقللرینی غائب ایش کی یاپه رق ، بلا تفریق ، کیمی
 بولسه لر پارچه لارلرمش ! حتی نه قادار فضله آدام کسرلرسه
 بابالرینه او درجه محبتلرینی اثبات ایش اولورلرمش . . . اسکی
 آمریقا قبیله لرندن برنده قرال ئولونجه اسیرلر ، اسیره لر ، زوجه لر
 و جاریه لر ، بیکلرجه کیشی اتجار ایتک مجبوریتنده ایش . . .
 ایسترلرمش که قرال آخرته برموکب احتشام ایله ، بوتون خدمه
 وحشمه سی برابر کیتسین !

دىكر بر حىاته ، آخرته اعتقاد يوزندن بعضى قىيله لرده دائماً
بر ئولوي ، بر قاچ ئولو تعقيب ايدر مش . مثلاً كوچوك بر
چوجوقى ئولدى ، آناسى ، ياخود ، هيچ اولماز سه داديسى ،
چوجوغى او بر دنيا ده سوتسىز وباقيمسىز بيراقمامق ايچون اتخار
ايدر مش !

زوجه لرك آتشنده ياقيلماسى مسئله سى ده آرى ...

تدفينه كلنجه : بونك بيك درلوسى وار : كيمى ىرده ،
ديدىكم وبكندىكم كى ، كوتوروب صويه آتويپرلر مش ،
آرقه سنده نه كيمسه اتخار ايدر مش ، نه كيمسه آتشنه آتيلير مش ..
فقط بعضيسنده صويه آتاركن باجاغنه برده ايب طاقوب هفته لرجه
كناره باغلايوب بيراقيرلر ، بالقلر اتلرني تماماً ييدككن ، كيكلرني
صويدككن صوكراكلوب چيقارلر ، اسكلتنى سىپته قويوب
طاوانه آصارلر مش ! نيچون ، نه لزوم وار ؟ كيم بيلير ، بلكه
عقللرنجه بر حكمتى واردر !

آسيا آدارينك بر قسمندكى اصولى ده فنا بولمادم : ئولوي
درت ديرمك ديكوب اوستنه باغلارلر ، اطرافنه صارماشىقلر
دىكرلر مش ، آز زمانده يشىلكك اويله بويور ، اويله ئورتر مش كه
جسد ىم يشىل بر كفله تماماً قاپانير ، ميدانده آنجق يشىل بر كومه
قالير مش ! بوشاعرانه بر تدفين ... بعضى ىرده ده مزارك اوستى
انواع اطعمه ايله دولار مش ، بوده شكىپرورانده تدفين .
بعضيسنده ايسه مشعللر ياقيلير وعريان كنج قىزلر طرفندن
تابصباح رقصلر ياپيلير مش ، بوده ذوقپرستانه تدفين ...

تا اسکی زمانلرده بر قسم قبیله لر یاشیلیر ، وقت و میعاد ی
نه ایسه ، او کلنجه ییمک عادتند ایشلر . مثلاً آدم یتیمشه
باصدی ، بر صباح ، اوغلی یاننه کلیر :
— هایدی ، بابا ، میعاد کلدی ، حاضر اول ، سنی
پیه حکم ! دیرمش . . . او آق صقاللی باباده ، بلا اعتراض
کندیسنی اوغلنه تسلیم ایدر ، اوده ، وظیفه سنی حسن ایفا
ایتمکدن متحصل بر منونیتله ، پر اشتها ، پدرینی سیلوب سوپو -
ررمش ! صوکرالری بو عادت بر درجه ده کیشمش : یاشیلیرله
مريضلر بالخاصه بوایش ایچون آیشدیریش اولان آزیلی
کوپکلره آتیلیرمش ! فقط کیت کیده طوپراغه کومه عادت
میدان آلمش ، یالکز ، بعض قبیله لر ، بوکا بر درلو تماماً انسیت
ایده مه مشلر : کومد کدن صوکر ا چیقاررو کونشده قوروتورلر ،
اسکلتندن چیتلر یاپارلرمش !

چین احوالنه دائر تفصیلات ویرن بر کتابده اوقومشدم :
چینلیر قادار ئولومه لاقید هیچ بر ملت یوق ایش . . . حتی
بر برلرینه تابوت هدیه ایدرلرمش ، تابوت مقبول بر هدیه ایش . . .
فقط جنازه مراسمنی اودرجه دبده لی ، کلفتلی یا بق عادتمش که
بو اوغورده کلیاً افلاس ایدن ، محو و پریشان اولان عائله لرک حد
وحسابی یوقمش !

خلاصه انسانلر هیچ بر زمان ، هیچ بر یرده ئولومه قارش
اتخاذی لازم کلن اک ساده ، اک کلفتسز و اک آز فجیع ، اک
آز قورقونج اصولی کشف و تطبیق ایده مه مشلر در : در حال ،

-- ئۇلۇملاردىن ھانكىنى بىلىرسىڭ ؟

دیه صورت لر سه ویره حکم جواب شودر :

— بر قضا ، براشتغال نتیجہ سنده ، برہوا اولمغی ...

کاشک رو حنز ، کیمسه یه زحمت و کافت و یر میهرک او چوب
کیدر کن بدنزی ده او کیده جکی یره برابر کو تورسه ، ویا ، یولده

انسان الی دیکمہ جک پر رہ ، فضا نک رو شلغنه بیراقسہ یدی ...

في ايامه في سنة ١٢٠٤ هـ

1870

رجال مشروطيتك صوك كونلری

هر فرقه یه ، هر هیئته ، هر زمردیه صور مالی ، دیمه لی که :
— مشروطیتدن بری شوفلاکتدن قدید اولمش مملکتده
کیم موقعه کچدی ، نفوذ قازاندی ، شهرت تأمین ایتدی که اوندن
دولت فائده کوردی ؟ اسمنی خیر ایله یاد ایدم جککز رجل
دولت کیمدر ؟ هانکی آدامدر که سیاست تارلاسندده اکیکنندن
ثمره آلمشز ، ییچدیکندن استفاده ایتمشز ، تخمندن منفعت
طوپلامشز ؟ . . . هانکی وزیر ویا هانکی ناظر در که متمزی
قازاندی ، شکرانمزی جلب ایتدی ! . . . خاییر ، بویله بر عنقا
بودیاره قونمادی ، بویله بر اینجی بوده کیزده یه تیشمه دی ، بویله
بر درویش بو طرفه اوغرامادی . بویله بر نعمت بو مملکته
نصیب اولمادی . . . علی ویا ولی ، اتحادجی ویا مخالف ، اصیل
ویا بدمایه ، عالم ویا جاهل ، کنج ویا اختیار ، عسکر ویا صاریقلی
شهرلی ویا کویلی ، تورک ویا کورد ، آر ناوود ویا عرب ، پوماق
هیچ بر دولت آدمی کورمه دک که درایتله ، کیاستله ، فطانتله
اداره اموره قادر اولسون وشو بدبخت ملکه بر قاج سنه حضور
ویا رفاه ویره بیلسین ؟ او حالده ، بهی اذعانسزلر ، بهی حرایسلر
ومنافقلر ، حالا نهدن دوداقلریکزده عینی اسملر ؟ حالا یچون
عینی ترانهلر ، عینی تمایلر ؟ واز کچیک شخصی اندیشه لر دن ،
ملت بر قرار ویرسین ، « اون بر سنه در کرک موقع اتتداره

كچمك و كرك سياسيات عالمنده بر شهرت تأمین ایتمش بولمق
جرملریله مظلون اولانلرك بعدما پولتیقه ایله اشتغاللری منوعدر
دیسین و بوقرار اودرجه قوتله ، شدتله بلا تبدیل و تعدیل
تطبیق اولونسون که معلوم و معروف پولتیقه جیلر امیدلرینی
کسیینلر ، صحنه سیاستدن چکیلسینلر و باشقه ایشلرله اوغراشوب
مملکتی راحت بیراقسینلر ! ایشته اوزمان ، بو طاشغین و شاشغین
فقط هر حالده مضر رجالدن قورتولان یکی و معتدل آلر دده فیضیاب
اولور ، مشتاق اولدیغی سکونه ایرر ، ترقی و تمدن ایدر !
عجبا بو قرار اوزرینه بیلدیگمز ، طانیدیغمز شو رجال
مشروطیت ، اونامدارلر نه اولورلر ، ناصل بر عاقبت او غرارلر ؟ ایشته
بونی دوشوندم و صوک کونلرینی ، عاقبتلرینی شویله تخمین ایتدم :

(انور) بردفعه داها قفقاسه قوشار ، برشی یاپاماز ؛ تورانه
دالار ، مرآمنه ایره مز ؛ موسقو وایه دوزر ، روی قبول کوره مز
آلمانیا یه کیدر ، اسکی توجهی بولاماز ؛ صاغه صاپار ، باشنی
وورور ؛ صوله صاپار ، یولنی شاشیر ، باقار که چیقار ایش
دکل ، نه کنیدی مملکتندن ، نه ده قومشو الکلردن
امید یوق ، بردن جهانگیرلکی ترك ایدر ، کشور کشالقدن
واز کچر ، قهرمانلغه یکون چیزه ، کندیسنی عبادته ، دیانته
تسلیم ایدر : صیرتنده صولوق برجبه ، باشنده داغنیق بر صاریق
سجاده یرده ، تسبیح الله ، نورانی صاقل کوبکده ، پرهیزدن
دوداقلری بلرمش ، اویقوسزلقدن پنبه یاناقلری صارارمش ،
ختم و قرائتدن کوزلری یاشارمش ، بر پیر ساخورده حالنده

حافظ اولور ، حجه كيدر ، خسته لري اوقور ، درد ليلري ئوغلر .
 ايسته بويله ، سابق باش قوماندان وكيلى كشور كشا انور پاشا ،
 (حاجى حافظ انور افندى) اسمى آلتنده ، بر كون هجرى بر
 بلده نك فقير بر جامع مشروطه سنده تهليل كتيروك اكمال انفاس
 ايدر !

جمال (پاشا) يه بر عذاب و لجدان عارض اولور ، آرتق
 نه ايچكى ، نه قادين ، نه قومار ، سفاهتك هيچ بر شكلى يوره كنى
 قاپلايان صيقينتى يي دفع ايده مز . كيجه كوندوز ، اوداسنده دونر
 دولاشير ، آه ايدر ، كوز ياشى دوكر ، اك حاذق اطبا چاره سنى
 بولاماز ، علاجنى كشف ايده مز ، تداويسنه مقتدر اولامازلر .
 او زمان استانبولدن زيارتنه كلن براسكى دوست كنديسنه مطالعه ،
 كتاب ، شعر توصيه ايدر ، (جمال) نهايت شاعر اولور ،
 شعرادن ، ادبادن نه قدار احبابلري ، اسكى منتدارلري ، ارزاقيله
 العاميله ياشامش اذكيلى بندكانى وارسه نزدينه جلب ايدر ،
 اورمانلر ، كوللر ايچنده تنها و قدیم بر شاتوي اولرله تخصیص
 ايدرك بول ات ، شامپانيا ، شراب ، شلوزمره عرفا ايچنده
 تحرير و انشاد ايله وقت كچيرمكه باشلار . آقشام اولنجه هپمز
 - زيرابن ايلك قوشانلردن برى اولورم ، سر محرر يمزده اميد
 اميد ايدرم كه آرقه مدن كچيكمز - هاوانا جيفارالرينى ياقار ،
 قارشيسنه طوپلاشيرز ؛ اوزون صاچلى ، صولوق يوزلى ، اويانيق
 بر شاعر ، بر عاشق ازلى :

قادين ! قيرك نه ده بيتگين
 بلي ايجه ، كوكمى شيشگين

طرز زنده زندوستانه، هجه وزیندن بر شعر او قور، یونى
 یعقوب قدرینک تورانی بر منشورده سی تعقیب ایدر « آياقلىرى
 قیللى، کچی یوزلى چوبان دیدی که : بال کوزلى وحشی قیز !
 یوره ککک منبعنده بیراق صاقالمی بیقایایم، بکا آغزینک
 خوشافندن برداملاصون وصوکره ایکی دیزاوستنه کل، سیجیلیا
 دکیزلرینک آق کوپوکلرندن دوغان الهیهی تقدیس ایت ! »
 بومعتنا پارچه یی بر آلقیش فیرطیناسی باصدیرر، حمداد صبحی
 آویزه لری چینلاتان کور وسرت بر نطقله تنقیداتنی یاپدقدن صوکره
 شعره یکی بر سس کتیرن داهی قالقار، ایکی سنه یه قادار اکمال
 ایده جکی بر شعرک شیمدیدن حاضر لانان دوت قافیه سنی بیک
 اصرار او زواینه نویلر : « ... »

... آونک

... بهرنک

... رنک

... ژنک

هرکسی بر تقدیر، بر وجد و مستیدر قاپلار ... ایشته
 ویله جهانقیمت اثرلردن فیض آلان جمال (پاشا) ده بر کون
 (شامده شانلی آقشام) عنوانلی بر منظومه اورتیه قویار :

غفور مناره لر

یاندی برز برز ! الخ ...

دیگه ینلر جوش و خروشیه کلیر، ایچمزدن یریسی « ملی
 ادبیات سزدن دوغه جق ! » دیر، بن « اونی سز بسلیورسیکیز،

سز ياشاته جقسىكز ! « دىرم ، على كمال بك ده : « مىرم ! بونه
 ناجىانه قطعه ! « دىيه اك بويوك مدحنى ابدال ايدر . ايشته او
 آسان ، باسان ، ياقان ، يىقان عربستان دىكتاتورى بويله ادبى
 بر عمر ايچنده وطن پرورانه ، حزين شعرلر اوقويه رق ، سا كنانه ،
 ادبىانه ترك جان ايدر !

(طلعت) ك طالعى بسبتون بوزولور ، كارينه كساد كلير ،
 ميخانه سى ايشله مز اونور ، هانكى ايشى طوتسه يوروته مز ،
 نه يايغنه قالقشسه بجره مز ، كيتد كچه فقر وسفالت ياقاسنه ياپيشير ،
 بردرى ، بر كميك قالير ، طانماز حاله كلير . اسمى جسمى اوقادار
 اونودولور كه صاغميدر ، ئولوميدر ، كيمسه فرقنده اولماز . ايشته
 بونسياندىن جسارت آلهرق و طانينميه جفنه امين اولهرق مملكتته
 كيره ، بر زيلسز دفته بر تربيه لى مخلوق تدارك ايدر ، بويله جه
 منزوى ، منسى كچينير ، كيدر ! وفاتنده ضابطه بيله شوپالاسپاره
 بدوش بچاره ده كيمدر ؟ نه ايدى ؟ فرقنده اولماز ، بلديه طبيه ده
 « ضعفيت عموميه دن وفات ايدن بلارسم » دىيه بر راپور ويرر ،
 كوميويررلر ، او آفت ده شووجهله زائل اولور ، بىتر !

(طوپال اسماعيل) باقار كه صوك كوني ياقلاشييور ، اجل
 كلمك اوزره ، سه كه سه كه اوداسنده هم كزر ، هم ده كندى
 كنديسنه شويله سويلر :

— آخاڭ ، نه دويماز كوزك ، نه اوزرن لك ، نه اوتانماز
 يوزك وارمش ؟ قايما دىغك ، يوتما دىغك ، يايما دىغك نه قالدى ؟
 ذاتا برتك آياغك وار ، اوده ايشته چوقورده ، يارين مزاره
 مالكى برابر مى كوتوره جكسك ؟ سنك بردفعه اولسون خير

ايشله مكدن نصيبك اولميه جقمى ؟ نه دورويورسك ، محل جرم
 وخبائتك اولان دائره حربه يي صاتين آل ، اوراي « طوللر
 عمارتخانه سي » نه قلب ايدمرك بوتون دنيانك تك باجقلريني
 بردام آلتنه طوللا ، اعاشه واباته ايت !

بو فكر اوزرينه حقيقه او يرده برطوللر دارالعجزه سي
 كشاد ايديلير وبايرام زاده ده اوزمانه قادار فقر و سفالته دوشمش
 برلوقه اكمه محتاج قالمش ، قرق كوندر آغزينه بر درهم شكر
 قويامامش برحاله كلش اولديغندن قارتي دويورمق ايچون كندى
 ارزوسيله بر باجغنى ترامواي آلتنه قيرار و طوللخانه يه كيدر ،
 بقيه عمريني اوراده عمارت فودلاسييله ، چوربايه قوت كچيرير ،
 كيدهر !

(عزمى) يه بر سيكير علتى مسلط اولور ، جان ياقمقدن ،
 قان دوكمكدن ، كميك قيرمقدن ، طيرناق سوكمكدن ، پارماق
 قويارمقدن ييلمايان ، بيقممايان ، قورقمايان بو حريف برينك الله
 ايكنه باتسه ، بردامله قان كورسه دوشر باييلير ، اويله قورقاق
 ئورككه ، متوهم برحاله دوشر كه او كنده قوربغه صيچراسه ،
 آياغنه كدى دوقونسه ، يانندن كوپك كچسه بايغينلغه اوغرار ،
 اسپازموزى طوتار ، نهايت چيلديرر ، دارالشفاسنده برسinek
 كورسه كوزلري چشمخانه لرندن فيرلايه رق ، ديشلريني غييجير-
 داته رق ، اللريني بوكوب قيويرارق ، قارشيسنده قاپلان كور-
 مشده كنديسنى پارچه ليه جقمش كبي ، كرى كرى قاچهرق :
 — امداد ! امداد ! جاناوار بنى بوغه جق ، يوته جق ،

قاچه جق !

دیه آواز آواز باغیر بر و بو عذاب ایچنده تام یوز یاشنده
 ابدی راحتہ قاووشور !
 (بدری) ایسه واریخی ، یوغنی بر معتاد فخش و سفاهت
 ایچنده بیتوب توکتدکن صو کرا ایشی یان کسیجیلکه ، قارما
 نیولا جیلغه ، طاو جیلغه دوکر ، یکر می کره حبسه کیرر !
 نهایت بر کیجه کوکشنه بر طابانجه پیر ، قور تولور !
 ایشته اتحاد جیلر وقس علیه البواقی بویله بر برر دو کولور کن
 قوای ملیه جیلرده باشقه باشقه صورتلرله باشقه درلو ، فقط
 داهای خفیف عاقبتلره اوغرارلر ، رئیس درد عشقه مبتلا
 اولور ، بر یوروک قیزینه طو تولور ، چاریقلری چکر ، بر آتہ
 بیز ، داغ تپه دوز کیدر ، کزوب دولاشمادیغی نه حیانه اووایی
 قالیر ، نه ارضرم یا ییلاسی ، فقط مرا منه ایره من ، بر ساز تدارک ،
 ایدر ، یانیق یانیق بیت او قور ؟ آه چکر ، عمرینی بویله قیرلرده
 منزوی و هجرانزده فرهاد کی کچیرر ، الی آخر العمر لیلاسی
 آزار ، لیلا دیه آه ایدر ! شهبندر مر سومک نعمت ناشناسلغنی
 جزاسی اوله رق کوزلرینه پرده اینر ، آندن طوتوب کز دیرر لر ؛
 رضانور سینوبده دالیان قورار ، بالیق جیلق ایدر ، جلال آنقرده
 قصاب دکانی آچار ، عوامه قاریشیر ، سسلرینی کسر کچیر کیدر لر .
 مخالفت رجالی ده سینر لر ، برر قوووغه کیرر لر ، لیدر بر
 شیخه مرید اولور واوراده تدریجاً ترقی ایدرک نهایت پوسته
 اوطورور ، زیارتنه کیدن اسکی محبانہ :
 — صدارته ایره مه دم اما دوریشلکده شو مرتبه یه واردم آ!

الحمد لله !

دییە حالندن بیان منونیت ایدر . فیلسوف کثرت توغلدن
 عته کتیریر ، اوهر شیئی بیلن ، هرئسنه نك جوهرینی بیله
 تحلیل ایدن قوجه عالم هر بیلدیکنی اونودور ، ایکی یاشنده چوجوق
 کی ده کیزه باقار :

— بونه ؟

دییە صورار ؛ شمشك چاقار ، قورقار ؛ واپوره بیز ،
 کوپوکلری کورور :

— چماشیر ییقایورلر دکلری ؟

دییە سهوینیر ؛ ساقسی پی بارداق صانیر ، کتاب بولورسه
 یرتار ، دیوارلره قورشون قلمیله کمی رسملری یاپار ، کلن کچنه
 دیلنی چیقاریر ، ایشته بومنوال اوزره طفولیت ایچنده مسعود ،
 پر نشئه یاشار ! دیگر ذواتدن کیمیسی ده رماللغه باشلار ،
 کیمیسی قیوملغه عودت ایدر ، کیمیسی جره چیقار ، کیمیسی
 باغچوانلغه وورور ، کیمیسی بوياجیلقله ، کیمیسی مرانغوزلقله ،
 کوزل کوزل کچینیر ، بر بیر ، بیك شکر ایدر .
 مملکت ده راحتە قاووشور ، باشنی دیکلر !



بر قير كزىنتىسى

هوائى و آفاقى مصاحبه‌لر ايچون بهاردن مساعد بر موسم اولورمى ؟ بهارده انسانلره باقىكز ، اَك آز اشرف مخلوقات اولدقلى دوره بودوره در : قيرلده كزرلر ، اوت ييرلر وسوت ايچرلر ، خلاصه انسانلقدن اوزاقلاشه رق اَك چوق بوزمان حيوانات سائريه بكزرلر . دينه بيليركه بهار ، يردن فيشقيران الوان الوان ، كورپه و كوربوز اوتلريله انسانلرى ماضى يه ، خاصه نطقله مشرف اولمادقلى اَك اسكى و اَك ابتدائى زمانلره ارجاع ايدر ، بىلكم زده بر بسى طلك حاصل اولور ، دنيانك ترقى و مدنيت ديديكمز كلفتلرندن اوزاقلاشمغه ، دره لر ، تارلار كنارنده ، چيچكلى آغاچلر آلتنده وقتمزى ، اوتلار كى باشيمز يرده كچيرمكه جان آتارز . بهارده ييدكلريمز نه در ؟ يشيل صالاطه ، مارول كى چى چى چيكنه ديكمز اوتلر دكلى ؟ قيرلره بر كوز كزديرىكز ؛ ايكي بوكلوم اكيلوب متماديا يردن لاباتا ، كلينجك ، قوزى قولانغى ، هندى با طوپلايان انسان سورولرينك ، يانى باشلرنده اوتلايان درت آياقلى مخلوقاتدن فرقلى نه در ؟ بهار بزي اونلره بكزه تير وانسانلر اَك چوق بهارده حيوانات ايله مشغول اولورلر : قوزى و كچى ياورولرى ديزلر يزدده در . يكي چيقان پيليچلرى اوقشار ، سوه رز . قاناريه لر يمزه يومورطه ويرر ؛ آتلىمى چايرلره چيقاريرز ؛

خلاصه هې درت آياقلى ويا قانادلى مخلوقات آراسنده حل وخور
 اولورز . آرامزده بهار صاغلام بر رابطه ، بر محبت ئوره .
 قيرلرده انسانلرله حيوانلر ، انسان ياورولريله حيوان ياورولرى
 بر آراده ، متقابلاً مودتكار ، پك طاتلى ، پك صميمى بر زمان
 كچيرلر !

بناءً عليه انسانلر ايچون بهارده قير كزىنتيلرندن داهاطييعى
 نه اولابيلير ؟ ايشته بو آرزو ، بو قناعت تاثيريله چوقدندر ،
 كونش آچالى واطراف يشيلله نهلى ، اوزون بر قير كزومهسى
 ياقمق ايستيووردم . بالقوندن باقدقچه بنى كنديسنه چكن اوزون
 چاير اتكلىرى وچامليجه ياماچلىرى دون بسبتون جاذبهلى ، عادتاً
 مقاومتسوز كوروندى . كيمسه يه خبر ويرمه دن ، كيزلى بر ملاقاته
 كيدر كى ، اوصولجه حق اودن چيقدم وقور بغهلى دره بويجه ،
 ايجريلره دوغرو ، آغير آغير يورومكه باشلادم .

بوقادار يقينمزده ، درت آديملق يولده بودرجه كوزل يرلر
 وارمشده نهدن كزميزميشز ؟ نهدن قاضى كوى خلقى بوشعشعهلى
 بازار كونى آقبن آقبن بو طرفلره قوشمايور وبوقيرلى حيات
 وحركتله ، بر چفتلك باغچهسى كى دولدورمايور ؟ يولم ، اولاً ،
 بوستانلر آراسنه تصادف ايتمشدى ؛ بهار هواسنه بر آرز فيشقى
 قوقوسى قاتيشديران باصيق ، صولاق بوستانلر . . . اريكلىر
 چوقدن چيچكلىرىنى دوكمشلىر ، صيق بريپراقله ئورتولوب يمشيل
 اولمشلردى . حالبوكه آرمودلر هنوز چيچكده ايدى ، يشيلسز ،
 دوز بياض چيچكلىر ايچنده . . . ايوالرله المالر ايسه پنبه چيچكلىر
 وكوچوچك يشيل ياپراقلرله يارى يارى يه ، يشيللى پنبهلى ، تر

وتازه بر حالده . . . اصل کوزه‌لی کستانه‌لردی : بریره کلدیم که
 اللی قاداری بر صیرایه دیزیلش وباشدن باشه چیچکلنمش، آریر
 ایچنده، نه پر حیات ونه مسعود دورویورلردی ! دیرکن بریاماچه
 چیقدم، بر آرزو سوکرا ایندم . چیقبارکن یورو دیکم یرلر
 پایاتیه لکدی : بم بیاض . . . اینرکن یابانی خار دالله ئورتولو :
 صاپ صاری . . . بر تخته کوپرو کچدم وبریونجه تار لاسنه کیردم :
 دیزلریمه قادار کورپه، یوموشاق، رایحه‌لی بریشیلکه کومولشدم .
 ایشته اوزمان، ده‌مین بحث ایتدیکم انسانلق و حیوانلق مشابهلری
 نظر مده بسبتون حل ایدلش بر دعوی اوله‌رق تجسم ایتدی .
 اطرافه باقدم وکیمسه کورمه‌دیکندن آمین همان یرلره یاتدم،
 دوندم، قالقدم، سیلکیندم و دیز اوستی اوطوروب، یورهم
 بی‌نهایه بر سعادتله طاشغین، اطرافی سیره دالدم . آغز مده بر
 طوتامده یونجه واردی !

بهار بزی او برلرینه بکزه‌تییور !

عودتده آقشام اولق اوزره ایدی . شهره یاقلاشدقه
 یولک اوزرنده انسانلر کورونمکه باشلادی ؛ اوچر، بشر مشلحلی
 کوچوک او خانملری قیرلره داغیلمشلر، یاما جلرده یر بولوب،
 آیاقلرینی آشاغی‌یه اوزاتمش، کولوشوب قونوشویورلردی .
 ارککلرده بویله دردر، بشر دولاشیورلردی . شویله یوکسکدن
 باقدقه بو یشیلکله کومولی اوطوران ویا دولاشان رنکارنک
 انسان کومه‌لری ایچون :

— جانم نیچون یمیورلر، اوتلامیورلر :

دییه قیزه‌جغم کلییوردی . اوتلر اوقادار کوزل، هریمکدن

داها اشتها بخش ، داها نفیس کورونو یوردی . اوت دیوبده
 کچمه مهلی ؛ لاعلی التعین بر دانه سنی قوپارالم : ده ریسنده کی او
 شفافیت نه کوزلدر ، نه کورپه قیریلیر ونه کندینه مخصوص بر
 رایحه سی ، بر جاذبه سی واردر . ساده تازه سنده دکل قوروسنده
 بيله بر لطافت بولورم . تازه چاییر ویا قوری اوت قوقوسی بنجه
 بوتون رایحه لردن داها مؤثر وداها نفیسدر . اونک فوقنده یالکز
 بر قوقو واردر که مع الاسف شیشه یه کیرمز ولاوانطه سی یاپیلماز :
 یازین یاغموردن صو کرا کی طوپراق قوقوسی ! صو کرا اوتلر ویا
 کوکلری ، اومحویتکار حالارینه رغماً نه خاصه لی ، نه تأثیرلی ترکیباته
 مالکدرلر . اوت واردر که شفادر ؛ اوت واردر که ئولومدر .
 خلاصه اوتلرک ، آیاقلریمز آلتنده ذلیل وروگردان سورونوشلرینه
 باقوب استحقار ایدیله سی دوغرو اولاماز . حیاتمزی اوتلر
 ادامه ایدر و بزمده بر کون ، نهایت ، نه اولسه ق ، اولاجغمز
 اوتدر ، مزاریمزدن فیشقیران اوتلر ! قان ، کیمک ، پختی
 ییغیننک بر قوجاق یم یشیل ، تازه و رایحه لی اوت اولوشندن
 کوزل ، بوندن نازک طبیعتده نه واردر ؟

بو کونکی قیر کزینتیمدن اوتلره قارشى ده رین بر حرمتله
 عودت ایدیوردم . اوته عائد نه وارسه بکاخوش کورونو یوردی .
 چیقیشی ، بویویشی ، کسلیشی ، ییغینی ، یهنیشی ، رایحه سی ،
 هرشیئییسی ... هانی بر فقره واردر : شاعرله بر جاهل ، قبا
 آرقداشی قیر کز مه سی یاپیورلر مش ، بر چاییره وارمشار ، اوپله
 بر چاییرکه طبیقی ده مین بنم ایچینده یووارلانديغم و دیشلرمله
 یونجه سندن بر طوتام قوپاردیغم چاییر کبی . . . شاعر در حال

بهاره دائر بر قصیده او قومش و هر شاعر کې بو منظومه سنده
 بر سړو صاحبه صاپان آرزولر درمیان ایتش : سو کیم یا مده
 اولسه ، کله بک قووالاسه ، بن ده آردندن قوشسه م ، شویله اولسه ،
 بویله اولسه کې ... منظومه بیتش ، شاعرده آرقداشنه صورمش :
 — پکی ، سن بوراده نه اولمق ، نه یامق ایستردک ، دیمش ، آکلات !
 جاهل آدم :

— نه اولمق ایستیه حکم ، بر اشک اولسه مده شو یونجه لری
 پیسه م ... بونی ایستردم ! دیمش . شو فقره یی کویا جاهلی تزییف
 ایچون ایراد ایدرلر . فقط بکا قالیرسه اونک آرزوسی شاعر -
 ککندن هر خالده داها طبیعی در . حتی قوزو ، اینک اولمق
 ایسته مه یوب مرکې بالخاصه ترجیح ایتمه سنی ده بن کوزل و قیمتلی
 بولویورم : دقت ایدرسه کز کورورسیکز که بهارک ذوقنی مرکبلر
 حیوانات سائرده دن فضله حس ایدرلر و بو حسلرینی پک ای
 کوستریرلر ، متادیا چاپیرلرده صیرت اوستی یاتوب ته پینه رک ،
 سونجیلرندن متادیا هایقیره رق و بعضاده بر منظره لی تپه ده
 اوطوروب دهرین دهرین تیریا کی باقیشرلیله اطرافی سیرایدردک ...
 ایسترسه کز سزده بنم قابالغمه و پریکز : بهار کزینتییی
 بکا براوت اشتها سی ویردی و اوتلانا حیواناته قارشیده یوره مده
 برقیصقا نجلق او یاندردی ! نه یازیق که انسانلر ، شوا کمک ، ات و سائر
 قحطی ، شوم عیشت مشکلاتی ایچنده کوزلری اوکنده سه ریلوب
 کیدن چاپیرلردن دوغروندن دوغرویه ، اوتلامق صورتیه قولایجه
 استفاده ایدمییورلر ، شو فیض و برکتدن متنع اولامییورلر !



يکي شاعرلره دائر ...

زيارتمه کلن مسافرلردن بری یا اونو تمش، یا آتمش ویا خودده
قصداً بیراقش، قولتوغک اوستنده یپ یکی بر (سکزنجی
کتاب) بولدم ... شعرله، علی الخصوص یکی شعرله مشغول
اولمایان قارئلر بالطبع شرکت واپورلری کی نومروسيله آکیلوب
طانیلان ویا تحویلات کی رقم تحتنده آلینوب صانیلان بو کتابلرک
شووجه تسمیه سنه، داها دوغروسى وجه ترقیمنه بر درلو عقل
ایر دیره مزلر، بونی یکی شاعرلره وپارماق حسابی وزنه خاص
برزوپیلاک و خوپپالق عد ایدرلر. او یله یا، کتاب اسمی بولمق ده
کوج بر ایشمی؟ چوجوغه اسم طاققدن داها قولای ... زیرا
بریکنده ینه آدام اسمنه اویان بر کله اولماسی لازم کلیر، حالبوکه
بونده نه دیسهک اولور ... اولور اما بو کتاب او یله بیلدیکمز
هر کتاب کی بر کشینک کاری، بر بابانک اولادی، بر ذکانک
محصولی دکل، پانسیون کی بر شی، ناصل او بحرانی وارسه
شیمدی کاغد و غزته بحرانی ده وار، کنج شاعرلر بوکا چاره ساز
اولمق ایچون بر اوفاق کتابه اودا اودا صیغیشمشلر، داها
کس دیرمه سی بر کتاب نشر ایتمشلر که کأن غزته کأن کتاب؛
ایشته بویله غزته دیسهک دکل، مجموعه ویا کتاب دیسهک
اوده دکل، خلاصه معما و بیلیمجه کی ایضاحی کوج،
اداره مصلحت نامنه یاپیلمش بر اثر، بونک آدی ده صیراسیله
برنجی، ایکنجی، یدنجی، سکزنجی، الخ کتاب ...

بوكونلرده آكلاشىلان سىكزنجىسى نىشر ايدىلىش ؛ هر نه دىلىسه بىم
سىكز رىقنه قارشى اوفاق بر حدتم ، خصومتىم واردىر ، اويله ايكى
باجاغنى آيىروب هر ىرده تربيهسىز ومناسبتسىز دوروشى جانمى
صيقار ، برده بوسىكز عددى بر طاقم باياغى قومىقلرك آلنلرى
اورته سندن ايكى يه آيىرلىش فسلىرىنى واو فسه ورقه تلىحاً وقوع
بولان صوئوق جناسلىرىنى خاطر لاتىر ؛ مثلاً اىچرىدن قادىن :

— قاچىنجى قوجهم كلىدى ؟

دىيه صورارده قومىقده فسنىك ىيرتىغنى كوستروب :

— سىكزنجىسى !

دىر ، خلق كولمەدن قاتىلىر ، بىمده صىرتىمده بوز كى بر
بوغاز اىچى آنافورى قوپار ... هر نه ايسه عددك اهمىتى يوق ،
عنوانكده كذا ، شىكلده فنا دكل ، اوفاجىق ، ترمىز ، قىوراق
بر كىتابىچى . . . قابىندهكى اوسىروى بوىلى ، مومىا قوللى و آق
كوزلى عجائب طاووس قوشى رسمى اولماسه سوسلىرىنده برشى
دىيه مىه جىكدك . مىندرجاتىنه كىلنجىه : ايلك صحىفه يى عادتاً بر
خلىجان اىچىنده چە ىردىم ، « نه اولور اللهىم ، دىيوردم ، اىچىنده
اى بر قاچ اثر بولسىم ! » بىم بوهىجانم سوقاقدە جزدان بولان
بر فقيرك ، بر آجك اىچىنه باقمەدن اولكى حالنه بكزىيوردى :
بويوك بر شى مامول اىتمىهرك فقط بولمىق اىچون يورهكى
چىرپىنهرق . . . بومضايقه ، بوفقرالدىم ، بوقارا قىش اورته سىنده
كىمدن نه بكلمكه ، هانىكى فداندىن كل اىسته مكه حقمىز وار . هر
ايش دوردى ، بالطبع شىعرده . . . هانى آدامك برى ، تىحط
زمانى ، بر خانه كىتمىش :

— خانجی ، دیمش ، یو غورت یومورطه ایسترم ، بالدنده خبرك اولسون !

خانجی بر آز صو کرا بر پارچه قارا اکمک و بر باش صوغانله دونمش :

— ایشته صوغان ، دیمش ، ایشته اکمک ، حالنده خبرك اولسون !

اونك كې بزنده حالده خبریمز اولماسی لازم . . . استادلر نه یاپیوركه تلیذر نه یاپسین؟ . . ایشته بویله معقول و معتدل حسله له متحسس اولدیغم حالده او طاووس مومیاسنی مع الممنونیه چه و یروب ایلک صحیفه یی آچدم . اون ایکی مصرععلق قیسه بر شعر : (این ئوکی) . . . کندی کندیمه : باقالم ، دیدم ، کنج نسل دفتر اشعارینه شو خیرلی وقعه یی ناصل قید ایتمش ؟ بر طرفدن سیف اوراده ابراز جلالت ایدرکن قلم بوراده نه فراستلر کوسترمش ؟ آنادولی یه جان آتوب اورادنده چارچابوق بورایه دونمك صورتیه جانی دار قورتاران بر یکی شاعر (این ئوکی) ظفری ایچون البته شیمدی یه قادار سویلنمه مش یپ یکی نه کوزل بر فکر بولمش ، بونی نه هیجانله تصویر ایتشدر ، دکلی ؟ هان او قودم . هانی بعضی فقره لر آکلادیرلر که بیترده انسان بیتدیکنك فرقنده اولماز :

— نهی ، صو کرا ؟

دیهه سورار ، بنده بوشعری بترینجه « نهی ، صو کرا ؟ » دییه جك كې اولدم ، نه باشلادیغنی آکلادم ، نه ده نیچون بوقادار قیسه جه هیچ برشی دیمه دن بیتدیکنه عقل ایردیردم . او یله بر

منظومه که یازیلامش کی ، او قودقدن صـو کرا ذهن او قومامش
 کی بوش . . . یعنی قافیهلری خارجنده باس بایاغی بر نثر ، بز ،
 غزتهلر ، شاعر دن اول بونی یوز کره یازدق : « بیک اوچیوز
 اون اوچی اونوتمش ، میلونا خاطرندن چیقمش ، ایشته بو سکا
 درس اولسون ، ای آنادولی داغلری بو شانلی ظفری دایما
 آنیک . . . » ایشته کنج شاعرک نثره تحویل ایدیلن منظومه سی
 بو ، بوندن عبارت . . . اکر قلم ، سیفک خدمتی هپ بویله ،
 بو آغیزله ، بو قدرتله تثبیت ایده جک ایسه یازیق او قلیجک همتنه !
 ایکنجی شعر : (قاواقلردن چیقارکن) . . . نه فنا بر سر
 لوحه یاربی ، (بالق قاواغه چیقارسه) عباره سنی خاطر لاتیور ،
 خوش بو منظومه نك شاعری ده قاواقلردن چیقدی اما آنادولی
 طوپراغنه چیقامادی ، بلکه بالق قاواغه چیقارسه چیقه جق . . .
 هر نه ایسه ، کنج ناظم یازه بکزه یین بر دورغون قیش کوننده
 لیماندن چیقیور ، غروب قانه بکزه تیور ، استانبولی ده سو کیلیسنه . . .
 ایشته بو قادار ، شعرده بیتور . . . غروب قانه ، استانبولی
 سو کیلی یه بکزه تمک نه کزیده ، نه اینجه ، نه سـویلمه مش ، نه
 خارق العاده بر فکر دکلی ؟ نره دن ده بولمش ، ناصل ده عقل
 ایتمش ، بو کنج شاعرلری آرا صیرا (ده) محقق او قشویور ،
 شو منظومه دن بللی !

(سکنجی کتاب) ک ایلاک صحیفه لری ذاتاً هپ بو ایکی
 دوئم (فقط سالانیک دکل ، آنادولی دوئم سی) شاعره حصر
 و تخصیص ایدلمش ؛ جلال سـاهر بک ده عادتاً هر کنج نسـلی
 اوزون صاچلرینک سایه سی آلتنه بر قولوچقه اهتمامیله طوپلار

و صنعتكار سینه سەنك حرارتى ايچىندە بويوتور ، بىزى دە بويە
 يە تىشدىر مشدى ، آنادولى ايله (چايلاق ياورو مى قايماز سىك !)
 اويوننە كىرىشدى . آنقرە چايلاغى ، ياورولرندن دردىنى قاپوب
 كوتوردى ، ايكىسىنى آجىيوب اعادە ايتدى ، شىمدى بوسەوينجە
 كرى كلنلرە (سەكزىنجى كىتاب) ك باش صحىفەلرىنى ويرمش ،
 ئوزولمە سىنلردىيە ... آنادولىدە حرمت كورمە دىسەلر استانبولدە
 اعتبارلرى ا كىيلمەدى يا ! ايشتە يىنە بوشاعرلردن برى - طبىقى
 آرقداشى كى - واپورە ناصل بىندىكىنى ولماياندن ناصل چىقديغى
 تصوير ايدىيور و آنادولى يە فدا كارلغى اثبات ايچون :

فقط آنامك كوكلى ، نەھىجانلى ، نەدولو !

سەنك ايچون آە ، اوندىن آىرىلدىم ، آنادولو !

دىيور . زواللى سوت قوزوسى آناجغىندن آىرىلش ، بو
 فدا كارلغى كوسترمش دە آنادولى يە اويلە كىتمش ، آنادولودە
 آنا قىتلىغى مى وار ؟ آدى اوستىندە : آنا دولو ... ملت آناسى
 خالە خانم افندى اوفاجق شاعرى آنا شفقتىلە بر مدت تسلى
 ايدردى . فقط ، آكلاشىلان ، آنادولىنىك يورەكى دايانامامش ،
 بو منظومەنى اوقويىجە :

— شو چوجوغى آناجغىندن آىرىمق ، ولو كە وطن نامنە

اولسە ، يىنە دوغرو دكل ، كرى كىتسىن !

دىمش واعادە ايتمش . آفرىن شفقتلى ، مرحتلى آنادولى !
 سەجىلە شاعىرلردن برى دە بك اوغلندەكى آغا جامعنە
 آجىيور ، « ايمانسىز محيطدە ياپەيالىكز » قالمش دىيە ... شودرت

یانی معمور مملکتده آجینه جق بر آغا جامعی قالمشدی ، اونیده
 بوکنج کشف ایتش ! (سکزنجی کتاب) ک ایچنده بو دفعه
 (خلیل نهاد) امضاسی ده وار ؛ نفی ، نابی ، باقی کی شعرای
 قدیمه تقلیدی نه قدار آغیر یازیسی وارسه (پیام صباح) ه
 مناسب کوروپور ، سوللی پروودوم ، فرانسوا قوپه کی فرنک
 شاعرلرندن ترجمه ساده آتارینی ایسه بورایه یاقیشدیریور ،
 خلاصه هرنبضه کوره بشقه شربت ویریور ، براسکی قوناقدی
 غزل او قویور ، بریکی آپارتمانده شانسون سویله یور ، مهارت
 واقتدارینی هر محیطه اویدورویور . اونده بوخوی وارکن هانکی
 دورده اولسه راحت ایدر ، « هانی حلوا دیمه سنی ده بیایرم خالوا
 دیمه سنی ... » دیرلر ، خلیل نهاد بکده چشیدینی بیلیور !

(بن تولدیکم زمان) عنوانلی شعرده پک یکی ، پک خصوصی
 فکرلرله مشبوع :

أشهر قالان بلبلار آغلا سین مزارمده !

دیور . آ شاعر ، بو فکر شیمدی یه قدار غربده ، شرقده
 عجیبا قاچ بیکنجی دفعه سویله نمشدر ؛ سزک عقلکزه خورش
 و ظریف یکی هیچ بر فکر کله مز ، یازیکزده هیچ بر خصوصیت
 کوروله مز می ؟ بلبللی مزاردن آرتق غنا کلدی ، هم بویله بر
 شی ، باشند بلبلار ئوتن مزار همان همان هیچده کورولمش شی
 دکلدر . مزارلرده قارغهلر ئوتر ، بایقوشلر ئوتر ، داها باشقه
 مخلوقات ئوتر ، فقط بلبل ئوتمز ، کلزاری بیراقوبده سروستانده
 ئوتن بلبلک جنسیتنده شبهه ایتلی ، بایقوش وقارغه قیرماسی

اولسە كرك ! (تىنى) عنوانلى منظومە دەكى فكر ك پارلاقغىنە
ايسە دىيەجك يوق :

كشە سزى بوقادار كوزەل ياراتماسەيمش !..

أوت ، سو كىلىسنە بونى دىيور . آمان ياربى ، دوشونىكز
فضولى يى : « كاشكە ايچمدە بىك جانم اولسەيدى دە ھىر بىرلە
آرىجە سكا فدا اولسەيدم ! » دىرمش ، بو كىنج شاعر بولە بولە
« كاشكە چىركىن اولسەيدك دە سنى سومسە ايدم ! » دىمە سنى
بولمش . ھايدى بولمش ، بىردە ، اوستەلك ، شعر دىيە وزنە ،
قافىيە صوقوب يازمش !

ايشتە عشق شعرلرى ھىپ بو وادىدە ، بو عىاردە . . .
برىسى دە شويلە دىيور :

بن سزى بكاركن سز زوجكزك
قوينندە مستريح اويويوردىكز !

بوكا ، بوخام شعرە نە بويوريلور ؟ انسان بونى نە نظام ،
نە نثراً ، نە دە قالاً سويلر ، بويلە آقيرى لاف وزنە صىغارمى ؟
(ايلول) عنوانلى منظومە دەدە بوش يره برظرافت ، بىر يىكلك
آرادم ، شاعرە ايلول نە يى خاطر لاتىرمش بىلييورمىسيكز ؟
شېھەمى وار ، بىليورسيكز ، ھىمز ، ھىكس بىليور ، اونى بىلمەين
يوقدر كە ، بىليورز اما دە كەدىكى ايچون سويلە مە يىز بىلە :

ايلول كىنجلكمزك صوكنى خاطر لاتىر


كندى كندينه مى بونى بولدى ، آفرين يا وروم ، بىك تقدير !
 ايشته (سكرنجى كتاب) حقنده برقچ مطالعه وبوكتابدن
 برقچ نمونه ... اميد ايدهرم كه شيمدى ، همان ، در حال قوشار
 وبردانه آلوب شوطاشغين كنج ذكالك منبعندن بر طاس بوزلى
 صوده سز ايچر سيكز !



MAIN STACKS

جهان كتابخانه سنك بر آيلق نشریاتی

غروش	
۱۳۵	بيك بر كيجه حكايه لری ۳ جلد
۵۰	» » كل نهال سلطان برنجی كتاب
۵۰	» » دهشتلر دیارنده ایکنجی »
۳۵	» » جانلی مزارلر اوچنجی »
۳۰	خاطرات عبدالحمید خان
۲۵	سرای خاطره لری ، سلطان عبدالحمید خانك حیاتی
۲۵	عشق قادینی - محمد رؤف بك
۱۵	خلق دشمنی - ایبسه ن
۱۰	ترك مارشی - بیچاقچی زاده حق بك
۱۵	بر خانمك دفتری - علی علوی بك
۱۵	علم نجوم - راغب رفقی بك
۲۵	۱۸ حر كتمده كنج قیزلره تربیه بدنیه درس لری
۱۵	میمونك دفتری
۵	حكمد اراق قارشوسنده ملیت - لطفی فكري بك
۵	» » خلق سلطنتی - فؤاد شكری بك
۵	تشکیلات اساسیه قانونی ۱
۵	تفسیرلی خیانت وطنیه » ۲
۵	استقلال محاکمی » ۳
۳۰۰	مفصل عملی ، نظری اصول محاکمات حقوقیه شرحی - مصطفی رشید بك
۱۲۰	انفلاقلی مورتوزلر - کامران سری بك
۱۱۰	رهبر امتحان (قیزدانلره مخصوص) - محمد علی بك



DATE DUE

To renew
call 292-3900

[illegible]

The Ohio State University
Form 10620

فیثاتی ۲۵ غروش

رفیق خالد بک کلیات آثاری

نشر اولانلر

ایلاک طبع (موجودی توکنمشدور) کیرپینک دیدکاری

احمد احسان مطبعه سی

علاوه لی، آلتنجی بیک کتابخانه حلمی

» »

» »

—

صاقین آلدانما، اینانما، قانما

» »

—

مملکت حکایه لری

» »

—

استانبولک ایچ یوزی

(صباح) مطبعه سی

—

آغو پاشانک خاطراتی

جهان کتبخانه سی

—

آی پیشنده

» »

—

طانیدقلم

» »

—

غو غوقلی ساعت

دردست طبع

PL248

K34G79

1925

(نقش بر آب) لر

استانبول — صباح مطبعه سی

۱۳۴۱